

JA ØGYAJPX̄Y JA ØMYADYA'AKY MIDI JA MATEO YJAĀY

Ja Jesucristo tyeety'aptøjk

¹ Ja' idø'øn ja yiknajtskajpx̄ip pøn jaty ja nwindson'ajtim Jesucristo tyeety'ap̄ip ku ja teety'ap̄i ja Abraham jøts ja David,

² ku Abraham t'u'ngi ja Isaac, jøts ja Isaac t'u'ngi ja Jacob, jøts ja Jacob t'u'ngi ja Judá. Namay ja'adi møøt y'uch myigu'ukti.

³ Ja Judá møøt ja ñidø'øxy Tamar ja'ats t'unajk'ajttip ja Fares jøts ja Zara. Jøts ja Fares t'u'nk'aty ja Esrom, jøts ja Esrom t'u'nk'aty ja Aram.

⁴ Jøts ja Aram t'u'nk'aty ja Aminadab, jøts ja Aminadab t'u'nk'aty ja Naasón, jøts ja Naasón t'u'nk'aty ja Salmón.

⁵ Jøts ja Salmón møøt ja ñidø'øxy Rahab tmajnk'atti ja Booz, jøts ja Booz møøt ja ñidø'øxy Rut tmajnk'atti ja Obed, jøts ja Obed t'u'nk'aty ja Isaí.

⁶ Jøts ja Isaí t'u'nk'aty ja rey David, jøts ja rey David møøt ja tø'øxyøjk midi ja Urías wyinaty tø t'atsnidø'øxy'aty, ja'ats idø'øn tmajnk'ajttip ja Salomón.

⁷ Jøts ja Salomón t'u'ngi ja Roboam, jøts ja Roboam t'u'nk'aty ja Abías, jøts ja Abías t'u'nk'aty ja Asa.

⁸ Jøts ja Asa t'u'ngi ja Josafat, jøts ja Josafat t'u'ngi ja Joram, jøts ja Joram t'u'nk'aty ja Uzías.

9 Jøts ja Uzías t'u'ngi ja Jotam, jøts ja Jotam t'u'nk'aty ja Acaz, jøts ja Acaz t'u'ngi ja Ezequías.

10 Jøts ja Ezequías t'u'ngi ja Manasés, jøts ja Manasés t'u'ngi ja Amón, jøts ja Amón t'u'nk'aty ja Josías.

11 Jøts ja Josías t'una'jk'aty ja Jeconías, namay ja'adi møøt y'uch myigu'ukti. Winet ets ja israelit jaa'y idø'on yiknajtswa'wigyøjxtøø jam jadu'ukpi etjotp midi yiktejp Babilonia.

12 Tøts ja jade'en wyinaty y'ukjaty ku ja Jeconías tpaajty ja y'u'nk midi txøøw'ajtp Salatiel, jøts ja Salatiel ja Zorobabel ja y'u'ngip.

13 Jøts ja Zorobabel t'u'ngi ja Abiud, jøts ja Abiud t'u'ngi ja Eliaquim, jøts ja Eliaquim t'u'ngi ja Azor.

14 Jøts ja Azor t'u'ngi ja Sadoc, jøts ja Sadoc t'u'ngi ja Aquim, jøts ja Aquim t'u'ngi ja Eliud.

15 Jøts ja Eliud t'u'ngi ja Eleazar, jøts ja Eleazar t'u'ngi ja Matán, jøts ja Matán t'u'ngi ja Jacob.

16 Jøts ja Jacob t'u'ngi ja José midi tnidø'øxy'ajtp ja María midi tyaagip ja nwindsøn'ajtim Jesús, ja Cristo midi yiknitsokp.

17 Makmajkts najtska'axits idø'on ja tpaajty ku ja cho'onda'aky Abraham ñikøjxp jøts ja ttamigugøxi ja David. David ñikøjxpts jadu'uk cho'onda'aky jøts ja jaduk jade'en ñajtska'axidyøø kunim ja israelit jaa'y yikwaanøjkxtøø aguwan'ampy jam Babilonia. Winetnimts jadu'uk cho'ondaajky, ja'ats najtska'axidøø jaduk jadine'en ja makmajkts najtska'axi kunim kyaxi'jky ja Cristo ja yiknitsokpi.

Ku ja Jesucristo kyaxi'jky

18 Yide'en idø'on y'ejxi tyiyi sa jaty yjajty kyubety ku nwindsøn'ajtim Jesucristo ojts kyaxi'iky:

Ja María midi tyaagip, ja' idø'øn wyinaty na-jts'awani'ejtnip jøts ja tmøøt'amajtskit ja José; nawyaawajnidipnim ja wyinaty ku ja María jam tnikøjxp'ajtini ja mutsk, Dios idø'øn ja tuujnip jøts ja Espíritu Santo myøk'ajtin jade'en tyikmajada'aky.

¹⁹ Øy yikxonts ja José yjaa'y'aty midi idø'øn ñiyaa'y'ajtpy, ka'ap ja pøn sa tjadyimñøjmi jøts ja María kyayikpøky'ext; myajtstu'utwampy ja' jøts ja ka'ap pøn ttuknijawiwya'añ.

²⁰ Ixam idø'øn ja wyinaty jade'en wyinmay ku ja ojts agumaa'y'ampy tyuk'ijxyi ja Dios y'ankilis jøts ja ojts ñii'mxyi:

—José, metsxi mdeety'amøjip ja David, kidits mdsø'øgi, møøt amajtski yø María. Yikaxø'økwapmy mutsku'nk tu'uk, Dios y'Espíritu Santo jade'en myøk'ajtin tyikwingaxø'økp.

²¹ Mixyu'nk ja yikaxø'økp, ja'ats meets ja xyøøw mbiktaajkip JESÚS. Jade'en'ampy idø'øn ja jade'en txøøw'att ja'agøjxp ku ja pojkpitumbi jaa'y ja ttuknitso'ok'att ja pyøky.

²² Tyimyjajt tyimgyubajts idø'øn ja jade'en sa nwindson'ajtim Dios wyinaty tø tyikwā'añ ja kyugajpxy ku ja wyaañ:

²³ Jøtpyip tu'uk ja kiixye'døøxy midi amaay tsinaapy, yikaxø'økpts ja tu'uk myajnkun'k,

Emanuel ja xyøøw'atp,
midi ayuujk pidsømp: Dios adøm møøt.

²⁴ Xjats kuts ja José ojts ñiwijy, jøts idø'øn ja jade'en tpaduñ sa Dios y'ankilis ja wyinaty tø y'ane'emyiyi, jøts ja ojts tniðø'øpxyiky ja María.

²⁵ Jøts idø'øn ja ka'ap jade'en tmøøtsøøninim sam amajtsk'ajtin ñaxy kunim ja tø'øxy tyikaxi'iky ja myijawyeenu'nk; jøts ja ojts txødijy JESÚS.

2

Ku ja wijyjaay ojts t'ats'ejxti ja maxu'nk Jesús

¹ Jam ja Jesús ojts kye'exy Belén, jam kajpjojp midi Judeit etjotp, ja Herodes idø'øn jam wyinaty windsøn'ajtp, ja' wyinaty tuki'iyi tñitanaapy ja naajx jøts ja kajp. Xjats jam Jerusalén yja'attøø winaagin wijyjaa'dyi midi tsoo'ndip xøøbidsimy,

² ja'ats jam ojts tyiknidøwidi, yide'en ja wyandøø:

—¿Ma dø'øn ja tø kye'exy ja' pøn tñiwindsøn'atp ja ya'it israelit jaa'y? Tøts øøts ja n'ejxpaajti ja myaadsa' ma øø tøndsoøñ, icyats øøts ja tø nnimiñ jøts øøts ja nwindsø'øgiwya'añ.

³ Kuts ja windsøn Herodes ja ojts jade'en tñimadøy jøts ja tyatøjkiyi ja jotmay, nayide'en niduki'iyi ja Jerusaléngit jaa'dyi.

⁴ Winets ja windsøn Herodes tñankñamyujki niduki'iyi ja israelit teety windsøndøjkti jøts nayide'en pøn jaty tkajpxwejttip ja jaa'y, ja'ats idø'øn ja ojts tñibyiky ma et idø'øn ja Cristo wyinaty kyaxø'økwa'añ.

⁵ Xjats ja tñimaadyøø:

—Jam Judeit etjotp ma kajp jam txøøwi Belén; pø yide'enimxi ja Dios kyugajpxy jekyip tjaadyañ:

⁶ Ja kajp midi yiktejp Belén, midi jam Judá etjotp, kidi tyimñugo kajp yø' sam o midi kajp ma jaty jam yikutukti ja windsøndøjkti wine'enin yjam'atti jam Judá;

jam ja kyaxø'økt tu'uk ja møj windsøn,
midi øts nIsraelit kajp x'ejx'ejtip.

⁷ Winets ja Herodes amaa'tsk twaadsøoy ja wijyjaa'dyi midi idø'øn jam wyinaty tø choondi xøøbidsimy, jøts ja ojts ttiibyiky juuni dø'øn ja wyinaty tø t'ejxpaatti ja maadsa'.

⁸ Jøts ja ojts tkexy jøts ja ñjckxtit jam Belén, yide'en ja tnimaay:

—Nøjkxti jam, øyim yikxonim idø'øn xyiknidøwidit ja mixyu'nk; kuts xpaattit, jatyits meets ja xnigajpxt jøts meets ja xukmado'ot, jøts øts ja nayide'en n'atswindsø'øgit.

⁹ Kuts idø'øn ja windsøn Herodes ja jade'en ñimaajyidøø, xjats idø'øn ja wijyjaa'y choo'ndøø. Jøts ja maadsa' ja wyinyø'øyidi midi ja jam wyinaty tø t'ejxti ma dø'øn ja jam choo'ndi xøøbidsimy, yø'øpy idø'øn ja' kunim ja yja'ljty jam ma dø'øn ja mutsku'nk Jesús wyinaty, jamnimts ja yø'øy'amøjkiyi'ñ.

¹⁰ Ku dø'øn ja wijyjaa'y ja jade'en t'ejxti ja maadsa', xjats ja yjantyimxyondaktøø;

¹¹ kuts ja tyøjkidøø jam tøjkiotp, japts ja tpaattøø t'ejxtøø ja mutsku'nk jøts ku ja tyaak María ja jap møøt. Winets ñagyuxendyaajkidøø jøts ja twindsø'jkidøø ja mutsku'nk. Ojts ja tyikni'awa'atsti ja oori, ja poom, jøts ja pa'akxuu'kpi midi tyejtip mirra. Jade'en ja tyikni'awa'atstøø, ja'ats ja ojts ttamay'atti, ja' ja ojts ttawindsø'øgidi.

¹² Kuts idø'øn ja wyinaty jade'en tø t'ukwindsø'øgidi, xjats ja yiktukmadoodøø agumaa'yjøtpy jøts ku ja ka'ap nayide'en y'ukwimbejtnidit midi ja wyinaty tø tmendi, ma

ja windsøn Herodes ja jam wyinaty tø t'ukpaatti. Xjats idø'øn ja wyimbejtnidøø, abiktyuu' t'pøjktøø jøts ja ñøjknidi jam pyuxkøjxp kyajpkøjxp.

Ku ja maxu'nk Jesús ojts yikmigue'exy jøts yikminijkxy jam Egipto

¹³ Tøts idø'øn ja wijyjaa'y jam wyinaty choondi, ku ja nwindsøn'ajtim ja y'ankilis ñanky'eixøø jøts ja José ja agumaa'yjotpy ojts t'ixy, yide'en ankilis ja ñimaajyøø:

—Tsojk pidø'øk, møøt tsoon yø mutsk møøt yø tyaak jøts mgaknøjkxtit jam Egiptit etjotp, taa'nidi jam. Pøni wine'en jam mdaa'nidi øtsnim ja kø'øm nnigajpxp, ja'agøjxp ku Herodes yø t'ixa'awa'añ yø mutsk jøts yø tyik'ookwa'añ.

¹⁴ Xjats ja José ojts pyidi'iky, jøts ja ojts koots tsa'angue'eky ja mutsku'nk, jøts ja tmøødiyøø ja tyaak jøts idø'øn ja ojts tmøøtnijkxy jam Egipto.

¹⁵ Jam ja chinaadyi jeky kunim ja Herodes y'ø'jky. Jade'en'ampy idø'øn ja jade'en tyimyajty ti mibaat ja Dios kyajpxy jadi'iñi y'uknaxt pø patyxi wyinaty yide'en tø tyikwaañ ja kyugajpxy: “Egiptit etjotp øts ja n'U'nk nyiktsø'øñ ku øts ja nwaadsøøy.”

Ku ja Herodes tyikutuky jøts ja mutsk mixyuna'jk y'oo'køxtit

¹⁶ Kuts ja Herodes tnija'wiyi'iñ jøts kudam ja wijyjaa'y ja wyinaty tø wyin'iñiyi, xjats ja yjantyimy'ambijky; jøts ja ojts tni'ane'emy ku y'oo'køxtit ja mixyuna'jk. Majtsk jumøjt'pibaat ja ojts tnankyik'øøgyiyi wine'enin ja mixyuna'jk jam wyinaty Belén, jøts nayi wine'en ja kajp jam

tm̄iw̄ingon'aty. Ja jumøjt idø'øn ja pyayø'øpy s̄a ja wiyj̄aa'y ja wȳnaty tø tyukmadøyi.

17 Ka'pxy idø'øn ja jade'en yj̄ajty s̄a ja kugajpxy Jeremías wȳnaty ja nøky tø tja'ay ku ja wyaañ:

18 Yikmadoop ayuujk jam Ramá,

s̄am yj̄aw̄i øy pøn ti tpaj̄i'iy tpaya'axy;

ja tø'øxyøjk Raqueldam idø'øn y'u'nk y'unaj̄'jk
tpaj̄i'py tpayaxp jade'en,

jøts ja ka'ap tkupiky jøts ja yikpa'ayo'ot, pø tøxi
y'u'nk y'unaj̄'jk ja y'oo'køjxni.

19 Xjats ku y'o'jky ja Herodes, winets
nay'agumaa'yjøtpy tja'wiyii'ñ ja José jøts ku t'ijxy
tu'uk ja Dios y'ankilis jam Egiptit etjotp, jøts ja
ñimaajyøø:

20 —Pidø'øk, jøts xmøødit yø mixyu'nk yø Jesús
møøt yø tyaak, wimbejtnidi nøjxniidi jam Is-
raelit etjotp, tø ja y'oo'køjxniidi pøn jaty y'ijty
tyik'ookwandip yø mutsku'nk.

21 Winets ja José pyidi'jky jøts ja tyiktsøø'ñ ja
mutsku'nk. Ja Jesús idø'øn yikwaadso'omp møøt
ja tyaak jøts ja ojts ñøjkxti jam Israelit etjotp.

22 Kuts ja José tñija'wiyii'ñ jøts kudam ja Ar-
quelao jam wȳnaty wȳindsøn'aty Judeit etjotp, ja
tyeety Herodes ja kyudanaapy ku dø'øn ja wȳnaty
tø y'øøky, jøts ja José tsø'jkip ja', jade'ents ja
jade'en'ampy kyanijky; tøts idø'øn ja wȳnaty yik-
tukmadoogjmi agumaa'y'ampy jøts ja ojts ñøjkxti
jam Galileit etjotp.

23 Kuts idø'øn ja jam yja'attøø, jøts ja ñøjkxti
tsinaabyi mā kajp txøøwi Nazaret. Ka'pxy idø'øn ja
jade'en tyuujni yj̄ajty s̄a Dios kyugajpxy wȳnaty

tø wya'andi jøts ku ja nwindson'ajtim Jesús jam kyugajpi Nazaret.

3

Ku ja Juan Bautista kya'amaay jam abak etjotp

¹ Tøts ja tiempi wyinaty ñaxy jøts ja Juan Bautista midi yiknøbajtp, jam wya'kaxi'jky Judeit y'abak'etjotp, jøts ja jam kyajpxwa'kxy,

² yide'en ja jam wya'añ:

—Jawidi mbøky, yiktigajtsti mdsinaa'yindi, ja wyingøn ja Dios kyutujk midi ja tyanitanaapy ja yjaa'y.

³ Yø Juan idø'øn ja' midi ja kugajpxy Isaías ñigajpx ku ja yide'en tjaadyaañ:

Yikmadoop ayuujk jam abak etjotp ku wya'añ møk'ampy:

“Awejxidi ja nwindson'ajtim y'ixpøjkin; yiktøwdi yiktuuda'akti mwinmaa'ñ.”

⁴ Kameeyi pøjk idø'øn ja Juan jam wyinaty wyet'ajtpy, jøts jiyujk'ak tendsum'aty, ja mu' dø'øn ja jam chu'chpy jøts jiyujk pa'ak ja tji'kxy midi jam muum ujtsjotp, ja'ats idø'øn ja jam ñidsinaapy.

⁵ Jøts idø'øn ja jam øy pøn jaa'y ñimiñiyi jøts ja tmadowdi sa wya'añ, mendip ja' pøn tsoo'ndip jam møj kajpkøjxp Jerusalén, nayide'en wine'enin jam pøngapøn chøønidi jam Judeit etjotp, midi tmiwington'ajtp ja nøø midi txøøwip Jordán;

⁶ kuts idø'øn ja jaa'y ja pyøky tmayatsti, jøts ja Juan ja tyiknøbety ma ja Jordángit nøø jam.

⁷ Jøts ku dø'øn Juan ojts t'ixy jøts ku ja fariseotøjk may'ampy yjanchmendi nøbajtpi møøt ja saduceotøjkti, jøts ja tnimaay:

—jMee miku'! ¿Pøñ mee tø mnii'mxyi jøts ku jade'en mgayiktabayø'ødyit ja mbøky, jøts ku yø'øyi chøkyi ku meets ya nõbajtpi tø mmiñ?

⁸ Yikxon idø'øñ mjaa'y'attit, wan idø'øñ tyik'ijxy jøts ku ja mdsinaa'yin tø xyiktigatsti,

⁹ jøts kidi mee kø'øm mnawya'añidi namyikajxim: “Tixi ka'ap ti chøkyi kumi ja Abraham adøm n'apteety'amøj'ajtyindip”; jøts ka'ats yjade'eni ti Dios kamajyip øy ja pøn ttukmigu'uk'att ja Abraham pøni pøn ja kø'øm y'a'ejxip.

¹⁰ Jøts tsojk ja nøjkx yiktiidyuñ pøn jaty tkami'øy'ajtip ja Dios.

¹¹ Tiy janch ixyam ndyimdyukmadowdi jøts ku øts yø'øyi tø nnimiñ jøts meets nõø nduktanøbattit. Jade'en'ampy yiknijawit jøts ku mdsinaa'yindi tø xyiktigatsti; jats øts tu'uk ix'oojk xpamiñ pøn meets Espíritu Santo mduktatøkiyip jøts ja' tmime'ent ja tiiidyu'unin. Møk'ampy kutujk ja tmimiñ, nijuuni øts ja møøt nganamyibaat'atiyit.

¹² Jade'en ja ttu'unt ja naxwii'ñit jaa'y sam ariindøøm yikwigumyín, abiky ja tpiktaajkit ja y'aq jøts ja tniø'øty ja jøøñ midi nijuuni kape'tsp, jøts ja ariinbajk abiky yikpøkjø'økt. Jade'ents idø'øñ ja jaa'y yiktu'undit sa pønjabøn tmi'øy'aty tkami'øy'aty ja Dios.

Ku ja Jesús ñøbejty

¹³ Xjats idø'øñ ja Jesús yja'jty jam ma ja Jordánk nõø, jam ja chøøñ Galileit etjotp jøts idø'øñ ja jam yja'jty ma ja Juan wyinaty, ja' ja ñinijkxpy jøts ja yiknøbatit.

14 Ka'ap ja Juan ja twa'añ jøts ja tyiknøbatt, yide'en ja Jesús yiknimaay:

—¿Jawyeen me xtsøky jøts me nyiknøbatt? Pø metsxi dø'øñ ndijy xyiknøbatp.

15 Yide'en ja Jesús y'adsøøy:

—Wan idø'øñ t'ukjaty; jade'en ne'egi ndyimdyøø'jint jøts ku ja'ayi nbadu'unint sa Dios Teety tyiy'ajtin wya'añ.

Kyupøjk idø'øñ ja Juan ja jade'en.

16 Ja'ayi ja Jesús ñøbejty, jøts ja pyidsimy jam nøøjotp. Winets nay jatyí adsu'jky y'awaajch ja tsajp, jøts ja ojts t'ejxpaatti ja Dios y'Espíritu Santo ku ja ñigida'agyí sam tsapakin jøts ja tyakakpajti.

17 Winets ja Dios Teety y'ayuujk yikmadøøy, yide'en ja jap tsajpjøtpy wya'añ:

—Ya'at øts idø'øñ n'U'nk'ajtpy, yø' øts idø'øñ ndsøky'ajtpy, njantyaajotkujk'ajtpyts øts yø'.

4

Ku ja Jesús yikjot'amutsk'ejxwa'añ

1 Xjats ja Dios y'Espíritu Santo ojts yiknijkxyí ja Jesús jam abak etjotp, jøts miku' ja jam yjot'ejxit.

2 Wixijkxyøøw wixijxchuu' idø'øñ ja jam y'ayuu'ajty, jøtsnim yuu ja pyaajti.

3 Winets miku' ja jam ñimeejni jøts ja yikpøkyunwa'añi, yide'en ja ojts ñi'imxyí:

—Pøni janch ku me mjanchdiosu'ngi, yiktsapkaakyjat yø tsaa.

4 Xjats ja Jesús y'adsøøy:

—Yide'en Dios kyajpxy wya'añ: “Kuuyí Dios kyajpxy myøji, kidi ja'ajip naxwii'ñit jaa'y nugo tyajujky'attip ti jaty yikjøø'kxp.”

⁵ Winets miku' ja ojts yiknijkxyi jam Jerusalén midí Dios kyunuu'kxkyajp'ajtpy, jamts ja ojts yikøxpetyi tsaptøjk kubajk

⁶ jøts ja ojts ñii'mxyi:

—Pøni janch Dios U'nk mets, kajtswoon ya; pø nømpxi ja Dios kyajpxy jøts ku:

Ja tnøjmit y'ankilis jøts me myik'ejx'ett jøts ku me ka'ap ti mjattit.

Jøts ku mets ja ankilis mdsa'anjø'økit, jøts mdeky tsaa kyakumit kyayo'odsit.

⁷ Xjats ja Jesús t'adsøøy jøts ja tnimaay:

—Janch nayinømts Dios kyajpxy: “Kidi mDios xjot'ixy.”

⁸ Xjats ja miku' ja ojts wyaanøjkxkojmiyi jam mõj kojpkøjxp, jøts ja jam tyuk'ejxøø wine'en ja kajp naxwiin jøts ku janchkumeeñ janchjotkujk;

⁹ yide'en ja ojts ñii'mxyi:

—Ngøyajkøjxp øts yø kajp tuki'iyi jøts mets yø xja'bøkøxt, pøni xwinguxanaapy øts, pøni xwindsø'jkip øts.

¹⁰ Winets ja Jesús wyaañ jøts ja tnimaay:

—Miku', jiwā'ak, kidi øts ya xwin'ixy, pø yide'ents Dios kyajpxy wya'añ: “Ja Dios Teety tu'ugyi mwindsø'øgip, ja' mbadu'ump pøni sã ja wya'añ.”

¹¹ Xjanimts ja nwindsøn'ajtim Jesús ja miku' myajtstujtiyøø, jøts ja ankilis ja ñimeejnøø, ja'ats ja ojts pyudøkiyi.

Ku ja Jesús tpadøjkiyü'ñ ja tyunk

¹² Kuts ja nwindsøn'ajtim Jesús tnimadøøy jøts ku ja Juan jam wyinaty puxøjkjotp, winets ja ojts ñijky jam Galileit etjotp.

13 Jøts nika'ap ja tyaa'n̄iyi'ñ jam Nazaret, ne'egi ja ojts ñijkxy tsinaabyi ma ja kajp jam mejy'am midi Zabulon etjotp jøts Neftali etjotp, jam idø'on ja ojts ñijkxy Capernaumit kajpkøjxp.

14 Ka'pxy idø'on ja jade'en tyuujni yjajti sa ja Dios kyugajpxy Isaías wyinaty tø wyā'añ ku ja yide'en tjaadyaāñ:

15 Meets Zabulonit jaa'y, meets Neftaliit jaa'y, ma tuu' w̄ingon ñaxy jam mejy'am, midi yiknido'onip xøøbidsimy ku nnøjkxint jam Jordán.

Meets Galileit tsinaabyidi, pøn ka'israelit jaa'dyi.

16 Jade'en meets x'ejxpaaattit midi Dios Teety ñajtskajxip sam ja jajin pøn wimbeets kugoots tyimy'ejtnidip, nisudso mgawinmaa'nbyaatti pøni sadam idø'on ja Dios mdsøkyidi, tøts ja tyikujajtaagi tyikudøø'kxaagi pøn ja pyøky tmi'ookwanidip jadi'iñi, jøts tø ja Dios mduu'mø'øyidi sudso mnitso'ok'attit.

17 Kuts ja Jesús ja'ayi jam Capernaum kyajpkøjxp yja'aty, yide'en ja kyajpxwa'kxnibøjkiyi'ñ:

—Jawidi mbøky, yiktigatsti mdsinaa'yindi, ja'agøjxp ku ja wyingøñ ja Dios kyutujuk midi ja tyanitanaapy ja naawii'ñit jaa'y.

Ku ja Jesús twaadsøoy nimaktaxk ja ajkxmakpi

18 Jam ja Jesús wyinaty ñaxy mejpya'am midi jam Galilea etjotp, ku ja t'ejxpaaity namajtsk ja jaa'y midi ttukmiga'ax'ajttip, tu'uk txøøw'aty Simón, nayi yikxøømøøpy ja Pedro, jøts jadu'uk Andrés. Ajkxmakk idø'on ja tyunk'ajttip ixam ja wyinaty tyimñiwejtspatti ja tya'ajkxmajk.

19 Winets ja nwindson'ajtim Jesús ja ñimaajyidøø:

—Mada'akti, møøt widettik øts jøts nduknijawidit sudso jaa'y ja nitso'ok'ajtin tpaatt.

20 Jøts idø'øn ja nay jatyï tnajtswøjidøø ja tya'ajkxmajk jøts ja ojts tmøødidi.

21 Tø wyinaty waani yø'ødyi, jamts ja Jesús ojts t'ejxpatkojmi nayi namajtsk ja jaa'dyi midi tukjaa'dyi: tu'uk yJacobo'aty jøts jadu'uk Juan txøøwi, ja Zebedeo dø'øn ja y'una'jk. Jam ja wyinaty møøt ja tyeety barkijotp, ja tya'ajkxmajk ja jam wyinaty y'adajkidip. Winets Jesús ja ojts yaajxiyidi,

22 jøts ja nay jatyï tmajstuttøø ja tyeety jam barkijotp, jøts idø'øn ja tmøødidøø ja Jesús.

Ku ja Jesús tyik'ixpijky ja mayjaa'y

23 Øy ja Jesús øy maðsoo tyimwyidity jam Galileit etjotp, ku ja øy magajp yja'aty jøts ja yik'ixpijky jam tsaptøjkjotp, jøts ja tkajpxwa'kxy ja Dios y'øgyajpxy midi ja tyanitanaapy ja yjaa'y, jøts ja øy pønjabøn tyiktsø'øky pøn jam tigati pa'am pøjkip.

24 Jøts ja Jesús yiknija'wiyii'ñ, ñija'wigyøjxtøø ja' pønity tsinaadyip jam Siria etjotp, ja'ats ojts ja pyamaa'y tyikmendi pøn jaty jam o tigati pa'am pøjkidip ajnidip, jøts ñayikmemidi ja' pøn ja miku' tø tyatøkiyidi jøts pøn ja mø'ødyi pa'am pøjkidip, pøn køxujxtip pakxujxtip. Xjats idø'øn ja nwindson'ajtim Jesús ja tyiktsokijxy.

25 Jøts idø'øn ja mayjaa'y jam jade'en yja'atti choondi pøn tso'ondip jam Galileit etjotp, jøts ja yikpawidity ja Jesús. Jam ja'adi pøn kugajp'ajttip ma jaty ja kajp midi kyutujktaajk tjagyajptip

Decápolis jøts Jerusalén, jøts nayide'en pøn tso'ondip Judeit etjotp, jøts nayide'en jamidi pøn kugajp'ajttip jaduktamajñ'ampy ma ja Jordánit nøø tyañ.

5

Ku ja Jesús ojts kya'amay jam kojpkøjxp

¹ Xjats ku ja Jesús ojts t'ixy ja mayjaa'y jam, winets ja ñijkxy kojpkøjxp jøts ja jam y'ixaajky, jamts pyabøjkpitøjk ja ñachinaa'y'awidejtøø,

² jøts ja ojts yide'en tyik'ixpøjktøki:

Ja' pøn nekim t'ejxtip

³ —Tya'øy'ajtidip ja' Dios kyunuu'kxin pøn ja y'amutsk'ajtin yja'wip, ja'ats pyaattip ja Dios kyutujk midi ja tyanitanaapy ja yjaa'y.

⁴ 'Tya'øy'ajtidip Dios kyunuu'kxin ja'adi pøn jotmayaxtip pøn jotmay'oo'ktip, ja' idø'øñ Dios ayo'ejxidip.

⁵ 'Tya'øy'ajtidip ja' Dios kyunuu'kxin pøn myiduda'aky'ajttip ja y'awejx'ajtin, ja'ats pyaattip ja øy'ajtin midi ja Dios tø tni'adsowi.

⁶ 'Nayide'ents ja tta'øy'ajtmidit ja Dios kyunuu'kxin pøn tjantyimtyojktip ja øy'ajtin ja tiy'ajtin midi Dios yja'ajip, pudøkiyidipts ja' jøts ja jade'en ttu'undit sam idø'øñ ja ttsokti.

⁷ 'Ñayi tya'øy'ajtidip Dios kyunuu'kxin ja'amidi pøn t'ayo'ejxtip ja myigu'uk, ayo'ejxidipts Dios ja nayide'endi.

⁸ 'Tya'øy'ajtidip Dios kyunuu'kxin ja'adi pøn ja yjanchja'win tu'ugyi yik'ejttip, kuwanits ja Dios ja tpaattit.

9 'Tya'øy'ajtidip Dios kyunuu'kxin ja'adi pøn yikxon tkajpx'øyidip jøts tsep tkananktyuñidi, ja'abi jaa'y idø'øn Dios u'nk'atidip una'jk'atidip.

10 'Ñayi tya'øy'ajtidip Dios kyunuu'kxin ja'amidi pøn tku'ayo'ombaaajtidip ja øy chinaa'yin, jøts yikjemandi yiktedundi, ja'abits idø'øn paat'ajtidip ja Dios kyutujk midi ja tyanitanaapy ja yjaa'y.

11 'Ñayi tya'øy'ajtidip Dios kyunuu'kxin ja'amidi pøn yikjemniimaadyip yikteniimaadyip uk yikjemandi yiktedundi, yikniwambatti a'øy'ampy øts køjxp.

12 Kidits xkumayjawidi, xonjaiti jotkujk'atti meets, møj'ampy meets ja nøjkx mwingaxø'jkxyi jap tsajpjøtpy, pø nayide'enxi ja yikjemandøø yiktedundøø pøn jaty tø y'atstsøøniidi y'atstanidi pøn kugajpxy'ajtidip ja Dios.

Ja' pøn jade'en naxwiñ tundi sam ja jaj tyuñin sam ja kaan tyuñin

13 'Jade'en meets idø'øn sam kaan tyuñin midi wa'ats midi naxwiñ'ñit jaa'y yiktundi jøts chu'jch kyawindigø'ødyit. Nayide'en idø'øn ndejint mdunkpaattit ku mmigu'uk xukmado'odit ja Dios yja' sudso'ampy y'anmija'win kyawindigø'ødyit. Kuts ka'ap jade'en mdu'undit tø wyinaty mbidsømdi ejxim ja kaanin midi kawa'ats midi katump.

14 'Kuwanì myik'ejxtit myiknijawidit nayide'en samì kajp yik'ijxyin midi jam ejxin'am midi jam kojpkøjxp. Jade'en meets idø'øn ejxpajt mwā'andip sam jaj yjajyin tyi'kxyin.

15 Kidi ja'apxi yø jaj tniðøbyøki jøts ja yikpikta'akt kajuun patki'py, pø ja'axi ja wya'ant

jøts ja yikpikta'akt jam ejxin'am ma ja tyikujajit tyikudøø'kxiti pøn jaty tsinaadyip jam tøjktotp.

16 Nayide'ents meets idø'ønmi, tuk'ejxti ja jaa'y ja øy'ajtın ja xondaajkin jøts t'ejxtit tnijawidit jøts kudam meets xuñ ja tiy'ajtın, mjajotwamp tam meets, myijawidipts kyunuu'kxyjawidipts ja' ja Dios Teety midi mee mnitanaajyip o madsoo midi jap tsajpjøtpy.

Ku ja nwindsøn'ajtim Jesús tnigajpxy sa tyu'unt ja Moisés kyutujk

17 'Kidi meets jade'en mwınmaañidi jøts ku øts ja' tø nnimiñ jøts øts ja Moisés kyutujk jøts øts ja Dios kyugajpxy y'ixpøjkin nyikudigøjyidit; kidi ja'apts ø tø nnimiñ, ja'axi ø nnimimpy jøts øts ja jade'en yikxon njaaktyimñigajpxy sa jaty ja tø wya'andi.

18 Janch øts idø'øn nwa'añ, pøni wine'en iiy tyaa'ni yø naajx yø tsajp, niwine'enints ja kutujk kyagudigø'øty kunim ja tuki'iyi ka'pxy jade'en tyimyjatt pøni ti jaty idø'øn tunipnim.

19 Paty ja ka'ap yikmøj'ext ku Dios kyutujk ttanitanit ja yjaa'y pøni pøn yiin waan tkayikmøjip ja Dios kyutujk, kuts ja myigu'uk ja nayide'n ttukpabiky sam ja kø'øm tpaduñ yiin waan, ja'ats idø'øn ja Dios kamøj'ejxip nayide'en. Pønts ka'pxy tpadump jøts myigu'uk ja nayide'en ttukpabiky, møj'ejxipts Dios ja' ku kyutujk ja ttanitanit ja yjaa'y.

20 Paty mee ndukmadøy, pøni ka' øy yikxon mjaa'y'atti, pøni mdundip nayide'en sam yø fariseotøjkti sam yø kajpxwejpitøjkti, nijuunits

meets Dios kyutujk jade'en xkapaajtiyidit midi yjaa'y ja tyanitanaapy.

Ku ja Jesús tniġajpxy sa kya'øyi ja aki jøts ja jotma'jtin

21 'Tøxi xnimadowdi ku ja n'apteety'amøj yikniimaadyøø: “Kidi myikjaa'y'øøky, pøni pøn yikjaa'y'oo'kp yiktiidyu'ump ja'.”

22 Yide'ents mee nnøjmi pøni pøn ja myigu'uk tmi'ambøjkp, nayi yiktiidyu'ump ja'. Uk jam o pøn ja myigu'uk tjemnøjmi ttenøjmi, tiidyunidipts ja' ja kutujk adsinaabyidi mā ja kutujktaajk jam; uk pøn tnimaapy ja myigu'uk jøts ku ja myø'øty, paat'ajtip ja' jøts ja y'ayo'ot mā jøøn jap ayodaajkjotpy.

23 'Paty pøni mbikta'akwandip ja myøxy jam altajrwemp, kuts jam mja'atti jøts winet xja'myatsti jøts kudam ja mmigu'uk jap tu'uk pøn mmidsep'ajtip,

24 jamyits ja altajrwemp xmajtstu'uttit midi my-oxwandip, jøts ja jawyeen x'atskajpx'øyidit møøt ja mmigu'uk. Pøni ti dø'øn mnadyami'ambøjkidip jøts mnamyijotjimbetidit xem yam møøt ja mmigu'uk, winetnimts jadigojk mnøjkxt jam altajrwemp, jøtsnim ja xyoxtit midi jam tø x'ukyiknøjkxti.

25 'Ku pøn mni'øøniwya'añidi jøts ja myiknøjkwā'añidi jam kudunk wyindum, namga'anīm jam myiknijkxyidi, tiku yikxon xkakajpx'øyidi jøts ja møøt mnamyijotjimbetidit jadigojk, jøts kidi myiknijkxyidi jam windsøn tiidyumbi wyindump. ¿Ja ti nø'ømp ja windsøn jam? Pø mgøyakidipxi ja jam jøts mee

myikøyakt ma ja tajk mayojr jamdi, ja'ats mee myikpuxøjktøkiyip jøts mee myiktsu'umt.

²⁶ Øts idø'øn wamp, jøts ku jaanim mbidsø'ømdit ku wyinaty tø ja multi xkubatkøjxti.

Ku ja Jesús tnigajpxy pøn tø'øxy yaa'y nabyøjkxidip

²⁷ Tø meets inet ja xnimadøy ku jekyip yide'en yjawa'andi: “Kidi mmigu'uk ñiyaa'y ñidø'øxy xpøjkxyi.”

²⁸ Yide'ents øts nwa'añ, pøn ja'ayi t'ejxkip ja tø'øxyøjk øy ja nugo y'am yjotp yjawinmay, pøkyumptø idø'øn ja jade'en.

²⁹ Pøni ka'ap yø mween y'øyi ku yø mduk-tunk'atyi jøts myikpøkyunwa'añ, jade'en ne'egi mdyimdyø'øt jøts ku mnawyenjuudit, jøts jagam xpikta'akt ja mween; ne'egi øy'ajtp jade'en ku ja'ayi wyindigø'øty midi myikpøkyunwajnip, jøts kidi amuum mwindigøøgyixy, jøts kidi amuum mnijkxy jap ayodaajkjotpy.

³⁰ Uk nayide'ents mgø' myikpøkyunwa'añi, ne'egits xkajtspoott jøts køkuk mda'ant; ne'egi øy'ajtp jade'en ku ja'ayi wyindigø'øty midi myikpøkyunwajnip, jøts kidi amuum mwindigøøgyixy, jøts kidi amuum mnijkxy jap ayodaajkjotpy.

Ku ja Jesús kyajpxwiyj sudso ja amajtsk'ajtin ñaxy

³¹ Nayi tø jekyip yiknigajpxy: “Pøni pøn ñidø'øxy tmajtsu'utwamp, tiy'ajtingøjxpts ja tminawya'kxit, kojpu'uk ja nøky.”

³² Yide'ents ø nwa'añ, ku pøn yaa'dyøjk ñidø'øxy tminawya'kxyi a'øy'ampy, ku ka'ap ja wyinaty

ja wenk yaa'dyøjk tmøøt'aty, møj tundigø'øyin ja tyumpy, jøts ja tø'øxy pyøkyuñ ku ja wenk yaa'dyøjk ja møøt y'amajtskimyi. Nayi pøky ja yaa'y nayide'en taja'jtíp pøni myøøt'amajtskip ja tø'øxyøjk ja' midi tø wyinaty yikmajtstu'uty.

Ku ja Jesús tnigajpxy ku ka'ap Dios køjxp nugo ndaay'ajtint

³³ 'Nayi tøts inet xnimadowdi ku ja mdeety'aptøjk jekyíp yiknimaadyi: "Pøni ti mni'adso'owíp Dios wyingujkp, kidits meets ja xka'ukyik'adujkni ja mgajpxy ja m'ayuujk."

³⁴⁻³⁵ Øtsts wamp jøts pøni ti ja mmigu'uk mdamini'adso'owíp, ka'ap ja Dios nugo xyiktestig'att. Ni xkakajpxpaattit ja tsajp jøts ja naajx, jabi Diosxi ja nayide'en yja'ajtpy; ni ja Jerusalén kajp xkakajpxpaattit, jabi nay ja Dios møj yikutujkpixi kyajp ja'.

³⁶ Uk kø'ømbaät mgubajk x'awanidi ku ja kyayikmibiky midi mjadukjanchjawíwyandíp o pøn, kidits jade'en nugo mwa'andi, kidi kø'ømipxi meets mwaay mgubajk xyik'øyi, pø nay Dios ja jade'en kø'øm mmøjyidíp.

³⁷ Ka'ap nugo ti xkajpxjimbettit xkajpx'adøjtít pøni ka'adam ja ka'pxy xnijawidi, jade'ents idø'on ja miku' ja tyunkjøøjp tyikyø'øy ku xkajpxyondi.

Ku ja Jesús tnigajpxy sa pøn ja pyøky ñanktyukubetyidi

³⁸ 'Nayi tø net xnimadowdi ku ojts jekyíp yide'en yiknigajpxy: "Jøts nayide'en pøngapøn ja myigu'uk tyik'ayo'ombaatt pøni ti ayo'on ja jade'en ttuñ, nayide'ents idø'on ja tyimyiktu'unt."

39 Yide'ents ø nwa'añ: Jøts kidi mee nayide'en xun̄ sam ja ka'øjjaa'yindi; pøni mgojxip mdse'jkip, ja' øy ku xmaa'kxuktit.

40 Kuts øy pøn mniwambatwa'añidi jøts ad-sepkøjxp myikpøjkxiwya'andi ja mnijan, mo'odits, jøts pøni yjaaktyimbyøkwapya ja yukwop, kidits ayuujk nugo xyikyondi, mo'odi.

41 Pøni myiktaguwa'anidip jøts tsimy xpadsø'ømdit, jøts ja jam xyikja'attit pøni mā tø t'a'ejxidi, mjaaktyimdyuujnidipts ja may'ajt ja' jøts ja jawaani jagam xyikja'jtidit.

42 Pøni myik'amidoodip øy ti, mo'odits, kidi meets ja kamø'øyin x'ixy; nayide'en pøni pøn anuu'kxy øy ti m'amidoidip, kidi mee tø mwa'akjimbejtni jøts mmigu'uk møj may x'adsowdi.

Sudso yikminamyayit ja midseptøjk

43 'Nayi tø xnimadowdi ku jekyip yide'en yikni'gajpxy: "Ja' møøt mnamyayit pøn møøt mnamyigu'ukwa'añi, jøts ja kawin'ijxyim xjawit pøn møøt mnamyidsep'aty." "

44 Yide'en ø nwa'añ: Jøts xtsoktit xmiyuuj'attit ja mmidseptøjkti, ødyejti ja' pøn mga'ødyejiyidip, pudøki ja mmigu'uk pøn mjami'ajkidip mjami'jotma'jtidip, ku'amidowidi meets ja' pøn mjemnimaajyidip mdenimaajyidip, pøn mjemduujnidip mdeduujnidip.

45 Jade'en'ampy meets ja Dios Teety tsajpjotpit mja'bøkidit jøts ja m'u'nk'atidit; pø tum ja'axi tyikni'amp tyikni'ajp ja øjjaa'y ja ka'øjjaa'y, uk ku tyu'uy ja'ats ja nøø tuu tkajxp.

⁴⁶ Kuts meets ja'ayi møøt mnamyayi pøn mee mmiyujy'ajtip, ¿tits ja jade'en ñiwya'ant, ti may'ajt meets ja jade'en myiktagumøyip? Pøn ja jade'en tkajajtp, yikugubajtpi paat ja jade'en ttuñ.

⁴⁷ Uk xkajpxpoo'kxtits ja'ayi pøn jaty mmigu'uk'ajtip pøn tu'ugyi ja mdsinaa'yin møøt ñabyaadyi, ¿ti øy'ajtin meets idø'on jade'en mdumpy? Ti pøn ja jade'en tkajajtp, pø nayide'enxi ja y'adø'øtsti pøn Dios tkajanchja'widip.

⁴⁸ Yikxonts mjaa'y'attit øy wa'ats, nayide'en sam ja mgunuu'kxyeety midi jap tsajpjøtpy.

6

Ku ja Jesús tnanky'ixpiky ja ødyu'unin

¹ 'Øyim x'ejxtit, jøts kidi mdsinaa'yin nugo xa'ødyøki ñadyijyi ja mmigu'uk xuk'ejxti øy paat. Pøni m'adø'øtswandipts jade'en, niwine'enints meets Dios Teety may'ajtin ja mgadagumøyidit ja' midi jap tsajpjøtpy.

² Paty ku xpudøkidit øy pøn ayoobi jaa'y, kidits meets ja niduki'iyi jaa'y xamimadyakixy, kidi mee nayide'en m'adøtsni sam ja jaa'dyi midi jam tsajptøjkjotp, midi jam nøø'am tuu'am win'øø'ndip. Jade'en'ampy idø'on ja jade'en y'adø'øtsti jøts ja kajxa'aky pyidsø'ømdit, jade'eñits myay'ajtin ja tpøkti.

³ Jøts ku xmo'ot øy ti ja ayoobi jaa'y, tunts idø'on jade'en jøts kidibaat ja xuknijawit pøn me mjady-imyjamøjmigu'uk'ajtpy,

⁴ ne'egi øy ku ka' pøn xuknijawit ku jade'en xu'unt. Jøts ja Dios Teety wa'ats ja t'ixy ti jaty

me mdumpy øy ja pøn xjagaduknijawi, mbaajtipts mets ja myay'ajt'in ja'.

Ku ja Jesús tnanky'ixpiky ja Dios'ajot'ajt'in

⁵ Jøts ku mdsapkajpxtit, kidi jade'en xundi sam ja jaa'y midi win'øø'ndip, ja' midi tsojktip jøts ja tani Dios'ajot'attit jap tsaptøjkjøtpy, uk ma jaa'y y'ejxidit jøts ja jade'en yikajxa'aktit. Jade'eñits ja kø'øm ñadyukpikyidi ja myay'ajtindi.

⁶ Kuts ja Dios x'ajot'attit, tøkidi mdøjkjøtpy, agø'ødi ja mdøjk jøts xminuu'kxa'aktit anadyu'uk'ampy ja mDios Teety, pø ixajpxi ja nayide'en jøts y'ijxpy ja' ti jaty mee mdumpy, øy meets ja pøn xjagaduknijawi.

⁷ Jøts ku dø'øn jade'en ja Dios x'ajot'attit, kidi ja xkajpxjimbetti xkajpx'adøjti midi tø xja'ukajpxti, kidi jade'en m'adøtsnidi sam ja jaa'dyi pøn Dios tkanija'widip, pøn winmaadyip ku ja y'øømayidit kyajpxmayidit winets Dios ja myadowidit.

⁸ Kidits meets nayide'en m'adi'ich sam ja y'adø'øtstin; pø wa'atsxi Dios Teety ja ne'egi tnijawi pøni ti meets idø'øn mga'ejtxip, pøni ti meets idø'øn mdsøjkpy, wa'ats ja tnija'wiñi yam meets ja xka'amidøynim.

⁹ Paty idø'øn yide'en ja Dios x'ajot'atti:

Dios Teety tsajpjotpit,

kuuyi mets jadu'uk øy wa'ats.

¹⁰ Øyts ku xmiñ ja mgutujk midi mdanitanaapy ja mjaay.

Yikjatts ya naxwiiñ nayide'en kø'øm dsojkingøjxp pøni sa xamidsøky nayide'en sam jap xuñin tsajpjøtpy.

- 11 Møøkyts øøts ıxyam ja ngaajyik n'uujkik midi øøts xka'ejtxip.
- 12 Maa'kxik øøts ja nga'øy'ajtin ti jaty øø tø nduñ, kumi tø øøts nayide'en nmaa'kxuky pøn øøts xjemdump xedump.
- 13 Agidyujk øøts axajtujk øøts, kidi øøts xmajt-stu'uty jøts kidi myajada'aky ja miku'y ja'.
Pø metsxi ja' mgutujk midi ja mjaay' mdanitanaapy, mets amuum møk'ajtin, jøts ja øy'ajtin xondaajkin midi xemikøjxp. Jade'en idø'øñ ja yjatt.
- 14 'Pøni mmaa'kxuktıp ja jaa'y pøn mjemdu-ujnidip mdeduujnidip, nayide'ents meets ja Dios Teety mmaa'kxukidit pøn jap tsajpjøtpy;
- 15 kuts pøn xkamaa'kxuktit, ka'ats meets ja Dios Teety mbojkipimaa'kxidit.

Ku ja Jesús tnigajpxy ja amaay'ajtin

16 'Jøts ku m'amaay'attit ku ø xkagugayidit xk-agu'uugidit, kidi meets jotmay'øøgyim x'ejxnidi, kidi meets ja jade'en xyiknigaxi'iky sam y'adø'øtsti ja win'øø'mbi jaa'dyi; jade'en'ampy ja jade'en ttundi jøts ja ttuk'ejxti øy pøn jaa'y ku ja jade'en y'amaay'atti. Jade'eñi ja tpaatti ja may'ajtin jøts ja ka'ap Dios yja' tpaajtidi.

17 Kuts mee m'amaay'att, nawyoogi nagmaaxi, puj mween m'aaw,

18 jøts ja jaa'y kidi tnijawidi jøts kudam me m'amaay'aty. Ja Dios Teety ja tu'ugyi tnija'wip, pø ıxajpxi mets ja møøt. Øy mets ti xuñ xkajpxy, ñija'wipts ja wa'ats; nay ja'ats mets ja may'ajtin mmo'ojip.

Ja kunuu'kxy jujky'ajtin midi jap tsajpjøtpy

19 'Kidi meeñ kidi pikta'aky ya naxwiiñ nugo x'abøjktøkidi mā ja'ambi jøø'kxpi tyikudigøy ja pikta'aky, jøts mā maa'tspi kadye'ebyi tyøkidi jøts ja tuki'iyi tyikpidsømguixy ja pikta'aky.

20 Ne'egi øbyidsø'ømp jade'en ku xjøp'ijxy'attit jøts xpaattit ja jujky'ajtin midi jap tsajpjøtpy, midi ka'ap mwindingø'xiyidip.

21 Pøni mā xnajtsjawidi xpaatwa'andi ja jujky'ajtin, nay japts meets ja mwınmaa'ñ y'ity.

Ja øy jaj midi ja jaa'y tyikja'gyukip

22 Xjats ja Jesús yjaakwaañ:

—Jade'en idø'øn yø mween n'ukpiktaajkint sam ja jajin, yø'øts tyikujajtaajkip tyikudøø'kxaajkip amuum ja mne'kx mgojpk; kuts ja mween y'øy'aty, nayide'ents ja amuum tjagyepy ja ne'kx ja kojpk, ka'ap ja ttuktuñ ja kya'øbyi;

23 kuts ja mween kya'øyi, nayide'ents ja tyikjaty ja ne'kx ja kojpk sam pøn kube'ets kugoots y'ity. Pøni jamts ja jaj xmøødi jøts kuts ja xjaaktyimyik'ookni ku ja jade'en yjaaktyimyjajtni sam kyoots'ityin, jjaaktyimyjinajxpts ja' yam ja tø yjakoodsimyi!

Ku ka' tuk'ojkyi majtskjøøjp n'ajot'ajtin jade'en ja Dios jøts jade'en ja meeñ

24 'Ka' pøn tumbi namajtsk wyindsøn tmiduñ, ku ja jade'en ttu'unt, tu'ukts ja pyidsø'ømt pøn ja wyinjawip, jøts ja yjadu'ukpi ja tkawinjawit, tu'uk ja t'ømyidu'unt jøts ja yjadu'ukpi ja tka'ømyidu'unt. Paty nayide'en ka' pyaāt'aty jøts nmidu'unin ja meeñ ixyadamts Dios njamidu'unma'andi, tu'ugyi Dios n'ajot'ajtin.

Ku ja Dios t'ejx'ity pøn jaty ja y'u'ng'ip y'una'jkip

²⁵ 'Ja'agøjxp øts idø'øn nwa'añ, jøts kidi xjotmay'atti pøni ti dø'øn mga'adyip m'uuktip, pøni ti dø'øn mdajuky'attip, ni ja mwet mnaamy xka-jotmay'attit ti dø'øn mnadyaxoxidip. ¿Ti jade'en ja juky'ajtın yikpaaty samı kaaky jii'kxyın? Pø ka'axi. ¿Jøts ja wet naamy mibaat ja t'uk'amibaat nayide'en pøni sa dø'øn ja ne'kx ja kojpk yik-møøt'aty?

²⁶ Ejxti yø joon, ejxti yø jiyujk midi kakwidejttip jam tsajpwemp, ka'axi yø ñe'epti kyojti, ka'axi pyikta'aky yø tyikpidø'økti, ka'axi pyikta'aky yø tpøkjø'økti jøts tpikta'aktit jap tsa'jxjøtpty; øy yø jade'en yjagatundi, yikmøødyipts yjii'kxy yø', ja' yø tmøøpy pøn mee m'ajot'ajttip, ja Dios Teety pøn jap tsajpjøtpty. ¿Tits mee mdsow sa ja jiyujk jade'en ja yja' yikmo'odi!

²⁷ ¿Pøn kø'ømdsøky tyimy'uknankyojnıp jagujkp metrın, øy ja mabaat jade'en tjadyimyjatsøky?

²⁸ 'Jøts tiku xjotmay'atti ja wet ja xox? Ejxti yø ujts ejxti yø pijy midi yomp aayjøøjty ujtsjøøjty, ka'axi yø pyeetti kyojti, ka'axi yø ti ttundi;

²⁹ jøts øts idø'øn yam wamp, jøts ku ni ja rey Salomón jade'en ojts kyanadyaxøxyi ja xyox ti jaty ja jam wyınaty myøøt'ajtpy, sam yø ujts sam yø pijy tmidsujkaxi'ikiy ja xyox.

³⁰ Pøni xyøjxpy tamts Dios jade'en ja ujts midi ja ixyam yomp ja aayjøøjty ja ujtsjøøjty, øy ja jabom wixøjkp yjayiknitsaañit, ¿tits mee mdsow sa ja ujts sa ja pijy jade'en yjaakyikxøxy, meets kaja'gyukibidi meets ka'ajot'ajtpidi!

³¹ Paty kidi mmaydi mdajti, jøts kidi mwa'andi: “¿Ti dø'øn ngaayim njøø'kxim? uk ¿ti dø'øn

n'uujkim? uk ¿ti dø'øñ nwet'ajtīm nnaamy'ajtīm?"

³² Tum yø yjade'embī pikta'aky pyawinmaadyip ja jaa'y pøn Dios yja' tkaja'gyukiyidip; meetsts mjagyajpīp ja Dios Teety midī jap tsajpjøtpy, ja' ja tnija'wīp pøñi ti mee mga'ejtxīp.

³³ Ja'ats meetsts jawyeen m jotmay'atp sa xpaattit ja Dios kyutujk midī ja tyanitanaapy yjaa'y, jøts nayide'en ja y'ø'y'ajtīn chuj'ajtīn midī yja'ajtpy, mbaatpts meetsts ja yjade'embī pikta'aky tuki'iyi.

³⁴ Paty kidi nugo xjotmay'atti pøñi ti me'emp kida'akp jabom wixøjkp, jabī kø'ømxi ja ñanky'ejxit ñankñijawiyit ja jabomit'ajtīn.

7

Kidi pøn o ti xawindsø'ødyi

¹ 'Kidi pøn nugo o ti xapøky'ejxti, jøts Dios nayide'en mgapøky'ejxidit.

² Nayide'en meetsts Dios ja mdagubatiyit pøñi sa meetsts ja mmīgu'uk xuñ, nay ja'ats ja yik'awetsp.

³ ¿Sudso dø'øñ ja mmīgu'uk pyøky x'ejxpaajtiyi, jøts ja mja' ne'egi xka'ixy kudam ja jawaani møj?

⁴ Jøts, ¿sudsots mets idø'øñ namyikajxibim xkajpx'øyiwyā'añ yam mets ja mdsinaa'yin øy xkayikyø'øy?

⁵ ¡Meetsts win'øø'mbi ataadyi! yik'øyidi jawyeen ja mga'øchinaa'yindi, winetnimts ja mmīgu'uk chinaa'yin xkajpx'øyiyidit.

⁶ Jøts kidi nugo ajawi øy pøn xmo'odi midī ja Dios yja'ajp, kidi jade'en xundi sam uk'otigati nugo ajawi yikmø'øy, ku ja nay ja'ayi m'uktanibidø'jknīyidit, jøts tsojk tatsu'utsa'am m'ukyik'ejxnidit. Jøts kidi

nugo ajawi xukmadowdi Dios kyajpxy pøn tkaja'gyukidip, ku ja nugo t'uk'amnixeknidi t'uktsaachnixeknidi, taxi'iky nugo tjawidi.

Amidowdi pøktsowdi, ixa'adi kugajpxidi øy ma

⁷ 'Amidowdi pøktsowdi, jøts Dios mmo'ojidit; ixa'adi pøni ti mga'ejtxidip, mdukpaadipts meets Dios ja'; uk ku mgugajpxidit muum, yik'awa'atspts øy pøn ja tøjkaaw.

⁸ Ti ja kidyimy'ukyikmøøpy pøn t'amidoop pøn t'pøktsoop, pyajtpy ja' pøn tigati t'ixaapy; uk ku pøn kyajpxwidity kyugajpxi, øy muum yik'awajtsxiyipts ja tøjkaaw ja øy pøn.

⁹ ¿Ti wan meets ja ndejin winaagin pøn y'u'nk y'una'jk tmøøpy tsaa ku ja t'amidøy tsapkaaky?

¹⁰ ¿Uk tmøøpy tsaa'ñ ku ja t'amidøy ajkx tsa'ay?

¹¹ Øyts mee mabaat mjagatyimy'øyjaa'y'atti, mjaajtipts ku xmo'odit m'u'nk m'una'jk midi øy tsuj pidsømp, itits Dios tyungip pø tsajpjøtpyxi ja', myo'opts ja' ja øy'ajtin ja tsuj'ajtin pøni pøn ja amido'oxiyip!

¹² 'Jade'en idø'øn xun'ettit, meets idø'øn ja mmigu'uk mwindsø'øgip sam meets ja kø'øm xjatsøky ja nawyindsø'øgi; kumi yø' idø'øn ja Moisés kyutujk ñi'ane'empy, jøts nayide'en wya'añ ja kugajpxtyøjk ja ñøkyi.

Ja mutsk tøjkaaw

¹³ 'Jap idø'øn mdøkidit ma ja tøjkaaw kadanaxyim midi mutsk midi xu'uts. Møj ñidøjk'aaaw ja', møj ñiduu' ja' midi nøjkxp jap ayodaajkjøtpy manim idø'øn tuki'iyi wyindigøøgyixy, may ja' pøn jap tøjkidip;

14 jøts ja tøjkaaw, jøts ja tuu' midi nøjxpx jap ma tsinaa'yin xemikøjxp nbaajtindit, mutsk ja' xu'uts ja', niwaani ja iidyi pøn idø'øn ja tøjkidip.

Pøni sa wyimbidsimy øy ti, ja'ats tyikwingaxø'kp pøni sa ti y'øyi kya'øyi

15 'Øyim mnay'ejx'etidit, øyim x'ejxtit ja jaa'y pøn win'øø'ndip, ñadyijyi wya'andi jøts ku Dios yja' ja tkajpxidi. Ñadyijyi ja mninijxxyidi amyujy tsaachyujy, ja' y'aawidip yjojtidip ja kubety'ajtin, ja' wyinmaa'ñ'ajttip ja kya'øybi.

16 Ja' meets ja mda'ejxkap pøni ti jaty tyundip, pøni sa jaty y'adø'øtsti; ka'axi uvi tsal'am yikwiduky jam kujp kipkyøjxp, ni iigi tsal'am kyawinaky jam kujp'aagyipkyøjxp.

17 Paty idø'øn ja kipy midi øy, pøni øgyipy ja', nayide'ents tyøøm ja øy tyikpidsimy; midi'its ka'øy, nayide'ents tyøøm ja tyikwingaxi'iky ka'øy.

18 Ka'ap ja øgyipy tyøøm tyikwimbidsimy ka'øy, ni ja ka'øgyipy ka' tyøøm tyikwingaxø'økmi janch øy.

19 Ja kipy midi jaty ja tyøøm ka'øy, jøts kumi nayide'en idø'øn ja kipy kya'øyi, yikpootp ja' jøts ja ñitø'øty jap jønjøtpy.

20 Jade'en meets idø'øn ja jaa'y x'ejxkapt, ja' ja tñigajpxp pøni ti jaty tyundip pøni sa jaty y'adø'øtsti.

Ku ka'ap pøn nugo ajawi tyøkit ma Dios ja kyutujk ja naxwii'ñit jaa'y ttanitani

21 'Pøni pøn jaty øts jade'en nugo xkajpxpatp, jøts nika'ap ja Dios Teety yja' tpaduujniyidi, ja'ats ka' tpaatti ja Dios kyutujk.

22 Ku tpaatt ja'abi tiempi, ku yja'att ja xøøw jumøjt, may øts ja jaa'y xnøjmidit: “Windsøn'ajtim, windsøn'ajtim, ja'ats øøts tø ngajpxwa'kxy mets ja mja', mets køjxp øøts ja jade'en tø nduñ ku øøts ja miku' tø ngajpxpidsimy jøts øøts jaa'y ja ndukmajtstu'uty, jøts ku øøts ja milagri nayide'en may'ojk tø nduñ.”

23 Kuts ja jaa'y jade'en xnøjmit, winets n'adso'ot: “Ka'axi mee mā møøt nnay'ijxy'aty, j'wa'akti ya kidi øts ya xwin'ejxti, ku meets kawine'en tø mgawindiy'aty jøts xundi ja kya'øybi.”

Majtsk jøøjp ja pøch kyojpk

24 Pøñ ø xmimadoop jøts jade'en ttuñ sa nwa'añ, jade'en idø'øñ ja' sam ja jaa'y midi wijy midi tyøjk tkojp tsaagøjxp, tum tsaa ja amuum tyukojpk'ajtpy.

25 Kuts ja tuu myiiñ, jøts ja nøgom pyidi'jky, amuum ja nøø'aaw nøøjoojt kyombejty, jøts ja poj jadi'iñi tyikpojwimbetwani ja tøjck; jøts ja nigidi kyidaay, kumi tum tsaa ja jap wyinaty amuum kyojpk'ajtpy.

26 Pønts ø xkamimadoop ku ka'ap jade'en ttuñ sa nwa'añ, jade'en idø'øñ ja' sam ja jaa'y midi tkaja'gyukip o ti, midi ja tyøjk ojts tkøjy jam pu'jotp.

27 Ku ja tuu ojts myiñ, jøts ja nøø'aaw nøøjoojt kyøømy, jøts ja poj jadi'iñi tyikpojwimbejtñi ja tøjck, ojts ja tøjck kyiday. ¡Adsø'jkibim ja ojts yjanchkujeti!

28 Ku dø'øñ ja nwindsons'ajtim Jesús kyajpx'abajtiy'iñ jøts ja jaa'y janchñigyumaap tja'widøø ja xpøjkin;

29 pø jade'enxi ja yik'ixpikyidi sam o pøn møk'ampy kutujk tjagyepy, ka'ap ja jade'en yik'ixpikyidi sam ja kajpxwejpitøjkti.

8

Ku ja Jesús tyiktsøjky ja jaa'y pyu'uts

1 Ku Jesús chøø'n̄ jam kojpkøjxp jøts kyidaajky, may jaa'y ja ojts pyadsøøñi.

2 Xjats jaa'y ja ojts tu'uk wingon ñinijxxyi, møj pu'uts pa'am ja pøjkip, ja'ats idø'on jam ojts ñagyuxendya'agyï jam nwindson'ajtim Jesús wyingujpk, jøts ja tnimaay:

—Teety, mmøøt'ajtpy ja møk'ajtin jøts xyik-tso'okt, yiktsokts øts mdsojk'ajtingøjxp.

3 Xjats ja ojts ja'ayi tkønixajy, yide'en ja tnimaay:

—Ndsøky'ajtpy øts jøts mdso'okt. Tsokni.

Ja'ayi ja jade'en wyaañ, jøts ja pu'uts pøjkibi jatyi ñajxy ja pya'am, jatyi tyaagyijxy ja pyu'uts.

4 Jøts nwindson'ajtim ja ojts ñii'mxyi:

—Øyim x'ext, kidi pøn xukmadøy; øy ja'ayi xninøjkxt ja teety ja', ja'ayi m'atspaätp jøts ja myøxy ja'ayi xpikta'akt midi ja Moisés ojts tni'ane'emy, jøts ja jaa'y t'ejxtit jøts ku tø mdsø'øky.

Ku ja Jesús tyiktsøjky ja romanit soldadi tyumbi

5 Xjats ku ja Jesús kyajptøjkiyi'n̄ ma ja kajp jam txøøwi Capernaum, jamts ja tu'uk ñimejni ja romanit jaa'y midi wyinaty tniwindsøn'ajtp nidukpiky ja soldadidi, ja'ats ja møk'ampy nimaajyøø,

6 yide'en ja wyaañ:

—Teety, ixajp øts tu'uk ndumbi pa'am tmigo'kni ndøjkjøtpy, jadi'iñi tø myujkni xyujxni, yjanchkupiikpy idø'øn ja jap ja jayyi tøøyi.

⁷ W̄inets ja n̄windsøn'ajtim Jesús ja tn̄imaay:

—Øy øts ja n'atsyiktso'okt.

⁸ Jøts ja jaa'y yide'en y'adsowimbijty midi idø'øn twindsøn'ajtp nidukpiky ja soldadidi:

—Teety, ka'ap ø xpaat'aty jøts mets mdøkit ndøjkjøtpy; ana'am ja'ayi jøts cho'okt øts ja ndumbi.

⁹ Nayide'en øts ane'emy n'ity, nay jats øts ndumbimi midi ø n'ana'amp. Ku øts nidu'ugin nnøjmidi, nøjkx, nøjkpts ja jatyi; uk nnøjmits øts jadu'uk jøts mye'ent, mempts ja jatyi; uk nduktunwa'añ øts ja ndumbi øy ti pøn øts jadi'iñi ñiyiktumpy ndøjkjøtpy, tyumpts ja' pøni sa øts ja n'ane'emy.

¹⁰ Xjats ku Jesús ja jade'en tmadøøy, ñigyumaap ja tja'wiyii'ñ, jøts ja tn̄imaay pøn jaty ja jam wyinaty payø'øyiyip:

—Janch øts idø'øn nwa'añ, ni Israelit jaa'y øts ya ma jade'en ngapaadynim sam ya'at jaa'y tmøødin ja janchja'win møk'ampy.

¹¹ Øts idø'øn wamp jøts ku may nayjade'embi jaa'y øy madsoo choondit, jøts møøt jujky'ajtpi y'ixa'aktit ja Abraham, ja Isaac jøts ja Jacob; yik'ejxti jap ma Dios kyutujuk ttanitani ja yjaa'y;

¹² Jøts pøn japaat'ajtidip jøts ja yjap'attit ma Dios kyutujuk ttanitani ja yjaa'y, yikajxpidsø'ømdipts ja jap jøts ñøjkxtit ma kube'ets kugoots, jøts ja jap chabaawidettit y'amdøtskaattit chaachtøtskaattit.

¹³ Jøts idø'øn ja n̄windsøn'ajtim Jesús tn̄imaay ja jaa'y midi tn̄iwindsøn'ajtp tukpiky ja soldadidi:

—Nøjkn̄i mdøjkw̄indum, jøts s̄a tø xjanchjawi yiktu'umpts ja jade'en.

Jøts ja tumbi nay jatyi myøkp̄ijky.

Ku ja Jesús tyiktsøjky ja Pedro tyaakmøjt

¹⁴ W̄inets ja Jesús ojts ñijky Pedro tyøjkw̄indum, jøts ja jam ojts tpaajti ja tyaakmøjt, jøts kudam ja møk jømba'am ja jam tmigo'kni.

¹⁵ Ojts ja tnixaji kyø'køjxp, jøts jømba'am ja ojts jatyi ñiwa'achiyi; ojts ja jatyi wya'kuki jøts ja nay jatyi wyindsø'jkidyøjkiyidøø.

Ku ja Jesús tyiktsøjky ja maabyamaa'y

¹⁶ Xjats ku kyoodsiyii'ñ, jøts ja nwindson'ajtim Jesús may'ampy ja jaa'y yiktan̄imiiñ midi ja miku' wyinaty tø tyatøkiyidi; jøts ja ojts ja'ayi tuk'aaawyi tmigajpxy, ja'ayits ja tyuktapidsøøm ja maamyiku' jøts ja tyikmøkøpkijxy niduki'iyi ja pamaa'y.

¹⁷ Jade'en'ampy idø'øn ja jade'en yjajty, jøts idø'øn ja jade'en tyimyjaty s̄a wyinaty tø tñigajpxy ja kugajpxy Isaías, ku ja yide'en wyaañ: “Ja' tuki'iyi tmidanaagyøjxp adøm n'ayo'on, nay ja' tmidanaapy adøm ja nbøjkin n'aa'nin.”

Ja jaa'y midi wyinaty tpawidetwamp ja Jesús

¹⁸ Xjats ku ja nwindson'ajtim Jesús ojts t'ixy ku mayjaa'y ja yjanchtamujkniyi, w̄inets ja ojts wyaañ jøts ttanaxtit ja nøø jøts ñøjkxtit jam jaduktamajñ.

¹⁹ W̄inets tu'uk ja kajpxwejp̄i myiiñ mā ja Jesús jam wyinaty, jøts ja Jesús ojts yiknøjmi:

—Windsøn, tsoomp øts, nbanøjx̄p mets øy madsoo pøni mā me mnijky.

20 Jøts ja nwindson'ajtim Jesús y'adsøø, yide'en ja wyaañ:

—Ne'egi jaa ja waajx yjut, ne'egi jaa ja joon pya'an; øtsts, niti ø xka'ejtxi øyik øts idø'on ma n'øøni'int.

21 Xjats ja jaa'y jadu'uk wyami midi ja wyinaty pyabøjkpi'ajtpy, yide'en ja ñimaajyøø:

—Windsøn'ajtim, tniykxy øts jawyeen ja ndeety t'atsyiknaxøki.

22 Winets ja Jesús y'adsøø y jøts ja wyaañ:

—Møødik øts, majtstu'ut yø oo'kpi, wan ja tykipidø'økti ja myi'oo'kpi pøn y'anmija'win jajujkyi tø tyik'oo'knidi.

Ku ja Jesús tyiknajxy ja møk poj jøts ku ja tyik'amøkiy#ñ ja mejy

23 Jøts ja nwindson'ajtim Jesús tyøjkiñaã jam barkijotp møøt ja pyabøjkpitøjk.

24 Winets ja poj møk'ampy yjantyimyiiñ jam mejyjotp, jadi'iñi ja nøø yjanchtojmjø'kni jøts jap barkijøtpy yjanch'ayø'øyiini. Maapts ja nwindson'ajtim Jesús wyinaty.

25 Winets pyabøjkpitøjk ja ojts yuxyiyi, yide'en ja ojts ñii'mxyiyi:

—iWindsøn'ajtim, ejx øø nnøøjøø'kxni, yiknitsok øøts! iPø nøðøjkij'adøjtsnampts!

26 Jøts ja t'adsøø yide'en:

—¿Ti mdsø'jkidip ku mdsø'øgidi? iJanch yii'nim meets ja janchja'win xmøøt'aty!

Xjats ja tyanaagyukiyi'ñ, jøts ja ojts tnøjmi ja poj jøts wan tnaxy jøts ja mejy kya'uk'adøtsnit; jøts idø'on ja jadi'iñi myøøñ, nayide'en jotkujk'atyim tyaañ sam idø'on ku ja et kypøjy.

27 Jøts ñigyumaap ja tyimyja'widøø, nømdip ja':
—¿Ti pøn jaa'y yø jade'en, mimadoojipaät poj
yø', mimadoojipaät mejy yø'?

Ja Gadarit jaa'y pøn wyinaty ja miku' tø tyatøkiyi

28 Xjats ku ja nwindson'ajtim Jesús
yja'jty jaduktamajñ mejy'agø'øm, jamts
ñaxwimbidsømdøø Gadara y'etjotpti, winets
jaa'y namajtsk pyidsømdøø jam kamisantijotp
ma oo'kpi ñaxøkidi, jøts ja ojts tñimendi ja
nwindson'ajtim Jesús. Miku' ja wyinaty tø
tyatøkiyidi tum jade'en ja namajtskti, janch
tyimgyubetyts idø'øn ja'adi, ka'ap idø'øn ja jam
øy pøn tkunaxi jam tuu'am.

29 Jøts ja yjanchabaabinaxwa'aktøø:

—¿Ti øø xanibøjkip, ti tsepxik adøm njagyejpyim,
mets Jesús, mets Dios U'nk? ¿Ja' mets ya tø xnimiñ
jøts øøts icyamyi xtyimyk'ayo'ombaatwangøjy?

30 Nay jamyits idø'øn wingon wyinaty
y'ojkwidejtmidi maagyuch;

31 winets ja miku' nuu'kxaajkingøjxp
t'amidoodøø ja Jesús, yide'en ja tñimaadyøø:

—Pøni xyikpidsømwamp øøts, wants øøts yø'
kuch ttatøki.

32 Xjats ja Jesús wyaañ, yide'en ja tñimaay:

—Nøjkxti.

Jøts idø'øn ja miku' jade'en pyidsømdøø, ojts tma-
jtstu'utti ja jaa'y jøts ja maagyuch ja ttøjkidyøø;
winets ja kuch niduki'iyi yjanchnabyagunajxidøø
jap jaa'jotpy jøts ñaxkidaktøø jap nøøjotpy, japts ja
ñøøjøø'kxkøjxtøø.

33 Jøts ja jaa'y midi wyinaty kuch'ejxtip, ojts
ja kya'akti, janch tsø'jkidip ja', jøts ku ja jam

kajpjotp yja'ttøø, jamts ja tuki'iyi tñimadyakøjxtøø sa wyinaty ja jaa'y tø yjatti kyubatti pøn ja miku' wyinaty tø y'uktatøkiyidi.

³⁴ Winets ja jaa'y niduki'iyi cho'ondøø pøn jaty jam wyinaty kajpjotpti, jøts ja ojts ñøjkxti ma ja Jesús jam wyinaty; kuuyits ja ojts t'ejxti, jøts ja tñimaadyøø møk'ampy jøts ja jam tyimbyidsø'ømt ja' y'etjotpti.

9

Ku ja Jesús tyiktsøøjky ja køxujxpi pakxujxpi

¹ Xjats ja Jesús tyøjkiyi'ñ barkijotp, jøts ja ojts ñijxxy jam jaduktamajñ, ojts ja ñøønaxy jøts ja yja'jty kyajpkøjxp.

² Jamts jaa'y ja ojts tu'uk yiktaniniijxxy midi køxujxp pakxujxp, ki'iy ja jam ojts tyiknøjkxti. Jøts ku dø'øn ja nwindson'ajtim Jesús ojts jade'en t'ixy ja jaa'y jøts kudam ja møk'ampy ja janchja'win tjanchmøødidi, jøts ja pamaa'y ja tñimaay:

—Kidi u'nk nugo mdyimyjotmay'øøky; nbo-jkpimee'kxpy mets.

³ Winets winaagin ja kajpxwejpitøjk wyinmaadyøø jøts ja wyandøø: “Dios yø jade'en kya'ømyigajpxpy, pø nugo jaa'yxi yø'.”

⁴ Jøts kumi wa'ats ja nwindson'ajtim Jesús ja tñijawi sa jaty ja wyinmaydi, jøts ja tñimaay:

—¿Tigøjxp ku jade'en ka'øwyinmaa'ñ xjagyapti?

⁵ Ja ti ne'egi jawaani jajtni, kuts yø pa'amjaa'y nnøjmit: “Nmee'kxpy øts yø mbøky”, uk ku nnøjmit: “Wa'kuki, pøkmukni yø mmaabajt jøts nøjxni mdigam”?

⁶ Ixyamnīm meēts inet x'uk'ext mābaat øts idø'øn ja møk'ajtīn nmøøt'aty yā naxwiiñ jøts ø nmaa'kxt ja pøky.

Xjats ja tnīmaay ja køxujxpi pakxujxpi:

—Pidø'kni wa'kukiñi, wejtsjø'øk yø mmaabajt jøts mnøjkxnit mdigam.

⁷ Winets ja pamaa'y jatyi wya'kukiyi'ñ jøts ja ojts ñijky jam tyøjkwindum.

⁸ Kuts ja mayjaa'y ja ojts jade'en t'ejxti, xjats ja yjancho'jkiñidi, winets ja tja'myajtsti ja Dios jøts ja tmøja'widøø tkunuu'kxyja'widøø, ja'agøjxp ku ja jade'en t'ejxti jøts kudam ja Dios Teety myøk'ajtīn tmøøt'ajtti, pø niñugo jaa'yxi ja ttejti.

Ku ja Jesús tpawaay ja Mateo

⁹ Xjats ja nwindson'ajtim Jesús jam ojts chøøñ, jøts ja ojts t'ejxpaaty tu'uk ja jaa'y pøn txøøw'ajtp Mateo, jam ja wyīnaty chøøni mā ja yikugubajtpi y'ixa'akti, jøts idø'øn ja tnīmaay:

—Mada'ak, møøt widetk øts.

Winets ja Mateo tyanaagyukiyi'ñ, jøts ja ojts pyadsøøñiyi.

¹⁰ Ku wyīnaty ja nwindson'ajtim Jesús jam kyay Mateo tyøjkjotp, winets ja mayjaa'y jam mendøø pøn yikugubajtip, møøt ja'adi pøn ka'øy jaa'y yiktejtip. Ja'ats idø'øn ojts yjam'atti, jøts ja tmøøt'ixaktøø jam kaadyaajk windum møøt ja Jesús jøts ja pyabøjkpitøjkti.

¹¹ Ja'ayi ja fariseotøjk ja ojts jade'en t'ejxti, xjats ja nwindson'ajtim Jesús pyabøjkpitøjk yik'amidoodøø:

—¿Tigøjxp ku yø mwindsøn tmøøtkay yø yikugubajtpitøjkti møøt yø kawīndiyjaa'dyi?

12 Ojts ja nwindson'ajtim Jesús ja tmadøy, xjats ja kò'òm tnimaay ja fariseotøjck:

—Pøn mòk pøn kasajajtip, ¿ti ja tyikwa'andit ja tsøøyibi? Ja' ja ttsojktip pøn pøjkidip.

13 Kidi ja'ajip ø tø nnimiñ pøn øy pøn wa'atsti, ja' ø tø nnimiñ pøn pøkyundip jøts ja chinaa'yin tyiktigatstit. Nøjckti jiwa'akti, pamaadyi padajti pøni ti dø'øn tyijpy ya'at Dios kyajpxy: “Ja' ø ndsøjckpy jøts xmøøt'attit ja pa'ayo'owin ja ayo'ejxin, jøts ne'egi kidi xyik'ookti yø jiyujk yø tsakaa midi jaty myojxtip.”

Ku ja Jesús yiktibyijky tigøjxp ku ja kya'ayuu'atti

14 Winets ja Juan Bautista tyumbi myendøø ma ja nwindson'ajtim Jesús jam wyinaty, jøts ja ojts tyiktøwdi, yide'en ja tnimaadyøø:

—¿Tigøjxp ku øø n'amaay'aty møøt ja fariseotøjckti, ngakay nga'uuky øøts jøts mets yø mbabøjckpitøjck jaayi yjanchkaydi yjanchjøø'ckti, niwine'en kya'amaay'atti?

15 Xjats ja nwindson'ajtim Jesús y'adsøøy jøts ja tnimaay:

—¿Ma meets jade'en tø x'uknijawi jøts ku tø'øxñigaabyi tø'øxñi'ukpi winet y'amaay'atti winet kyakaydi kya'uukti ku ja jemyaay'jamni? Abikñimts ja tiempi tyimyja'tmit ku ja jemyaay'wyinaty kya'uk'ejtni ku ja jam wyinaty tø cho'oni, jaanims idø'øn tiy pøn kya'ukaañit kya'uk'uknit; jaanim idø'øn ja y'amaay'attit.

16 'Ka'axi pøn wyetpach tta'agiyi jemwyet midi tyimyjemñim, ku ja jade'en yiktu'unt jøts kumi mujkpi ja jemwyet jøts ja tjaaktyimgyøø'tsni ja wetpach, jaaktyimyiwenip ja kyøøts'ajtin ja'.

17 Jøts nayide'en ka' y'øyi jøts yikpikta'akt ja vino jap po'dukjōtpy midi namii'kxñim; ku ja jade'en ndu'unint, takøø'tsipts ja po' jøts jade'en nugo wyindigøy, windigøopy ja po' jøts nayide'en ja vino. Paty ja vino midi namii'kxñim nda'ada'amyin ja jembyo'ak jøts jade'en nimidi kyawindigø'øty.

Ja Jairo ñøøx, jøts ja tø'øxyøjk pøn ja Jesús ja wyet ojts ttojni

18 Ixam idø'øn ja nwindson'ajtim Jesús jade'en wyinaty wya'añ, ku yja'jty tu'uk ja windsøn pøn tnigubajk'ajtip ja israelit jaa'y, jøts ja ojts ñagyuxendya'agyi yi ja' wyingujkp, jøts ja ñimaajyøø:

—Tø øts nnøøxu'nk y'øøky tyimy'ixanim; kudsik mets inet ja'ayi mme'ent jøts waani xkønixajt, jukpyøjkp inet ja jadigojk.

19 Xjats ja nwindson'ajtim Jesús wya'kukiyii'ñ jøts ja ojts tmøødi ja jaa'y møøt ja pyabøjkpitøjk.

20 Winets tu'uk ja tø'øxyøjk myiiñ jam nwindson'ajtim Jesús yjixkø'øm jøts wyet pa' ja ojts yiktøñ. Myakmajtsk jumøjtíp idø'øn ja wyinaty tø pyaajtniyi ja taxnaxyi jøts ja jadine'en tmi'ity;

21 jøts kumi yide'en idø'øn ja wyinmay: “Ja'ayik øts ja wyet inet yø ndojnit jøts øts inet ndso'okt.”

22 Jøts ja nwindson'ajtim Jesús ojts wya'kjimbity, ojts ja tyimy'ixy ja tø'øxyøjk jøts ja tnimaay:

—Kidi u'nk mdsø'øgi; ja'agøjxp tø mdsø'øky ku ø tø xjanchjawi.

Jøts idø'øn ja nay jatyi myøkpjky.

23 Kuts ja nwindson'ajtim Jesús yja'jty jam israelit windsøn tyøjkwindum, jøts ojts t'ixy ku ja

xuxpi ixapnidi, ja oo'kpi ja yikpidø'økwandip, jøts ja mayjaa'y xem yam yjanchya'a_xti,

²⁴ xjats ja tnimaay:

—Pidsømdi; ka'ap yø kiixyu'nk y'øøgyi, maap yø ja'ayi.

Jøts ja yjanchyiknixijkxy ku dø'øn ja jade'en wyaañ.

²⁵ Kuts ja tyikpidsømgijxy ja mayjaa'y, winets ja tyøjkiyii'ñ jøts ja ojts kyø'køjxp tmach ja kiixyu'nk, jøts ja nay jatyi pyidi'jky.

²⁶ Jøts idø'øn ja jam jade'en øy mā yiknija'wiyii'ñ ja kajpxy ja ayuujk midi wyinaty tø tyuñi.

Ku ja Jesús tyikwin'ejxwa'kxy ja winap jaa'y

²⁷ Kuts ja nwindson'ajtim Jesús jam chøø'ñ, winets ja winap jaa'y namajtsk tuu'ajy pyadso'oniyi, møk ja yjanchnømdi:

—iRey David me m'ap'ajtip, ayo'ejxk øøts!

²⁸ Kuts ja Jesús tyøjkiyii'ñ jap tøjkjøtpty, winets ja namajtskpi winap jaa'y ñimejni, xjats ja tnimaay jøts ja ttiibyijky:

—¿Mwandip idø'øn amumjoojt jøts ku øts yø yjade'embixma'aty?

Jøts ja ñømdøø:

—Windsøn'ajtim, wamp øøts idø'øn jade'en.

²⁹ Winets ja nwindson'ajtim Jesús ja mimøj twingudo'oniyii'ñ, yide'en ja tnimaay:

—Wan idø'øn jade'en tjaty pøni mabaat mee nayide'en ja mjanchja'win xmøøt'aty.

³⁰ Jøts wyeen ja øy tyandøø, ojts ja wyin'ejxpøkti. Jøts ja nwindson'ajtim Jesús ja møkta'aky tnimaay:

—Øyim mnay'ejxidit jøts kidi pøn xuknijawidi.

31 Jøts ja'ayi ja jap ñibyidsømdøø, ojts ja tñimadyakøxti sa nwindson'ajtim Jesús ja wyinaty tø yikmøkpikyidi, ojts ja tñimadya'akti øy maḍsoo wine'enin ja et jam.

Ku ja Jesús tyikajxpiky ja uum jaa'y

32 Kuts ja jam wyinaty wya'kpiḍsømdi, winets winaagin ja jaa'y ttanimendi ja nwindson'ajtim Jesús tu'uk uum jaa'y, miku' idø'øn ja wyinaty mi'ejtjyip, ja'ats ja ka'ukyikajpxniyip.

33 Ja'ayits ja nwindson'ajtim Jesús tyikpiḍsimy ja miku', jøts ja uum jaa'y jaty jadigojk y'awijy. Jøts idø'øn ja mayjaa'y ñigyumaap yjajtøø, yide'en ja wyandøø:

—Ka'anim ya Israel pøn jade'en t'ijxñim sam ixyam yik'ijxyin.

34 Ja fariseotøjkti yide'en ja wyamidi:

—Jade'en'ampy yø jaa'y tyikpiḍsimy yø miku' ku yø nayi' wyindsøn myøk'ajtin tyiktuujniyi.

Ku ja Jesús t'ayo'ijxy ja mayjaa'y

35 Widejtp idø'øn ja nwindson'ajtim Jesús øy maḍsoo wan tkamjotpi wan tkajpjotpi, jøts ja yik'ixpiky ma jaty ja tpaaty ja tsaptøjk kajp kajp. Ja Dios y'øgyajpxy y'ømyadya'aky ja kyajpxwa'kxip sa ttanitaniit ja yjaa'y, jøts ja tyiknaxy øy ti pa'am, øy ti pøjkin aa'nin.

36 Ku ja ojts t'ixy ja mayjaa'y, jøts ja ojts t'ayo'ixy ku ja tsaach'ijxyimdi, janchjotmay'oo'ktip ja', nugo ja jadi'iñi myondi tyukti, jade'en ja yjawi yjajtnidi sam borreek ñi'ejxpi kya'ejtxiyidi.

37 Xjats ja tñimaay ja pyabøjkpøjk:

—Janch øts idø'øñ nwa'añ, ku ja jaa'y may pøn tñijawiwyañdip ja Dios yja', jats ka'ejtíp pøn ttukmadowidip.

³⁸ Paty x'amido'odit ja Dios Teety jøts ja tyumbi ttanigaxt ja'abi jaa'y.

10

Ku ja Jesús twiwijch ñimakmajtsk pøn wyinaty kyudanaaby'atwampy

¹ Xjats ja nwindson'ajtim Jesús tyaxmuiky ja pyabøjkpitøjk midi ñimakmajtskti, jøts myøk'ajtin ja ojts tmø'øy, ja'ats ja ttuktabidsø'ømdit ja miku' jøts ja tyikmøkpøktit pøn øy tigati pa'am pøjkidip.

² Yide'en idø'øñ ja ñimakmajtskpi pabøjkpitøjk ja xyøøwdi: tu'uk Simón txøøwi, nayi yiktejp ja Pedro, jøts ja y'uch txøøwi Andrés; Jacobo møøt ja' y'uchmi midi txøøw'ajtp Juan, ja Zebedeo y'unajjk;

³ Felipe, Bartolomé, Tomás, jøts Mateo ja yikugubajtpi; jøts ja Alfeo myajnk pøn txøøw'ajtp Jacobo; jøts Lebeo pøn nayi yiktejp Tadeo;

⁴ jøts jadu'uk Simón cananista; jøts ja Judas Iscariote pøn tñankmyajtsip ja nwindson'ajtim Jesús.

Ku ja Jesús tkexy ja pyabøjkpitøjk kajpxwa'kxpi

⁵ Yide'en ja nwindson'ajtim Jesús t'ane'emy ja ñimakmajtskpi pabøjkpitøjk ku ja ojts tkajxtsøø'ñ:

—Kidi jam etjotp mnøjkxti ma chøønidi pøn ka'israelit jaa'dyi, ka'abaat mnøjkxtit ma jaty ja kajp jam Samaria;

⁶ ja'ayi mee mninøjkxp midi ya Israelit naxjøøjty, ja' idø'øñ ejtnidip sam ja borreek tyigøydi.

7 Nøj̄kx xkajpxwā'kxti jøts ku Dios kyutujk wyingōñ̄ midi ja tyanitanaapy yjāā'y.

8 Yiktso'okti pōn pøjkip ja møk pu'uts pa'am, jøts pōn tigati jajt̄idip, yikjujkyøkti ja oo'kp̄idi, jøts kajpxp̄idsømdi ja miku' jøts tmajtstu'utt ja jāā'y. Meets idø'ōn yø yjade'emb̄i møk'ajt̄in tō mniyikmø'y; nayide'ents xyiktunkpaatt̄it sam tō myikmo'odi.

9 'Kidi ti meeñ̄ xkondi, ni oori, ni plati, ni cobre,

10 ni pejnbaat̄ xkawetst̄it. Mn̄imdajk niti xkako'ondit, tu'ugyi mwet xminøj̄kxtit̄ midi ixja mwet'ajtt̄ip; tumbixi mnøj̄kxti, mgaabyaātp̄ meets.

11 'Ku øy mā mja'att̄it wan tkamjotpi wan tkajpjotpi, jamts x'ixa'adit tu'uk ja jāā'y midi nijāwi, midi tsoj̄kp̄ ja Dios yja', ja' tyøj̄kjotp̄ mja'da'akt̄it kunim̄ mdsoondit̄ jam kajpjotp̄, winetnimts̄ jam mbidsø'ømdit̄.

12 Ku mdøk̄idit̄ tøj̄kjotpy, kajpxpoo'kxti ja jāā'y.

13 Pōni m'adsoj̄idip ja jāā'y, øy'ajtp̄; kuts ja ka' t'adsoj̄imbity, majtstu'utt̄its ja'.

14 Jøts ku pōn mgagupøk̄idit̄, uk ka' paat̄ tmad-owa'andi pōni s̄a me mjawa'añ̄, p̄idsømdits̄ jam ja'abi tøj̄kjotp̄ uk ja'abi kajp̄. Winapti ja pu'ux̄ midi jam mdekyøj̄xp̄, jøts jade'eñ̄i xuk'ejxt̄it̄ jøts ku jade'eñ̄i tō mnañ̄iwa'ach̄idi.

15 Øts idø'ōn wamp̄ ku wyinaty yja'aty ja t̄idyu'unin, ne'egi kajaa yø yjade'emb̄i jāā'y ja ayo'on tyimbyaatt̄it, jøts nigidi jade'en y'ayo'ombaatt̄it ne'egi ja kaw̄indiy jāā'dyi pōn jam tsinaadyøø jam Sodoma jøts jam Gomorra.

Ku ja yiknigajpxy jøts ku ja pabøj̄kpitøj̄k yikmatswa'andit̄

16 'jØyim xmodo'odit jøts xnijawidit jøts ku meets jam nguexy ma ka'ap nugo ajawi øy pøn tyøki! Mjadyimñay'ejx'etidip, yikxonim mnañiwijy'atidit, kidi øy ti xtsepøkti, yujy kø'øm mnabyikta'agidit.

17 Øyim x'ejxtit, øyxi dø'øn jaa'y mgøyakidit ma kudunktøjk jamdi, jøts myikwinwoptit myikjøpwoptit jam tsaptøjkjotp.

18 Myiknøjkxi paat meets ja jaa'y jam ma jaty ja møj windsøn yikutukti, ja'agøjxp ku øts nja' xpabøjkidi; jats idø'øn ja ñibidsømit jøts meets ja xukmado'ot pøni sa øts idø'øn ja n'ixpøjkin, ja'abaat meets xukmado'odit pøn ka'israelit jaa'dyi.

19 Kuts myikøyaktit jam kudunk wyindumdi, kidi xkumayjawidi, kidi meets ja xpamaañi xpadajni pøni ti dø'øn jam mgajpxtip, uk pøni sa dø'øn jam mwa'andit; ja'ayi ja y'ukja'att pøni juuni dø'øn mgajpxtit, nagyø'ømts Dios mmo'ojidit ja ayuujk pøni sa dø'øn mwa'andit.

20 Kidi meedsipxi ja mmiwinmaa'nbyaatp ku mee mgajpxt, pø ja Dios Teetyxi y'Espiritu Santo myikajpxidip.

21 'Jade'en nøjkx jaty kyubety pøni pøn øts nja' wyinaty xkupøjkiyip, jøts ja myigu'uk paat ja tyamidsepøkit jøts ja tnankyik'oogit, jøts ja u'nkteety jøts ja u'nktaak nayide'en ttumidit ja y'una'jk nay ja'agøjxp ku øts nja' janchpabøjkidi nidu'ugin; jøts ja u'nk una'jk nayide'ents ttumidit ja tyety tyaak, tyik'ooktit paat ja'adi.

22 May jaa'y mee mmi'akiyip mmi jotma'adiyip ja'agøjxp ku meets nja' xpabøjkiyi; pønts

tmidanaapy øy wine'en paat, ja yjade'embì jaa'yts idø'øn nitso'ok'atp.

23 Ku myiktabawidetit ja kipy ja tsaā, kaknøjkxtits mā kajp jam jadu'uk; øts idø'øn wamp, jøts ku øts wyinaty jawyeen tø nmeni yamnim meets ja kajp xka'ayø'øy'abidsømdi midi jaty ja israelit jaa'y kyajp'ajttip.

24 'Ka' pøn ixpøjkpi tjaaktyimyjinaxy ja mya'estri, jøts ni ja tumbi tkajinaxy ja wyindsøn.

25 Tyajotkujk'attip idø'øn ja ixpøjkpi, janch møj idø'øn ja wyinaty ku yja'attit jade'en sam ja mya'estri, jøts ja tumbi sam ja wyindsønin. Pøni miku'dam ø nyiktijy ku mee nniwindsøn'aty, ¿tits meets mdsow, ti meets jade'en mjaakayiktejp?

Ja' midi yiktsø'øgip

26 'Paty ka' pøn xtsø'øgidit. Ka'axi ti kyanigaxi'iky øy pøn ti tjadyimy'ama'atsk'aty, ka'ats ja kyayiknijawi øy pøn ti tjadyimy-jayu'uch'ity.

27 Pøni ti mee nda'agajpxip, tukmadowdits meets ja jaa'y ja'; nigajpxtits ja yikxon pøni mā x'a'ejxidi myikmadowdi ømyadsowi.

28 Kidi yikjaa'y'oo'kpi xtsø'øgidi, pø ka'axi anmija'win ja tjadyimyik'ookti; ja Dios ja' idø'øn tiy ne'egi mdsø'øgidip, pø ja'axi møk'ajtin tjagyajp jøts ja jaa'y tyikwindigøy møøt ja y'anmija'win jap ayodaajkjøtpty.

29 'O dø'øn ja joon mabaat kyidyimchobaaty, nayide'en idø'øn ja Dios Teety ja t'ejx'ity. Ni tu'ugin ja kyawindigøy pøni ka'ap ja kø'øm tyikutuky.

30 Tu'uk tu'uk meets mwaay machøy y'ity.

31 Kidi mdsø'øgidi, ne'egi jawaani jinaxy mee mnibayø'øyi, ɷti ti meets mdsow, ti sa ja mayjoon chobaaty?

Pøn tmøjpiktaktip ja Jesucristo jam mayjaa'y agujkp

32 'Pøn jaty ø xpukajpxip, pøn wamp mayjaa'yjøøjtj jøts ku øts ja xpabiky, nayide'ents øts ja møk nnitanit jam Dios Teety wyingujkp pøn jap tsajpjøtpy.

33 Pønts ø xkabukajpxip, pøn wamp mayjaa'yjøøjtj jøts ku øts ja ka' xpabiky, nayide'ents øts ja niwine'enin nga'ejxjimbett, niwine'enin nganitanit jam Dios Teety wyingujkp.

Jesús køjxp ja jaa'y ñawya'kxyidi

34 'Kidi mee mwani jøts ku øts jaa'y kuwani xtyimyjatyajotkujk'attit, pø may idø'øn ja nøjkkx kyanachokidit øts køjxp.

35 Jade'en ja tpatni jøts jaa'y ja y'u'nk y'una'jk y'ukmidsepøjkniyit, ja u'nk ja xa'kxy ja u'nk ja nøøx ñamyatsidit;

36 tukmigu'uk ja jade'en y'uknamyidsepøjkniyidit.

37 'Pøn tyeety tyaak jawaani tyikmøjtøjkip sam ø ka'ap xmøjpikta'agyin, ka'ap øts ja mibaat nja'aty; jøts nayide'en pøn y'u'nk y'una'jk jawaani tyikmøjtøjkip jøts nigidi ka'ap øts, nayide'en øts ja ka'ap mibaat nja'biky;

38 jøts pøn ø xkagu'ayo'ombaadiwyamp ku jaa'y yik'ookwa'anit, jøts øts ja nja' jade'en xkatunwajni, ka'ats øts ja mibaat nja'bøkt.

³⁹ Pøn kasajatyim nay'ejxip, pøn nabya'ayojip, ka'ap ja mibaat ja nitso'ok'ajtin tpaaty; pønts kanabya'ayojip wan tjaty sa yjaty øts køjxp, ja'ats idø'øñ tpaatp ja nitso'ok'ajtin.

Ja may'ajt

⁴⁰ 'Ja jaa'y pøni pøn mgupøjkidip, øts idø'øñ ja wyinaty jade'en xkupøjktip; jøts pøn øts jade'en xkupøjkp, ja'ats ja nayide'en kyupijkpy pøn ø xkajxp.

⁴¹ Pøni pøn tkajpxkyupøjkp ja Dios kyugajpxy, jøts kumi Dios ja kajxip, nayide'en ja jaa'y yikmay'att sam ja Dios kyugajpxy yikmay'atyn; jøts pøn tkajpxkyupøjkp ja øyjaa'y ja'agøjxp ku y'øyjaa'y'aty, nayide'en ja yikmay'att sam ja øyjaa'y yikmay'atyn.

⁴² Jøts pøn ø xmøøjyip ja n'u'nk n'unajk øy tukvasin ja tsujk nøø jøts kumi øts ja nja'ajtpy, jøts janch øts idø'øñ nwa'añ ku ja nayide'en yikmay'att.

11

Ja jaa'dyi pøn ja Juan Bautista ojts tkexy

¹ Xjats ku nwindsøn'ajtim Jesús tta'ana'am'abajtiyii'ñ ja nimakmajtskpi pabøjkpitøjk, winets ja ojts chøøñ, jøts ja ñijkxy yik'ixpøjkpi kajpxwa'kxpi ma jaty ja kajp jam ja'abi etjotp.

² Jøts ja Juan Bautista, ku ja jam wyinaty puxøjkjotp, jøts ja tnija'wiyii'ñ ti jaty wyinaty tyump ja Cristo ja yiknitsokpi, winets ja tkejxy namajtsk ja pyabøjkpi jøts ja t'ats'ejxtit ja nwindsøn'ajtim Jesús,

3 jøts ja t'atsyiktø'ødit yide'en:

—¿Mjanchjacristo mets idø'øñ, ja yiknitsokpi midi tijy menwamp, uk njøp'ejxp øøts idø'øñ jadu'ukpi?

4 Xjats ja nwindson'ajtim Jesús y'adsojimbijty:

—Nøjkxti jøts jade'en xukmado'odit ja Juan sa jaty ti jaty m'ejxtip mnija'widip.

5 Tamimadya'akti sa winap jaa'y wyin'ejxwa'kxti, sa pakma'at jaa'y yø'øyjø'økti, sa yø pu'uts pøjkibi cho'økti tuki'iyi, sa nat jaa'y myadoobøkti, sa oo'kpi yjujkpyøkti, jøts sa ayoobi jaa'y ja Dios kyajpxy yiktukmadowdi.

6 Nekim ja'adi pøn tu'ugyi ja janchja'win tmøøt'ajttip, ka'ap winguwopi jøpkuwopi tmijattit ku ø xjanchjawidi.

7 Ixanim idø'øñ ja wyinaty tyimchoondi ja Juan Bautista yjaa'y midi ja pyabøjkpi'ajtpy, ku ja nwindson'ajtim Jesús tnmadyaktøjkijyi'ñ ja Juan, yide'en ja tnimaay ja mayjaa'y:

—¿Ti ojts x'ejxti jam abak etjotp ku jam ojts mnøjkxti? ¿Ojts meets jam yjaw x'ixy tu'uk ja jaa'y midi jade'en jajtp sam kapy pyojimbity pyoj'adijy? Pø ka'axi, pø tu'ugyixi ja tmi'ity ja wyinmaa'ñ.

8 ¿Tits idø'øñ ojts x'ats'ejxti? ¿Uk ojts x'ejxti tu'uk ja jaa'y midi janchweti janchnaamyi, midi janch tsuj ja wyet tø tyikpety? Pø wa'atsxi xnijawidi pøn jade'en naxyojxidip jøts ku ja jam ñachøkyidi ma ja windsøndøjk jam chøøñidi.

9 ¿Tits inkwan idø'øñ mjantym'ats'ejxtøø? ¿Tu'uk ja Dios kyugajpxy? Janch ja'ats idø'øñ pøn jawaani tjaaktyimyøj, nigidibaat ja yjadu'ukpi jade'endi.

10 Ja Juan idø'øñ jade'en yiknigajpx ku wya'añ Dios kyajpxy yide'en:

Ngajxjawyenip øts, u'nk, ja ngugajpxy tu'uk,
jøts ja jaa'y ja wyinmaa'n ja tyiktøøjit tyiktu-
udaajkit, jøts mets ja m'ixpøjkin yikjøp'ext.

¹¹ Tyii'byi øts idø'ø'n nmadya'aky, jøts ku ka'ap
jade'en pøn myajada'akñim Dios kyugajpxy sam
ja Juan Bautista; pøni pønts øts nja' xpaduujnip
jøts ku tyøki mā øts ngutujk ttanitanit ja jaa'y,
ja'ats ne'egi yikmøjpiktaktip jøts nika'ap ja Juan
Bautista.

¹² 'Jaayip ja Dios kyutujk cheptak'okwani
ku yø Juan Bautista myiiñ jøts ixymbaātñim
kyakixy kyanaxy. Aguwani ja tjadyimy-
jamimajada'akwa'andi pøn nadya'aja'wiyidip
ja yjotmøk'ajtindi.

¹³ Pøn ja Dios kyutujk yjawi tka'uknigajpxip,
ni'lijtyi ja tñigajpxti pøn Dios kugajpxy'ajtidip,
jøts nayide'en ja Moisés kyutujk tyikwa'añ jøts
jaabaatñim ja tø yikni'amøñ ku ja Juan Bautista
yam tø myiñ;

¹⁴ jøts pøni mjantyimyjanchjawiwyaandip, ja
Juan idø'ø'n ja' pøn yiknigajpxp jøts ku mye'ent
jadigojk ja Dios kyugajpxy midi txøøw'ajtp Elías.

¹⁵ Pøni pøn yikxon tñimadoop, wants tjā'gyuki.

¹⁶ 'Jade'en meets mdami'ejxi sam ja
mutskuna'jk muum y'adø'øtsti jam maayjotp,
ku ja myi'una'jk nisudso'ampy tkagupøjkiyidi ja
kyuyajtin midi ja yja' ttsøjkpy yjaguyatwampy,
jade'en ja yikni'imaadyi:

¹⁷ "Tø øø njaxu'uxy, ka'ats m'atswa'andi; tø øøts
ja canción jotmay'øøgyim nja'øømi, ni jade'ents tø
mgaya'axti."

¹⁸ Tøxi yø Juan myiñ jøts ka' yø kyay jøts ka' yø
y'uuky, jøts mwa'andi jøts ku miku' yø myøøt'ajtpy.

19 Xjats ø tø njamemi, kaapy ukpts øts, jøts mwamidi jøts ku øts janchkaxim ngay n'uuky, jøts ku øts ja møøt nnamyayi pøn yiktejtíp jantymbyo-jkpitumbijaa'dyi, jøts nayide'en møøt ja yikugubajtpitøjkti. Pøni pønts ja Dios yja' tkupøjkip, ja'ats tjä'gyukip sam ja Dios yja' tsøkyin.

Ja kajp midi kamadoodip

20 Xjats ja nwindson'ajtim Jesús ttamigajpxkijxy ja kajp mā jaty ja wyinaty tø ttuñ ja milagri'ajtin, ku dø'øñ ja jaa'y jam ka' tyimykigtatstinim ja chinaa'yin. Yide'en idø'øñ ja wyaañ:

21 —iMjanch'ayøøy meets, Corazíngit jaa'dyi! iMjanch'ayøøy meets Betsaidit jaa'dyi! Ku jeexyíp ja milagri'ajtin tyuñi jam Tiro jøts jam Sidón midi meets ya tø myiktu'unxi, ku ja jeexyíp jam yiktuujnidi ja milagri'ajtin, windi'ixyíp ja jeexyíp tyiktigajtsnidi ja chinaa'yindi, ku ja pyøky jeexyíp tyimchaachjawidi.

22 Øtsts yam wamp jøts ku nøjkx ja tiidyu'unin ñaxy, mgu'ayowíp meets ja jinaxy, nika'ap ja ne'egi jade'en y'ayo'odit pøn tsinaadyíp jam Tiro jøts Sidón.

23 Jøts meets Capernaumit jaa'dyi, ¿mā mee xijy mnøjkxti tsajpjøtpty? Pø japxi meets ayodaajkjøtpty mnøjkxtit. Ku jeexyíp ja milagri'ajtin yiktuñ jam Sodoma midi meets ya tø myiktu'unxi, ne'egi nay jaa ja kajp jeexyíp, ka'ap ja jeexyíp sa yjaty.

24 Øtsts idø'øñ tyimwyamp ku wyinaty ja tiidyu'unin ñaxy, ne'egi yikxon mee ne'egi mjaaktyimy'ayo'onbaatt, jøts nigidi jade'en pøn jaty tsinaadyøø jam Sodoma.

Ya mendi jøts mboo'kxtit

25 Xjats ja nwindson'ajtım Jesús yjaakwaañ:

—Dios Teety tsajpjotpit, yikjujky'ajtpi ya naxwiiñ, nmøja'wip mets ngunuu'kxyja'wip mets, ja'agøjxp ku tø xamidsøky o pøn ja mnitsoojkin jøts yø wijy jaa'y ja tø tkaja'gyukidi kø'øm, ne'egi tøts ja xuk'ixy xuknijawi pøn idø'øn ka'ejxiyimdi.

26 Jade'ents Teety tø xuñ sa kø'øm xamidsøky øy pøn.

27 Xjats ja Jesús tnimaay ja mayjaa'y:

—Tum ja' øts ndeety xuktump midi ja kø'øm tyunwampy. Ka'ap øts pøn jade'en xnijawi sam øts ndeety kø'øm xnijawi; nika'ats øts ndeety pøn wa'ats ñijawiyi sam øts ja kø'øm ndyimñijawi, jøts pøni pøn øts ja nduknijawiwypy, ja'ats tnijawidip ja Dios Teety.

28 Øts idø'øn xnime'endip pøn jaty agøjxtip jotkøjxtip, pøn jaty ø xku'ayo'ombaajtīdip, øts mee nyikpoo'kxp.

29 Kupøjkidik øts ja n'ixpøjkin jøts mwinmaa'nbyaattit jade'en sa meets tø ndaniwinmayi, yujy øts winmaa'ñ njagyepy; pyaatpts meets ja m'anmija'win ja øy'ajtin ja kunuu'kx'ajtin.

30 Yø ixpøjkin midi meets yam nmøøpy, ka'ap yø chepi, jajtņi yø', ja'ayi xka'ixmatstī.

12

Ku ja Jesús ttøjtøø ja ariin yam poo'kxin xøøw

1 Tuu'yøøpy ja nwindson'ajtım Jesús wyinaty, poo'kxin xøøwts idø'øn, jøts ja jam wyinaty ñaxti ma kam jam. Janch yuu'oo'ktipts ja pyabøjkpitøjk jøts ja ariin uun ja ttøjpinaxwa'ktøø, jøts ja pyajk ja tjøø'kxiyidi.

² Xjats kuts ja fariseotøjk ja jade'en t'ejxtøø, winets ja ttamajstøø ja nwindson'ajtim Jesús:

—Ejx yø mbabøjkpitøjk jade'en y'adø'øtsti, jøts ka'ats pyaat'atyi jøts yø jade'en y'adø'øtstit ku poo'kxin xøøw.

³ Xjats ja yide'en yiknimaadyøø:

—¿Ti ka'anim meets ja Dios kyajpxy x'ixy midi tñigajpxp sa ja David tuk'ojk tmøøt'adijch ja myigu'uk, ku yuu ja wyinaty yik'ookwa'aniyidi?

⁴ Tsaptøjkjotpyxi ja ojts tyøki, japts ja ojts tkay ja kunuu'kxy chapkaaky midi ja Dios yiktamiyoxp, midi ja ka'ap pyaat'atyi jøts ja tka'aty, uk jøts ja ttuka'aty ja myigu'uk, ja'ayi ja paat'ajtidip pøn teety'ajtip.

⁵ ¿Jøts nigidibaatnim meets ja kutujk x'ejxni midi ja Moisés yjaay, midi wamp jøts ku teetyøjk ka'pyoo'kxti jap tsaptøjkjotpy ku poo'kxin xøøw, jøts nika'ats ja pyøkyi?

⁶ Øts wamp jøts ku ja jadu'uk jawaani møj, nika'ap tsaptøjk yja' jade'en.

⁷ Ka' meets yø xnimadøy pøni sa dø'øn yø tjatijy ya'at Dios kyajpxy ku ja Dios Teety wyaañ: “Ja' ø ndsøjkpy jøts xmøøt'attit ja pa'ayo'owin ja ayo'ejxin, jøts ne'egi kidi xyik'ookti yø jiyujk yø tsakaa midi jaty myojxtip.” Kuk y'ijty xja'gyukidit, ka'abik mmigu'uk y'ijty xpøky'ejxtit øy ja ti pøky tjugatundi.

⁸ Ngudanaapy øts ja naxwii'ñit jaa'y jøts øts wamp ti paat'ajtip kapaat'ajtip yiktu'unt ku poo'kxin xøøw.

Ja jaa'y midi ja kyø'jadi'iñi tøtsnip

⁹ Xjats ja nwindsøn'ajtim Jesús jam chøø'ñ jøts ja ojts ñijkxy, tyøjkiy#ñ jam tsaptøjkjotp

¹⁰ mā wyinaty jam tu'uk ja jaa'y midi ja kyø' jadi'iñi tøtsnip tuktamajñ; jøts kumi øy idø'on ja tyimy'ixa'adi ti ja yjadyimy'uktani'øønidip ja nwindsøn'ajtim Jesús, jøts ja tyiktøødøø t'amidoodøø ñadyijyi:

—¿Kutujk yø' ku pamaa'y jaa'y nyiktsojkin ku poo'kxin xøøw, u ka'?

¹¹ Jøts ja nwindsøn'ajtim Jesús ja ojts t'adsøy, yide'en ja tnimaay:

—¿Wan meets ja mborreek ndejin jadi'iñi xmajt-stu'utt ku ja wyinaty tø kyunaxy jap jutjøtpy yam poo'kxin xøøw? Pø kuwanixi ja xninøjkxtit jøts ja x'atsjuuttit.

¹² ¿Ti sats ja jiyujk jade'en yjaakyikjotmay'aty, jøts ja jaa'y jadi'iñi yikmajtstu'utt? ¡Pø ka'axi, pø jaa'yxi ja! Paat'ajtíp n'ødyu'unin øy pøn ku poo'kxin xøøw.

¹³ Xjats ja yiknimaay midi ja kyø' wyinaty tøtsp:
—Xajtøw.

Jøts ku dø'on ja ojts xyajtiy, tyimyøkpøjk ja kyø' ja', nayide'en ja tyimyja'wiy#ñ sam ja yjadu'ukpi kø' midi møk.

¹⁴ Winets ja fariseotøjk wya'kpidømdøø, jøts ja tkajpxy'ajtpinibøjkidøø sudso ja tjadyimy'ukyik'ooktit ja nwindsøn'ajtim Jesús.

Ku ja Dios kyugajpxy Isaías tnigajpxy sa ja Jesús jyatwa'añ kyubatwa'añ

¹⁵ Kuts ja nwindsøn'ajtim Jesús ja tnija'wiy#ñ, winets ja jam ojts cho'oni jøts mayjaa'y ja ojts pyadsøøñi. Yikmøkpøjkijpxy idø'on ja pamaa'y ja',

16 jøts ja yikxon ttukmadø y jøts ja ka'ap ñimadya'agidit pøni pøn idø'øn ja'.

17 Jade'en'ampy idø'øn ja jade'en yjaty, jøts ja jade'en ka'pxy tyimyjatt sã wyaañ Dios kyugajpxy midi Isaías'ajtp, ku ja yide'en wyaañ:

18 Yø' øts idø'øn tø n'a'ejxi, øts yø' ndumbi, yø' ø ndsøjkpy jøts yø' ø ndajotkujk'ajtpy.

Nmo'op øts yø' ja nmøk'ajtin ja n'Espíritu Santo, jøts øts yø xnigajpxit ja ndiy'ajtin o magajp.

19 Ka'ap yø cheekt, ka'ap yø wyopt, ka'ap yø ya'axt yjokt, niduk'aawin yø kyayikmado'ot ja y'aaw y'ayuujk ja nøø'ajy tuu'ajy.

20 Ka'ap yø øy pøn nugo tyimdy'a'oo'kpety, ka'ap yø nugo tukmajada'ak tyimyajada'aky øy pøn mabaat tyimyjatundigøy,

kunim yø yikxon tpiktã'akt ja kyutujk ja tyiy'ajtin.

21 Jøts yø ødyimbyøngajpi y'ajot'attit.

Ku ja Jesús yikni maay jøts ku miku' myøk'ajtin ja tyiktuujni

22 Xjats ja nwindson'ajtim Jesús ojts yiktaninjky tu'uk ja jaa'y midi winap midi uum, jøts tø miku' ja wyinaty tyatøkiyi. Ojts ja tyikmøkpiky jøts ja jaa'y wyin'ejxwa'kxy jøts ja y'awijy jadigojk.

23 Jøts idø'øn ja jaa'y ja ñigyumaap tyimya'widøø, yide'en ja ojts wya'andi:

—¿Ti ya'at ndejin, ja rey David y'apip?

24 Xjats ja fariseotøjkti ja'ayi ja ojts jade'en tni myadowdi, xjats ja wyandøø:

—Jade'en'ampy ya'at jaa'y tyikpidsimy yø miku' kumi ja møj miku' myøk'ajtin yø yiktuujnip,

jøts yø ttuktabiðsimy ja myimiku', yø'øts yø wyindsøn'ajtip.

²⁵ Wa'ats ja nwindson'ajtim Jesús ja tnijawi sa jaty ja wyinaty wyinmaydi, jøts ja tnimaay:

—Nimidi'ibi kutujk kø'ømyi ñamyidsep'aty, kuts ja cheptundi ja xem yam jadi'iñits ja ñankyudigøyidi; u ku kajp u ku jaa'y tukmigu'uk ñamyidsepikyidi jøts ñawya'kxyidi, ka'ap ja yikjøp'ijxy'aty jøts ja jeky ñankchøøniyidit.

²⁶ Jøts nayide'en yjaty ku ja møj miku' tyikpidsimy ja myimiku', tøts idø'on ñamyayi ñawya'kxniyi; ¿sudso'ampyts ja jade'en y'ett ja myøk'ajtin?

²⁷ Pø jade'enxi mee mwā'añ jøts ku øts jade'en'ampy ja miku' nyikpidsimy ku øts ja møj miku' myøk'ajtin nyiktuujniyi; pøni janch jade'ents, ¿pønts meets ja mmigu'uk ja myøk'ajtin yiktuujnip ku ja miku' ja nayide'en tyikpidsømdi? Ja'axi mee mni'øø'niyidip jøts ku nugo jade'en nugo mjadyimgyajpxigøydi.

²⁸ Kuts øts, jade'en'ampy øts ja miku' nyikpidsimy ku øts ja Dios myøk'ajtin nyiktuujniyi, jade'ents meets idø'on yø xja'gyukit jøts ku Dios ja kyutujk tø mdanija'adyidi midi ja tyanitanaapy yjaa'y.

²⁹ '¿Pønts øy nugo tyimy'uknidøjkip ja jaa'y jap tyøjkjøtpy midi janch kamaabyim, øy ja pøn tyimyjapøjkxiwyajni ja pyikta'aky? Jawyeenxi ja yikøwøønt yikpakwøønt, winetnimts ja yikpøjkjøxit ja pyikta'aky, pø tøxi øts nayide'en ja miku' yja' nmimajada'aky.

³⁰ 'Pøn ø xkabudøjkip, ja' øts idø'on xmidsepwamp; jøts ku øts pøn ti møøt

njapøk mukwa'añ, jøts ja jinaxy tpøkwa'kxy.

³¹ 'Paty meets idø'øn nnøjmi, jøts ku øy tyimy-japøni yikmaa'kxkøjxp ja' pyøky, pøni ti jaty pøn tyumpy kyajpxpy; kuts pøn tka'uk'ømyigajpxt ja Espíritu Santo, niwindem ja mibaat kyayikpo-jkpimee'kxy.

³² Jøts øy øts pøn xjaga'ømyigajpxpy, jaakyikpojkrpimaa'kxp ja'; jøts ja' pøn tka'ømyigajpxp ja Espíritu Santo, ka'ap ja mibaat yikpojkrpimee'kxy ya naxwiiñ, jøts øy tyimyjamaḁso'ji.

Pøni sa wyimbidsimy øy ti, ja'ats tyikniḁaxø'kp pøni sa ti y'øyi kya'øyi

³³ 'Ku kipy y'øyi, nayide'en ja øy tyøøm tyikwingaxi'iky; jøts midi ka'øy, nayide'ents tyøøm ja tyikwingaxi'iky ka'øy. Ja tyøømts ja kipy yikta'ejxkajp pøni sa øy ka'øy tyøømi.

³⁴ ¡Meets win'øø'mbidi! ¿Sudso mee m'øgyajpxt jøts ka'ats m'øyjaa'yidi? Jøts pøni sa y'awa'kxy yø aaw, tum jamts yø chøøñ midi jam ujts abøki yikmøøt'ajtp jam amjotp.

³⁵ Pøn øy jaa'y, jade'en'ampy ja tyikpidsimy ja øgyajpxy ja øwyinmaa'ñ, kumi tum'øwyinmaa'ñ ja yjagyejpy jam y'am yjotp; jøts idø'øn ka'øyjaa'myidi jade'en'ampy tkayikpidsimy ja øwyinmaa'ñ, kumi tum ja ka'øybi ja jam myøøt'ajtpy y'am yjotp.

³⁶ Øtsts mee nnimaapy jøts ku wyinaty ja tiḁdyu'unin ñaxy, ja'abi xøøwts tuki'iyi yikøyajkøxt ja øgyajpxy ja ka'øgyajpxy pøni sa pønjabøn tø wya'añ.

³⁷ Pøni sa ja m'ayuujk pøni sa ja mwinmaa'ñ, nayide'ents myktiidyu'undit, nay ja' myiktapøky'ejxtip, nay ja'ats mgayiktapøky'ejxtip.

Ku ja ka'øjaa'y t'amidowdi jøts yiktuk'ejxtit ja milagri

³⁸ Wīnets ja nwindsøn'ajtim Jesús ja fariseotøjk ñīmaajyøø møøt ja kajpxwejpitøjkti:

—Windsøn, ja' øø n'ejxwampy jøts øøts xuk'ext tu'ugin ja milagri'ajtin, pøni janch ku mjanch-diosu'ngi:

³⁹ Xjats ja nwindsøn'ajtim Jesús ja t'adsøøy:

—Ja' idø'øn ja milagri'ajtin amidoodip pøn kawindiyjaa'y'ajttip; ka'ats ti milagri'ajtin y'ukyiktuk'ejxnidit, wan ja'ayi sa yjajty kyubejty ja Jonás ja Dios kyugajpxy.

⁴⁰ Nayide'en ja Jonás y'ijty tigøøk xøøw tigøøk tsuu jam ajkx yjotp jøts pyidsiimy jujky, nayide'ents øts idø'øn jap naxpatki'py n'ett tigøøk xøøw tigøøk tsuu jøts nbidsø'ømt jujky.

⁴¹ May'ampy pyidø'øktit ja jaa'y pøn jaty tsinaadyøø jam Nīnive ku yja'att ja tiidyu'unin xøøw, ku yø jaa'y yiktiidyu'undit pøn jaty ixyam tsinaadyip jujky'ajttip ya naxwiiñ, yø'øts idø'øn yikpøky'ejxtip; kumi ne'egi yiktigajtstøø ja Nīnive jaa'y chīnaa'yīndi ku ja Jonás ja ojts tyukmadøyidi ja Dios kyajpxy, jadyimy'ixyats idø'øn ja' midi jawaani møj jøts nika'ap jade'en Jonás, jøts ka'ap meets ja xmøjpikta'aky.

⁴² Nayi pidø'økp nayide'en ja windsøndø'øxy ku tiidyu'unin xøøw, ku ya'at naxwiiñit jaa'y yiktiidyu'undit jøts pyøky ja yiktani'øønidit; kumi jagam et ja ojts chøøñ, jøts ja ojts jadine'en

tnimiñ ja Salomón ku ja tpatmadoowajni ja kyajpxwejin, icyats jadu'uk midi jawaani tnija'wip jøts nigidi jade'en Salomón, jøts ka'ap meets ja xmøjpikta'aky.

Ku ja miku' jadigojk t'awimbeti ja chinaadyaajk

⁴³ 'Ku miku' tmajtstu'uty ja jaa'y, jøts ñijkxy widejtpi tø'øts etjotp, tja'ixa'ay ja pyoo'kxaajk; jøts kuts nima tkapaaty, xjats wyinmay:

⁴⁴ “Nay ja ndøjk ø n'awimbetip ma ø tø ndsøøñ.” Kuts wyimbity, jøts ja jaa'y jade'en yikpaaty sam tøjk tawa'ats, pe'ety jaaxy ja jap.

⁴⁵ Xjats ja chøøñ, jøts ja tjaaktyimy'atsway ja niwixujk ja myimiku' midi jawaani ka'øydi, jøts ja niduki'iyi ttatøkidi ja jaa'y, tsinaadyaajk ja tyikwa'andi. Nayide'ents idø'øn yø kawindiy jaa'y yjattit.

Ja Jesús tyaaq jøts ja y'uch

⁴⁶ Exam idø'øn ja nwindson'ajtim Jesús wyinaty jade'en tmigajpxñim ja jaa'y, ku ja tyaaq yja'jty jøts y'uchti myigu'ukti. Japyi ja ojts tøk'agui'py y'awejxti, ja' ja tyimyjami gajpxwandip.

⁴⁷ Jøts ja nwindson'ajtim Jesús yiktukmadøøy, jam idø'øn ja pøngapøn tnigajpxkøjy:

—Exam ja mdaak tøjkwimpy y'awixy møøt ja m'uch, jøts mets mmigajpxwajnip.

⁴⁸ Jøts ja tnimaay pøn wyinaty jade'en tø tyukmadøyi:

—¿Pøn øts ndaagip, pøn øts idø'øn n'uchip?

⁴⁹ Winets ja tnigu'umiyiiñ ja pyabøjkpitøjk jøts wyaañ:

—Yø' øts idø'øn ndaagidip, yø' øts idø'øn n'uchidip.

⁵⁰ Pøn øts ja ndeety kyutujk tpaduujniyip midi jap tsajpjøtpty, yø' øts idø'øn nmigu'ugidip, yø' øts idø'øn ndaagidip.

13

Kuja Jesús tmadyakpaaty ja jaa'y pøn nøjkx neppi

¹ Jøts ja nwindson'ajtim Jesús jam tøjkjotp pyidsimy, jøts ja ojts ñijkxy jam mejy'am, jamts ja y'ixaaiky.

² Jøts kumi janch may ja jaa'y ñamyujkidi ma ja jam wyinaty, winets ja nwindson'ajtim Jesús tyøjkii'ñ jap barkijøtpty, japts ja y'ixaaiky, jøts ja mayjaa'y jam niduki'iyi tyandøø nøø adsayjotp.

³ Xjats ja ttuk'ixpijky ja y'ixpøjkin, ñimay idø'øn ja ojts tnigajpxkøjy. Tum ejxpajtin madya'aky ja tyanimadyakpy pøni midi idø'øn ja y'ukyiktamija'gyukip, yide'en ja wyaañ:

—Tu'uk ja jaa'y chøø'ñ neppi;

⁴ Jøts ku ja ojts twijy ja tyømt, xjats ja tømt winaagin ñaxkidaiky jam tuu'am, ja'ats ja joon ojts tnimendi jøts ja wa'ats tpeemujkøjxtøø.

⁵ Winaagin ja tømt ñaxkidaiky jam tsaajotp ma ja naajx kyamajpxyi; ja'ats ojts tsojk myujxkojti kumi ka'ap ja naajx kyøjki.

⁶ Kuts ja xøøw ja'ayi pyidsimy, ja'ats ja ojts chaa'yiyi, yats y'aats ja yjaakidyimy'ejtnidi, xjats ja tuki'iyi ojts tyøtskøjxni.

⁷ Jøts ja tømt winaagin ñaxkidakmøø jam maagyujp'agujkp, jøts ku ja maagyujp yøøñ, ja'ats ja ojts ñi'aa'mbajtniyi.

⁸ Jøts ja tømt ojts waani ñaxkidakmi ma øñaajx, ja'ats janch'øyiyi'ñ; winaagin magø'pxy

pyajkpejty ja tu'ukpi tømt, winaagints tugui'pxy, jøts winaagin ee'pxmajk.

⁹ Pøni pøn ja ja'gyukin tmøøt'ajtp, wan tja'gyukidi.

Tigøjxp idø'øñ ja Jesús ejxpajtin madya'akyøjxp ja y'ixpøjkin tyaky

¹⁰ Winets ja nwindson'ajtim Jesús ja pyabøjkpitøjk ñimejniyi wingon jøts ja tyiktøødøø:

—¿Jadits ku yø jaa'y jade'en xamimadya'aky ejxpajtin madya'aky ku xyik'ixpiky?

¹¹ Jøts ja t'adsøøy:

—Meets Dios ja'ayi mduknija'wiyip ja kyutujk jap tsajpjøtpy midi pøn tkanija'wipnim; jøts ka' yø mibaat tnijawidit.

¹² Pønts tjagyajp ja ja'gyukin, jaaktyimyikmo'opts ja' jøts yikxon tyimyja'gyukit; jøts pøn kaja'gyukip, jaaktyimyikpøjkxipts ja' pøni wine'en paadin ja jap tjaakjamøødi ja wyijy'ajtin.

¹³ Paty øts yø jade'en ndukmadowdi wenk madya'akyøjxp; yjadyimy'ejxtipxi jade'ents yjatti sam tø tkidyimy'ejxti, yjadyimyjamadoodip jade'ents yjatti sam ti tkidyimñimadowdi, uk sam pøn ti tkidyimyadøyin.

¹⁴ Jade'en idø'øñ ixyam tyimyjati sam wyaañ ja Isaías ja Dios kyugajpxy, ku ja yide'en wyaañ: Mjadyimyjamado'odip jøts ka' xnimado'odit; mjadyimyja'ejxtip jøts jade'en mjattit sam pøn ti tkidyimy'ijxñim.

¹⁵ Nisudso'ampy yø yjade'embì jaa'y kya'ukmadoonidi ja y'anmija'win, tum ka'øy tnimadowdi, jøts wimbeets kugoots y'ejtnidi;

ka'ap ja wyeen ttawin'ejxti,
 nika'ap ja tyatsk ttamadowdi,
 nika'ap ja kyubajk yja'gyukidi,
 jøts ni øts xkanimendi øyik øts idø'øn nyiktso'oktit.

¹⁶ Xjats ja Jesús tjaaknimaay ja pyabøjkpitøjk:

—Meetsts idø'øn janchjotkujk'atyim, kumi
 mda'ejxtip ja mween jøts kumi mdamadoodip
 ja mdatsk.

¹⁷ Jøts janch øts idø'øn nwa'añ, jøts ku may
 ja jaa'y pøn jaty Dios kugajpxy'ajtidip, pøn jaty
 øyjaa'y'ajttip, jade'en tyimyjawemp'ejxwandi pøn
 meets icyam m'ijxpy, jøts nijuunits tø tka'ejxti;
 yjadyimyjamadoowandi ya'at jade'en midi meets
 icyam mmadøøpy, nijuunits ja tkamadowdi.

*Ku ja Jesús tnigajpxy sudso dø'øn yikja'gyukit ku
 jaa'y neppi ñijxxy*

¹⁸ Ukpatmadowdim meets, jøts xja'gyukidit pøni
 sudso'ampy idø'øn ya'at madya'aky tijy ku ja jaa'y
 chøø'ñ neppi.

¹⁹ Pøn tjamadojidip ja Dios kyajpxy sa ja
 ttanitanit ja yjaa'y jøts nika'ap tmøjpikta'akti, ja'ats
 idø'øn jade'en jajtíp sam ja tømt midi naxkidaajk
 jam tuu'am; jøts miku' ja jaty ñimiñiyi jøts ja
 pyøjkxiyi ja Dios kyajpxy midi ja tø tja'ukja'gyuki.

²⁰ Jøts ja tømt midi naxkidaajk jam tsaajotp,
 jade'en idø'øn ja ñamyayi yjaty sam jadu'uk ja
 jaa'y pøn tpatmadojidip ja Dios kyajpxy jøts ja
 jotkujk'atyim tkupøjkojti,

²¹ jøts kumi jade'ents yjatti sam ja ujts
 ya'ats kya'ejtxiyi, jøts ja nigidi jeky tmi'etti;
 ku ja tku'ayo'ombaadidi ja Dios kyajpxy uk
 yiktabawopti paat, jøts ja jaty tyimy'ayojidi.

22 Jøts ja tømt midi yikwøj jam maagyujp agujkp, jade'en idø'øn ja n'ukpiktaajkin sam ja jaa'y pøn tpatmadojidip ja Dios kyajpxy, jøts ja pikta'aky jøts ja jotkujk'ajtin ja' ne'egi yjotmay'ajttip, ja' ja win'øø'nidip, jøts ja Dios yja' tyigøøñi jøts ja jaa'y ja yjanchja'win nika'ap tyikwingaxi'iky.

23 Ja tømt midi ojts ñaxkida'aky jam øñaxjotp, jade'en ja nbiktaajkin sam ja jaa'y pøn tpatmadojidip ja Dios kyajpxy jøts yja'gyukidip, jøts yikwingaxø'øktip. Jade'en ja winaagindi sam ja tu'ukpi tømt pyajkpety magø'pxy, jøts winaagin jade'en sam ja' midi pajkpajtp tugui'pxy uk ee'pxmajk.

Ku ja ariin yiktamineejpi ja ka'øy ujts

24 Jøts ja nwindson'ajtim Jesús tjaaktamimadyaajky jadu'uk ja madya'aky, jøts ja mayjaa'y yide'en tnimaay:

—Jade'en idø'øn ja Dios kyutujk midi yjaa'y ja tyanitanaapy sam tu'uk ja jaa'y twijyin ja ødyømt jam kyamjotp,

25 jøts ku ja wyinaty ixjam myaanidi niduki'iyi, winets ja kugam myidsep ojts tyatøjkxiyi ja kyam, jøts ja ojts t'atswijy ja ka'øy ujts jam ariinjotp.

26 Kuts ja ariin yøøñ ku ja y'uuniyi'ñ, jøts ja ka'øy ujts jam nayide'en pyidsimy.

27 Winets ja tumbi t'atsnimaadyøø ja wyindsøn: “Windsøn, pø janch tum ødyømts mets ojts xijy xwijy jam mgamjotp, ¿mats yø ka'øy ujts tø chøøñ?”

28 Jøts ja wyindsøn ja ñimaajyidøø: “Ja ta'ajkibi ja tajotma'tpi net jade'en tø y'adø'øtsti.” Xjats ja

tumbi tyiktøwdi jøts ja wyandøø: “¿Mdsøjkpy jøts øøts ja ka'øy ujts n'atswejxkøxt?”

²⁹ Yide'ents ja ojts y'adsøyidi: “Ka', ku net ja ka'øy ujts yjayikwext, nayide'ents inet ja ariin yikwejxnit.

³⁰ Ne'egi tyimy'øy'atp jøts jade'en xmajtstu'uttit, wan jade'en tyondi, jaanim ku wyinaty tø tyimbyaaty jøts yikwejxnit; winets øts ja tumbi ngaxt jøts ja jawyeen twejxmujkøxtit ja ka'øy ujts, yikxon t'adsu'umdit tuk'øøxy jaty jøts ja jade'en yiknitsa'at, jøts ja ariin yikpøkjøøkt jap abøjk'ii'ñjøtpy.”

Ku ja Jesús tmadyakpaaty ja mortas tømt

³¹ Ñayi myadyaajk ja nwindson'ajtim Jesús jadu'uk ja madya'aky:

—Jade'en idø'øn ja Dios kyutujk midi yjaa'y ja tyanitanaapy sam ja møj mortas tømdin midi jaa'y wyijpy kyamjøtpy.

³² Jøts kumi jaaktyimchuu'kxñi ja ñidømt yø', ka'ap jadu'uk jade'en ujts midi yjamigu'uk'ajtpy; kuts yøñ, yikxon yjantyimyøñ møj tukmøj kipyin, janch møj idø'øn yøñ ti sa øy ti joon myendi kixy kida'aky, jøts ja ñabye'eñidi jam kipy awajkjøxp.

Ku ja Jesús tmadyakpaaty ja levaduri

³³ Ñayi tyamimadyaajk jadu'uk madya'aky:

—Jade'en idø'øn ja Dios kyutujk midi yjaa'y ja tyanitanaapy sam ja levaduri midi tø'øxyøjk tyamimøø'kxyip ja ariin way ku ja tø tkijpxy tigøøk ojk a'ejxi, jøts ja jich yikxon yaa'kpi ky.

Tigøjxp ku Jesús xumi jade'en tyik'ixpiky ja jaa'y ejxpajt'in madya'akyøjxp

34 Ejxpajtin madya'akyøjxp idø'øn ja nwindson'ajtim ja y'ixpøjkin tñigajpxy, jøts tum jade'en idø'øn ja tñigajpxy pøni ti dø'øn ja ñimadya'akwampy.

35 Ja'agøjxp ja jade'en yjajty jøts ka'pxy wyimbidsø'ømt sa wyaañ ja Dios kyugajpxy ku ja yide'en tjaadyaañ:

Ejxpajtin madya'aky ø nyiktu'ump ku ti ngajpxwa'ant;

jøts nnigajpxp øts ja' midi ka' pøn tñigajpxñim, wine'en yam kujk y'ity kuuyip ja Dios tyik'øyiñ ja nañwii'ñit jøts ixyambaat.

Ku ja Jesús tñigajpxy sudso dø'øn yikja'gyukit ku ja ariin yiktamineepi ja ka'øy ujts

36 Xjats ja nwindson'ajtim Jesús ojts tminawya'kxyi ja jaa'y jøts ja tyøjkiyiñ tøjkjøtpy, japts pyabøjkpitøjk ja ojts ñimiñiyi, jøts ja ñimaajyiyi:

—Tuknimadook øøts yikxon ja madya'aky ku tø xnimadya'aky ja ka'øy ujts midi yomp jam kamjotp.

37 Winets nwindson'ajtim Jesús ja ñimaajyidi:

—Ja tømt wøjpi, øts idø'øn ja',

38 jøts ja kam, nañwii'ñit ja'. Jøts ja ødyømt, ja jaa'dyi pøn Dios kyutujk tpaduujnidip, jøts ja ka'øy ujts, ja jaa'yts ja'adi pøn ja miku' yja' tpaduujnidip,

39 jøts ja ta'ajkiñi tajotma'atpi midi tnepp ja ka'øy ujts, nay ja miku' ja kø'øm. Jøts ku tpaaty ja ariin wejxk'aats, ja dø'øn ja' ku nañwii'ñit jaa'y yikti dyu'undit, jøts pøn tpekmuktip ja pikta'aky, ja ankilis ja'adi.

40 Nayide'en idø'øñ yjatt ku naxwii'ñit kyøxt sam ja ka'øy ujts yikpøkmyin, sam ja yikpikta'agyin jap jønjøtpy jøts ja jap ñitøy.

41 Ngaxpøts ja n'ankilis jøts ja twaamujkøxtit pøn jaty ja myigu'uk tyikpøkyundip, jøts pøn nayide'en ttunk'ajttip ja pøkyunk, jøts ja ttukmajtstu'uttit øts ja ngutujk jøts kidi mibaat ttatøkidi.

42 Jap ja møj jøndøødyajkjøtpy tpikta'aktit ma ja yikxon tmijøødit tmiya'axtit, tmiwingidsetstit tmi'agidsetstit ja jøøñ.

43 Jøts pønts ja Dios tpadundip pøni sa ja wya'añ, ja'ats idø'øñ jap ja møj kunuu'kxin tmøøt'ajttip ma ja Dios Teety ja kyutujk ttanitani ja yjaa'y. Pøni mmøøt'ajttip ja ja'gyukin, ja'gyukidits!

Ku ja Jesús tmadyakpaaty ja meenñ midi jaa'y yikyu'uch y'ijtpy naxjøtpy

44 'Nayide'en idø'øñ ja Dios kyutujk sam meenñ yu'uch'ityin ya naxjøøjty kamjøøjty. Xjats jaa'y ja tpaaty jøts ja nay jap jadigojk tyu'uch; jøts kumi yjantyaxondakpy winets ñijkxy jøts t'atsto'okixy tuki'iyi ja pyikta'aky ti jaty jam yjagyejpy, jøts ja naajx tjuy ma tø t'ukyu'uch ja meenñ midi tø tpaaty.

Ku ja Jesús tmadyakpaaty ja tsaa meenñ

45 'Nayide'en idø'øñ ja Dios kyutujk midi yjaa'y tyanitanaapy sam tu'uk ajuubyi agajpxpi, pøn t'ixaapy tum ja øybi tsaa meenñ midi ja chow kawinmaañi,

46 kuts ja tpaaty tu'uk midi janch tsobatp, winets ñijkxy jøts tuki'iyi y'atsnawyidoo'kixyi ti jaty jam yjagyejpy, jøts ja tjuy ja tsaa meenñ.

Ku ja Jesús tmadyakpaaty ja xuummy midi yikta'ajkxmakp

⁴⁷ 'Nayide'en idø'øn ja Dios kyutujk sam tu'uk ja xuummy midi yikta'ajkxmakp, kuts ja yiknøwejtspety jam mejyjotp, jøts ja tyikpidsimy køx kidā'ak ja ajkx.

⁴⁸ Jøts ku ja xuummy tø y'uch, winets ja ajkxmakpi ja twejtspidsømdi jøts ja tyiknøjkxti jam nøø'adsayjotp, jøts jam y'ixa'akti jøts ja jam twi'ejxti ja ajkx; kachjotpy ja tpikta'akti midi janch tum'øy jøts ja ka'øy ajkx yik'ixwiyj.

⁴⁹ Jade'ents idø'øn yjatt ku naxwii'ñit jaa'y kyøxt; nibidsømidip ja' ja ankilis jøts ja abiky pyikta'agidit pøni sa pønjabøn y'øyi kya'øyi,

⁵⁰ jøts ja ka'øybi yikpikta'aktit jap møj jøndøodyajkjotpy ma ja yikxon yjø'ødit ya'axtit, wyingidsettit y'agidsettit.

Sa ja Dios kyutujk nyikniḡaxø'jka'ant

⁵¹ Winets ja nwindson'ajtim Jesús ja yiktøøjidi:

—¿Mnimadoodip idø'øn tuki'iyi?

Xjats ja wyandøø:

—Nnimadøøpy øø nwindson'ajtim yø'.

⁵² Winets ja ñimaajyidi:

—Ku tu'uk ja kajpxwejpi t'ukni'ixpøki sudso tñijawit ja Dios kyutujk midi yjaa'y ja tyanitanaapy, jade'ents ja pyidsimy sam tu'uk ja windson midi tjajtp tyikwingaxø'kp ja yjotkujk'ajtin ku ja tñanky'ijxyi øy ti køx kidā'ak, wan tjemyi wan tku'aamyi.

Ku ja Jesús yja'jty jadigojk Nazaretit kajpjotp

⁵³ Xjats ku ja nwindson'ajtim Jesús jade'en tñimadyak'abajtiyi'ñ, winets ja jam chøø'ñ

⁵⁴ Jøts ja ojts yja'aty jam kyø'øm etjotp ma ja kyugajpi. Jamts ja yik'ixpøjktøjkøø tsaptøjkjotp midi jam wyinaty, jøts ja jaa'y ñigyumaap yjanchjajtøø, yide'en ja wya'andi:

—¿Ma yø jaa'y jade'en tø tjaty yø'øbi xpxøjkin? ¿Sudso yø jade'en ttuñ milagri'ajtin?

⁵⁵ Pø ja tsajtspits yø' y'u'nk, jøts ja María ttaagi. Kidi ja Jacobo yø' y'ajhti, jøts ja José møøt ja Simón, jøts Judas.

⁵⁶ Nayats ja y'uch kiixy yø chinaamyidi ma adøm ya. ¿Ti mats yø jade'en tuki'iyi tø tjaty?

⁵⁷ Patyts idø'øn ja jade'en ka' tmøjpikta'akti. Xjats ja nwindson'ajtim Jesús ja ñimaajyidi:

—Tum yiktsojqp ja Dios kyugajpxy øy ma, kuts kyø'øm kajpkijxy ku kyø'øm tøjkjøøjty, ka'abimts ja tiy yiktsøky.

⁵⁸ Jøts idø'øn ja jam ka'ap jadine'en ttuñ ja milagri, kumi ka'ap ja tjanchjawidi.

14

Ku ja Juan Bautista ja o'jkin tpaajty

¹ Nayi winet ets ja nwindson'ajtim Jesús yiknimadøøy jam Galilea, ja Herodes idø'øn ja tnmadoop pøn jam wyinaty windsøn'ajtp,

² jøts ja tñimaay pøn jaty ja wyinaty møøt tyuñ:

—Ja Juan Bautista net ja' midi y'ijty yiknøbajtp, ja' inet tø yjujkpyiky jadigojk. Paty yø jade'en tmøøt'aty ja møk'ajtin jøts yø jade'en ttu'unt ja milagri'ajtin.

³ Jøts kumi ja Herodes ja Juan wyinaty tø chumyi, ja' ja wyinaty tø ñi'ane'emyi jøts ja pujx kadeen ja yiktagøwøønt yiktabakwøønt jap puxøjkjøtpy,

ja'agøjxp ku ja ojts ttamigajpxy ja Herodías, pøn ja Herodes ja y'uch Felipe ñidø'øxy'ajtpy.

4 Yide'en idø'øñ ja Juan wyinaty tø tnimaañi ja Herodes:

—Ka' pyaa'tatyí jøts yø jade'en xty-imñidø'øxy'att.

5 Jøts idø'øñ ja Herodes tyimyjayik'ookwa'añ ja Juan, ja mayjaa'yts chø'jkíp; kumi tyumniñja'widíp ja' jøts ku ja Juan tum ja Dios yja' tkajpxi.

6 Kuts ja Herodes ja xyøøw ja yjumøjt txøduuñ, winets ja Herodías ñøøx pyidsimy ajtspi mā ja mayjaa'y jam wyinatyi tø yikwawdi yikwetsti migaabyi mi'ukpi, ja'ats ja Herodes yjantyax-ondaajk,

7 jøts ja tnimaay møk'ampy jøts ku ja tmo'ot øy ti pøni ti ja kø'øm y'amidoowampy.

8 Xjats ja kiixy, tø tyaak ja wyinaty jawyeen y'agajpxiyi ku ja tnimaay ja Herodes:

—Møøky øts platijotp ja Juan Bautista kyubajk.

9 Ja'ats ja windsøn Herodes kyujot-maadyøjkiyi'ñ; jøts kumi tøts ja wyinaty kø'øm møk'ampy ñimy jøts ku ja tmo'ot øy ti, tøts ja jaa'y ja wyinaty tmadowdi pøn jaty jam wyinaty migaadyip mi'uktip, xjats idø'øñ ja ojts wya'añ jøts yikmo'ot.

10 Ojts tyikutuky jøts ja Juan Bautista ja kyubajk y'atsyikajtspoot jap puxøjkjøtpy;

11 jatyi dø'øñ ja ojts tyikmendi jap platijøtpy jøts ja kiixy ja yikømøøy, jøts tyaak ja tmøøy.

12 Xjats ja Juan Bautista yjaa'y yja'atti, ja'ats ja ñine'kx ja ojts yiktsoo'nxiyi jøts ja y'atsyiknitajt; kuts ja t'ukyiknaxøjkidøø, winets ja ñøjkxtøø jøts ja ojts t'atstukmadowdi ja nwindsøn'ajtim Jesús.

Ku ja Jesús tyikaay ja nimagoxk milbi jaa'y

¹³ Kuts ja tnija'wiyii'ñ, jøts ja chøø'ñ nadyu'uk jap barkijøtpy, jøts ja ñijkxy ma jam nipøn kya'ity. Jatyits ja jaa'y ja tnija'widøø, winets ja ojts choondi ma jaty ja kajp jam, jøts ja tpanøjkxti tekyjø'øm.

¹⁴ Kuts ja Jesús pyidsiimy jam barkijotp, jøts ja ojts t'ixy jøts kudam jaa'y jam wyinaty janch namaydi, jøts idø'øn ja ojts t'ayo'ixy, may tyikmøkpjiky ja pamaa'y midi ja jam yiktanimeen.

¹⁵ Tsuu'jiñipts wyinaty, winets ja pyabøjkpitøjk ja ojts ñimiñiyi jøts ja ñimaajyøø:

—Tøts ja et chuu'jiñi, jøts ka' ya pøn chøøni. Kajxni yø jaa'y, jøts wan tnøjkxnidi ma jaty kajp jøts jam tju'udyit kyaaky tyojkx.

¹⁶ Xjats nwindson'ajtim Jesús ja tnimaay:

—Ka' yø ñøjkxtit; yikaydi meets yø'.

¹⁷ Jøts ja wyandøø:

—Ka'ap øøts ya ti nmøødi, ja'ayi tsapkaaky jap ja magoxkyi, jøts ajkx jamajtskyi.

¹⁸ Winets ja nwindson'ajtim Jesús ja ñimaajyidi:

—Ya yikmendi.

¹⁹ Jøts ja ojts tnøjmi jøts y'ixa'aktit jam miyjotp. Xjats ja tnixajiyii'ñ magoxk ja tsapkaaky jøts majtsk ja ajkx, jøts ja ojts tkunuu'kxy jøts ja ttatujkiyii'ñ, jøts ja tkømøøy ja pyabøjkpitøjk, ja'ats ja ojts tyikwa'kxti jøts ja tmøødyi ja mayjaa'y.

²⁰ Niduki'iyi ja kyaydi ku'uxyi; jøts ja makmajtsk kach ujts wyindaañ ja aga'ak abu'xk.

²¹ Nimagoxk mil ja jaa'y kyaydi tum yaa'dyøjk, jøts abiky ja tøøxyøjkti møøt ja mutsk una'jkti, ka'ap ja yikmachowdi.

Ku ja Jesús yø'øy jam mejwyingøjxp

22 Xjats ja nwindson'ajtim Jesús nay jatyi tyiktøjkiyi'ñ ja pyabøjkpitøjk jap barkijøtpy, jøts ja ñøjkxtit jawyeen jam jaduktamajñ, yam ja ixjam tyañim jøts ja tminawya'kxit ja mayjaa'y.

23 Kuts ja t'ukminawya'kxøø, xjats ja nadyu'uk pyatøjkiyi'ñ tsapkajxpø jam kojpkøjxp. Jøts ku kyoodsiña, ixjam idø'on ja wyinaty nadyu'uk,

24 jøts ja barki ixjamni ja mejkyujk'am jagamni ja wyinaty. Janch jadi'iñi ja jam yikwibejpyø'øñi ku ja nøø tyojmji'iky, jade'en'ampy ja poj myiñ midi ja ñøjkxtip.

25 Xjats ku yjøpkyoost'ajty, winets ja nwindson'ajtim Jesús ja jam ñimejnidøø, jadi'iñi ja yø'øy jam nøøwingøjxp.

26 Kuts ja pyabøjkpitøjk ja ojts jade'en y'ijxyiyi jøts ku ja yø'øy jam nøøwingøjxp, xjats ja yjantymchø'jkidøø, jøts nay ja tsø'øgi ja møk'ampy yikwajnidøø:

—iTi miku' yø jade'en!

27 Jøts ojts ja nwindson'ajtim Jesús ja myigajpxyidi, jøts ja ñimaajyidøø:

—iKidi mdsø'øgidi, yikmøjkidi m'aaw mjoojt; øts idø'on wamp!

28 Winets ja Pedro wyaañ, xjats ja tnimaay:

—Windsøn'ajtim, pøni janch mets idø'on, yikyø'øky øts nøøwingijxy jøts øts xyiknøjkxt ma mets ixjam.

29 Xjats ja nwindson'ajtim Jesús ja ñimaajyøø:

—Men.

Winets ja Pedro pyidsiimy jam barkijotp, jøts ja yø'øchøø'ñ nøøwingøjxp, jøts ja ñijkxy ma ja nwindson'ajtim Jesús jam wyinaty.

30 Kuts tja'wiyi'ñ ja møk poj, ja'ats chø'jkiñøø; jøts enkyi køjk yjøptak'adøtsni, winets møk chabaguejky jøts wyaañ:

—iWindsøn'ajtim, yikpidsømk øts!

31 Jøts ja nWindsøn'ajtim Jesús nay jatyi tmajch kyø'køjxp, jøts ja tnimaay:

—¿Tyimwyinii'nxyip mets mjanchja'win? ¿Tiku tø mnayjøpja'wiyi?

32 Xjats ku ja tyøjkidøø jap barkijøtpy, jøts ja poj jatyi y'amø'jty.

33 Winets ja jaa'y ja wyinguxanaajyi pøn jaty jap wyinaty jap barkijøtpy, yide'en ja wya'andi:

—Mets tam idø'øn mjantyimdiosu'nk.

Kuja Jesús tyiktsøjky ja mayjaa'y jam Genesaret

34 Xjats ja ttanajxtøø ja mejy jøts ja naajx ja tpaattøø yja'ttøø Genesaret.

35 Xjats ku ja jaa'y t'ejxkapti ja nWindsøn'ajtim Jesús pøn jaty jam kugajp'ajttip, ja'ats ja ayuujk tyikyø'ødyøø, jøts tnija'wigyøjxtøø pøn jaty jam tsinaadyip ja'abi et, jøts ja tyikmendøø niduki'iyi pyamaa'y ma ja nWindsøn'ajtim Jesús wyinaty.

36 Møk ja ttanuu'kxa'akti øy ja ja'ayi tyukpaadidit ja wyet pa'; jøts pøn ja wet jade'en yjøjxtøø, møkpojxjxtøø ja'.

15

Ja ka'øy winmaa'ñ ja jaa'y tyikpøkpyajtp

1 Winets ja fariseotøjk winaagin tnimendøø ja nWindsøn'ajtim Jesús, møøt ja kajpxwejpitøjkti midi jam wyinaty tø choondi Jerusaléngit kajpkøjxp, jøts ja ojts yiktøwdi:

2 —¿Tigøjxp ku yø mbabøjkpitøjk tkabadundi ja møjaa'ychināa'yin? Ka'ats ttundi ja windsø'jkin ku kyøbujti ku kyawya'andi.

3 Jøts ja nwindson'ajtim Jesús ja ojts nayide'en tyiktøøjimbity:

—¿Jøts tigøjxpts ku meets ja Dios Teety kyutujk xkamimadojyiyi, jøts ja' mee myikmajadakpy ja møjaa'ychināa'yin?

4 Jøts yide'ents Dios wyaañ: “Windsø'øgi mdeety mdaak”, jøts “Pøni pøn tyeety tyaak tka'ømyigajpxp, wan tpa'øøky.”

5 Jøts ka' meets jade'en mwā'añ, pø mnømpxi meets jøts wan jaa'y tnøjmi ja tyeety tyaak: “Niwine'enin ngabudøkit, tø øts Dios ndamay'ajtkøjxni ti jaty øts jap nmøøt'ajtpy”;

6 jøts ku jade'en pøn wya'añ, ka'ats tyeety tyaak ja t'ukpudøjkiñi. Jade'ents meets ja Dios kyutujk xka'ukmøjpiktaajkniyi jøts meets ja mgostumbri xyikmajadakni.

7 ¡Meets win'øø'mbidi! Yikxon yjawaañ ja Isaías ja Dios kyugajpxy jøts mdi meets msā meets, ku ja nøky ja yide'en tjaay:

8 Nugo aaw nugo ayuujk, yø' øts yø jaa'y xawindsø'jkidip,
pø mā yø y'aaw yjoojt yø'ødi.

9 Jøts ti yø ñiwyā'ant øy øts yø wine'en xjawindsø'øgidi,
pø ja'axi y'ixpøjkin'ajtip pøni sāj jaa'y kø'øm tyikutuky.

10 Winets ja tyaxtsøoy ja mayjaa'y jøts ja tnimaay:

—Ukmadowdi meets jøts xja'gyukidit:

11 Kidi yø'øjip jaa'y yikpøkpyajtíp midí tøjkip y'aawjøtpty. Yø' jaa'y yikpøkpyajtíp midí pidsømp y'aawjøtpty.

12 Xjats ja pyabøjkpitøjk ja ñimejniyi, jøts ja ñimaajyøø:

—¿Tø x'ixy yø fariseotøjk, ku jade'en tø tmadowdi sa tø xnøjmi jøts yikxon tø yjantyimy'ambøkti?

13 Jøts ja Jesús yide'en y'adsojimbijty:

—Øy ja tyimyidi ixpøjkin, pøni ka'ap ja tminabyaadyi ja Dios yja' møøt, windigøøpy ja y'ity.

14 Ixmätsti; jade'en yjätti sam ja winap jaa'y ttuu'wawdi ja myiwinap jaa'dyi. Jøts ku ja winap jaa'y tjanch'uktuu'way ja myiwinap jaa'y, kuts jut ja tpaattit namajtskts ja jap kyunaxtit.

15 Winets ja Pedro wyaañ, jøts ja tñimaay ja nwindson'ajtim Jesús:

—Tukmadook øøts ti yø yjade'embí madya'aky tyijpy.

16 Xjats ja nwindsin'ajtim Jesús wyaañ:

—¿Ni meets paat yø xkanimadooni?

17 ¿Yø' idø'øn mgaja'gyukidíp, midí tøjkip aawjøtpty jøts ja ñijkxy jam maatsjotp, jøts pyidsimy ku nnawyiyø'øyin?

18 Midí'its yø aaw yikpidsimpy, jam idø'øn ja chøøñ amjotp; yø'øts idø'øn jaa'y yikpøkpyajtíp.

19 Jam ja amjotp chøøñ ja ka'øwyinmaa'ñ ku jaa'y myigu'uk tyik'øøky, ku jaa'y ñiyaa'y uk ñidø'øxy tpøjkxi, ku jaa'y kyawindiy winmaa'ñ tyiktuñ, ku jaa'y myeech, ku jaa'y tyaayi, jøts ku jaa'y øy ti tumjiwimbet tmadyaknaxy.

20 Yø yjade'embî winmaa'ñ idø'øn ja jaa'y yikpøkpyajtidip; jøts kidi yø'øjip ku jaa'y tkatuñ jade'en ja windsø'jkin ku tkapujy ja kyø' ku kyaawya'añ.

Ku ja Tiro tø'øxyøjk tjanchja'wiyi'ñ ja Jesús

21 Xjats ja nwindson'ajtim Jesús jam choo'naa, jøts ja ojts ñijkxy ma ja jaa'y y'et jamdi, pøn kugajp'ajttip Tiro jøts Sidón.

22 Jøts tu'uk ja tø'øxyøjk myiiñ midi tso'omp cananea, midi jam wyinaty tsinaapy ja'abi etjotp, jøts ja tnimiñ ja nwindson'ajtim Jesús, yide'en ja møk'ampy tnimaay:

—iWindsøn'ajtim, metsxi rey David m'u'nk'ajtip m'ap'ajtip, ayo'ejxk øts! Yø nøøx øts idø'øn ja miku' tø tyatøjkiniyi, jøts yø' møk yjanchyik'ayojip.

23 Jøts ja nwindson'ajtim Jesús ka'ap ja t'adsøy niwine'enin ja'agøjxp ku ja tkamigugajpi, winets ja pyabøjkpitøjk myendøø, jøts ja møkta'aky wyandøø, møkta'aky yiknimaay:

—Kajxni, janch na'ambim adøm yø xpayø'øyim.

24 Winets ja nwindson'ajtim Jesús wyaañ:

—Yø'øyi øts Dios Teety xanigajxp pøn ja Dios kyutujk kapaajtipnim ya Israelit naxjøøjty, ya Israelit kajpjøøjty.

25 Jøts ja tø'øxyøjk myiiñ wingon jøts ja ojts wyinguxaniyi, yide'en ja wya'añ:

—iWindsøn'ajtim, pudøjkik øts!

26 Jøts yide'en nwindson'ajtim Jesús ja t'adsøøy:

—Ka' y'øyi ku u'nk una'jk yikpøjkxit ja chapkaaky jøts uk ja yikmo'ot.

27 Jøts ja tø'øxyøjk wyaañ:

—Nwindsøn'ajtim, janch jade'en idø'øn ejx ixa mwā'añ; ja ukts yjøø'kxmukøxtip ja kaaky abu'xk midi ja wyindsøn yika'adip jap mesi patki'py.

²⁸ Jøts ja nwindsøn'ajtim Jesús ja ñimaajyøø:

—janch møj mjanchja'win! Wan jade'en tyiktuñ sam idø'øn xtsøky'aty.

Jøts ja nay jatyi myøkpíjky ja ñøøx.

Ku ja Jesús tyiktsøøjky ja mayjaa'y

²⁹ Xjats ja nwindsøn'ajtim Jesús jam chøø'ñ, jøts ja ñajxy Galileit mejpya'am; winets ja pyatøjkijyi'ñ mā jam ja kojpk tu'uk jøts ja y'ixaajky.

³⁰ Janch namay ja jaa'y jam yja'tti mā ja jam wyinaty, jade'en ja tyikmendi pøn tekmya'at, pøn winap, pøn uum, pøn kōmā'at, jøts pøn tigati pā'am pøjkidip. Jøts ja jam tyimwyingon tpiktaktøø mā ja nwindsøn'ajtim wyinaty, xjats ja tyikmøkpøjkijxy.

³¹ Janch ñigyumaap idø'øn ja jaa'y ja tyimyja'widøø ku ja jade'en t'ejxti y'awijy ja uum jaa'y, jøts ku kyø' ja myøkpøkti pøn kōmā'atti, jøts ku yø'øjyø'økti pøn tekmya'atti, jøts ja winap jaa'y wyin'ejxwā'kxti. Xjats ja tjanchtukmøja'widøø ja Dios Teety pøn ja Israelit jaa'y Dios'ajtip.

Ku ja Jesús tyikaay ja ñimaktaxk milbi jaa'y

³² Winets ja nwindsøn'ajtim Jesús tyaxtsøøy ja pyabøjkpitøjk jøts ja tnimaay:

—Njanch'ayo'ijxpy øts yø jaa'y, tigøøk xøøw øts yø kujk xmøøtsinaañidi, jøts tø ja kyaaky kyøjxnidi. Ka' øts yø ayuu ngaxwā'andī jam tyøjkwindum, kuts yø jadi'iñi tuu'ajy y'ukjotkøjxnidit.

³³ Xjats ja pyabøjkpitøjk ñimaajyiyi:

—¿Mats ya jadine'en nbøjkin ja kaaky ja jii'kxy jøts yø mayjaa'y jadine'en kya'adyit, jøts nipønts ya?

³⁴ Jøts ja ojts tyii'byikyidi:

—¿Winaak mdsapkaaky japti?

Jøts ja wyandøø:

—Wixujkyi, jøts ja ajkxuna'jk waani.

³⁵ Xjats ja wyaañ jøts ku ja jaa'y y'ixa'aktit,

³⁶ jøts ja tnixajiyii'ñ wixujk ja tsapkaaky møøt ja ajkx, jøts ttamøja'wiyii'ñ ja Dios Teety. Jøts ja ttatujkiyii'ñ jøts ja ojts tmø'øy ja pyabøjkpitøjk, ja'ats ja yikwa'kxti jøts ja tmøødyi ja mayjaa'y.

³⁷ Niduki'iyi ja jaa'y ojts kyaydi jøts niduki'iyi kyujxidi. Yjaaktyimbyøkmujktinim ja' ja kaakwyindank ja wixujk kach.

³⁸ Nimaktaxk mil idø'øen ja jaa'y ojts kyaydi tum yaa'dyøjk, abiky ja tø'øxyøjkti møøt ja mutskuna'jkti, ka'ap ja yikmachowdi.

³⁹ Jøtsnim ja nwindson'ajtim Jesús tminawya'kxi ja jaa'y, jøts ja ojts ttatøjkiñi ja barki jøts ja ñijkxy jam Magdala etjotp.

16

Ku ja fariseotøjk t'amidoodøø ja Jesús jøts ja ttuk'ejxtit ja myilagri'ajtin

¹ Kuts idø'øen ja jam jade'en ñijkxy, xjats ja fariseotøjk ja nimejniyøø møøt saduceotøjkti, jøts ja nugo kyajpxy'ejxwa'añiyi. Ja' ja ojts t'amidowdi jøts ja myilagri'ajtin ja ttu'unt, jøts tyuk'ejxidit ja myøk'ajtin jam tsajpwemp, pøni janch ku dø'øen ja y'ukdiosu'ngi.

² Jøts ja yide'en t'adsøøy:

—Ku ja et chuu'ji, pø mnømpxi meets: “Tø'kxwamp tam yø et, kumi tsajpts yø tsajp kyaxi'iky”;

³ jøts ku yjøpy'aty jøts mnømidi: “Ka' tam yø et yam tyø'kxwa'añ, kumi tsajpts yø tsajp kyaxi'iky jøts yoots møøt.” ¡Meets win'øø'mbidi! ¿Sa ja tsajp wa'ats xnijawidi ku ja jade'en kyaxi'iky, jøts meets øts nja' ka' xnija'wiyi ku ja mjayiktuk'ejxti?

⁴ Yø tsaachka'øyjaay øts idø'øn jade'en x'amidoodip jøts yiktuk'ejxtit ja milagri; ja'ayits jadu'uk y'ukyiktuk'ejxnidit nayide'en sa ja Dios ttuun ja Jonás.

Xjats ja twinwa'ktuujty, jøts ja tyuu'døjkiyiñ.

Ja fariseit jaa'y y'ixpøjkin

⁵ Kuts ja pyabøjkpitøjk ñajxtøø jam nøø agø'øm jam jaduktamajñ, jøts ja tja'dyigøydi ja chapkaaky, ka'ap ja wyinaty tø tkondi.

⁶ Winets ja nwindsøn'ajtim Jesús ja ñimaajyidi:

—Ukmadowdim; øyim mnay'ejx'etidit, ejxim yø fariseotøjk, ejxim yø saduceotøjk xkaajyidi yø chapkaaky midi wenk levaduri møøt.

⁷ Jøts ja pabøjkpitøjk agø'ømyi ñawyambi ñaxwa'jkidøø:

—Ja'agøjxp yø jade'en wya'añ ku ndsapkaaky tø ngakø'ñindi.

⁸ Myadoow ja nwindsøn'ajtim Jesús ja', jøts ja tnimaay:

—¿Tigøjxp ku jade'en mwa'andi jøts ku mdsapkaaky kya'etti? ¡Niwine'enin meets ja janchja'win xkidyimyjagyepy!

⁹ ¿Ka'ap meets ja xja'gyuki, jøts ka' meets ja xja'myech ja tsapkaaky midi magoxk, midi øts ojs

nyikwa'kxy, jøts øts ja ojts nmo'odi ja ñimagoxk milbi jaä'y, jøts ka' meets ja xja'myech winaak kach ojts xpøkmukti ja abu'xk?

¹⁰ ¿Jøts ni ja'baat xkaja'myatsti ja wixujkpi tsapkaaky midi ndagumaay ja maktaxk milbi jaä'y, jøts winaak kach ojts xjaakpøkmukti?

¹¹ ¿Sudso'ampyts ka' xja'gyukidi jøts ku øts ka' ndijy ja tyimchapkaaky midi wenk levaduri møøt, midi yja'ajttip ja fariseotøjk møøt ja saduceotøjkti?

¹² Xjaanimts ja tja'gyukidi jøts ku ja nwindsøn'ajtim Jesús kidi tyimyjatsapkaagyip ja wyinaty tø tñigajpxy midi wenk levaduri møøt, pø ja ixpøjkinxi ja wyinaty tø tijy jade'en midi ñanky'ixpøjkidip ja fariseotøjkti møøt ja saduceotøjkti.

Ku ja Pedro wyaañ jøts ku ja Jesús yja'aji yiknitsokp, ja Cristo

¹³ Xjats ku ja nwindsøn'ajtim Jesús yja'jty jam etjotp midi ja Cesarea de Filipit kajp y'etip, jamts ja tyiktiy ja pyabøjkpitøjk, jøts ja tñimaay:

—¿Sa jaä'y wya'andi, pønik øts?

¹⁴ Jøts ja wyandi:

—Jade'en winaagin wya'andi jøts ku mets Juan Bautista; jøts jadu'uk wyamidip jøts ku mets mElías, jøts pømbits wamidip jøts ku mets mJeremías, uk pøngapøn Dios kyugajpxy.

¹⁵ Winets ja Jesús tyiktiy:

—Jøts meets, ¿sa mee mwā'añ, pøn øts idø'øn?

¹⁶ Xjats ja Simón Pedro t'adsøøy:

—Ja yiknitsokpi mets, ja Cristo, ja Dios U'nk.

¹⁷ Jøts nwindsøn'ajtim Jesús ja t'adsøøy, jøts ja tñimaay:

—Mets Simón idø'øn janchjaakxøñim, Jonás myajnkun'k, ka' pøn jaa'yip mets yø jade'en mdük'ejxip, ja Dios Teetyxi dø'øn yø jade'en mdüknija'wiyip pøn jap tsajpjøtpy.

¹⁸ Tiiy me mwĩnmay, møk me mwĩnmay, patyts idø'øn myikxømø'ø y Pedro midi tyijpy tsaa. Tøts mets nikøjxp øts yam nyiktso'onda'akwa'añ ja nja'; jøts øts ja nyikmøjta'akt, ni o'jkin niti ja mibaat kyamimada'agit.

¹⁹ Øts me nmøøpy ja kutujk'ajtin; pøni pøn mets ya ja pyøky maa'kxujkip, nayide'en ja tsajpjøtpy yikmaa'kxukt. Jøts pøni pøn mets ya mgamaa'kxujkpy, nayide'en ja tsajpjøtpy kyayikmaa'kxukt.

²⁰ Xjats ja nwindson'ajtim Jesús tnimaay møkta'aky ja pyabøjkpitøjk, jøts ja ka'ap pøn ttukmado'odit ku ja' Cristo, ku ja yiknitsø'øky.

Ku ja Jesús tnigajpxy ja y'o'jkin

²¹ Winetyipts ja nwindson'ajtim Jesús wa'ats tnigajpxøjkiyi'ñ, jøts ja ttukmadø y ja pyabøjkpitøjk jøts ku ja ñøjkxt jam Jerusalén, jøts ku ja møjaa'dyøjk ja yikxon yik'ayo'ombaadiyit møøt ja teetywindsøndøjkti jøts ja kajpxwejpitøjkti. Ojts ja ttukmadø y jøts ku ja yik'oogit, jujkpyøkpts ja jadigojk, jøts ja kyidigøøk xøøw pyidsø'ømt jadigojk oo'kpi jutjøtpy.

²² Winets ja Pedro ja ojts yiknijkxyi abiky, jøts ja møkta'aky ñimaajyi:

—jWindsøn'ajtim, katsojknim Dios Teety jøts jade'en mjatt! jKa'ap jade'en mdyimyjatt mdyim-gyubatt!

23 Xjats ja nwindson'ajtim Jesús tniwa'kjimbijty ja Pedro, jøts ja tnimaay:

—iMets miku' jiwa'ak, majstutk øts!, nugo mets mjanchyik'adukti. Ka' mets jade'en mwinmay sam Dios Teety wyinmayin, jade'en me mwinmay sam øy pøn naḡwii'ñit jaa'y.

24 Winets ja nwindson'ajtim Jesús tnimaay ja pyabøjkpitøjk:

—Pøni pøn tsojkin tmøøt'ajtp jøts øts nja' jade'en xpaduujnit, ka' mibaat køøm ñadyunk'atit, ja'ayi ku amumjoojt ñadyamiyoxit ja ayo'on jøts idøøn jade'en tpadu'unt.

25 Pønts kajade'enduñim nay'ejxip, niwindem ja tkapaaty ja nitso'ok'ajtin; jøts pøn ø xku'ayo'ombajtip, ja' idøøn tpaatp ja nitso'ok'ajtin.

26 ¿Ja ti ja ñiwyā'ant øy ja jaa'y tjaja'bøjkixy ja naḡwiiñ'ajtin, jøts ja y'anmija'win ne'egi wyindigøy? Jabi ka'axi mibaat ja ñitso'ok'ajtin ja tkuju'uty.

27 Ja Dios Teety øts myøk'ajtin nmimejnip møøt ja ankilistøjkti, jøts øts nwandu'undit sa jaty nidu'uk nidu'uk pyaat'aty yiktu'undit.

28 Janch øts idøøn nwa'añ, jøts ku ya ja winaagindi pøn ka'ooktip kunim ja jawyeen tyimy'uk'ejxtit ku ø nmime'ent ja Dios Teety kyutujk midi yjaa'y ja tyanitanaapy.

17

Ku ja Jesús adsu'jky y'atstigajch, amuum chamambøjkijxy

1 Xjats ku kyidudujk xøøw'ajty, winets ja nwindson'ajtim Jesús tmøødiyih'ñ ja Pedro, jøts ja Juan møøt ja y'ajch Jacobo, jøts ja ojts ñøjkxti ma ja kojpk jam janch køjxp;

2 jamts ja ñanktyigajtsi, wemp am ja tyimy'ejxti ku wyeen y'aaw ja jade'en yjajty sam xøøw y'añin, jøts ja wyet jade'en pyoobyih'ñ sam ja jajin.

3 Jøts ja jotmøn t'ejxpaaatti ja Moisés jøts ja Elías, ku nwindson'ajtim Jesús ja tmøøtmadya'aky.

4 Winets ja Pedro tnimaay ja nwindson'ajtim Jesús:

—Windsøn'ajtim, jtyimy'øy'ajtp ku øø ndyimyam'aty! Pøni mdsøjkpy jøts øøts ujts'aadyøjk tigøøk nyik'øyit; tu'uk mets mja', tu'uk Moisés yja' jøts tu'uk Elías yja'.

5 Nay ixamnim ja Pedro jade'en wya'añ ku ja yoots jam yja'jty janchyikwin'oo'kpiim, jøts ja tuki'iyi tyik'adigøø; jøts jap yootsjøtpy ja Dios Teety y'ayuujk yikmadøøy ku yide'en wya'añ:

—N'u'nk øts idø'øn ya'at, yø' øts idø'øn njaaktajotkujk'ajtpy. Mimadowdi pøni sa wya'añ.

6 Kuts ja jade'en tmadowdi, xjats ja winda'ak ñaxkidakti, yikxon ja yjantymchø'jkidøø.

7 Jøts nwindson'ajtim Jesús ja ñimejnidi, jøts ja tyojnidi, yide'en ja ñimaajyidi:

—Pidø'økti; kidi mdsø'øgidi.

8 Xjats ku ja y'ejxjø'øktøø nima ja pøn tka'uk'ejxpatnidi, nadyu'uk ja nwindson'ajtim Jesús jam.

9 Jøts ja kyidaknidi, ku kojpkøjxp choondi, jamts ja nwindson'ajtim Jesús ja møktā'aky y'ana'amidøø:

—Kidi yø pøn xamimadya'akti midi tø x'ejxti, jaanim ku øts wyinaty tø njujkyiky jadigojk.

¹⁰ Winets ja pyabøjkpitøjk ja tyiibyøjkiyi:

—¿Tigøjxpimts yø kajpxwejpitøjk jade'en wya'andi jøts ku ja Elías jawyeen mye'ent, jøts ix'oojknim ja yiknitsokpi?

¹¹ Xjats ja nwindson'ajtim Jesús ja ojts yide'en t'adsøy:

—Janch me'emp idø'øn ja Elías, jøts ja tuki'iysi tyik'øyigyøxt.

¹² Øtsts wamp jøts meets nnøjmi jøts ku Elías tø y'atmengojmi, jøts nigidi tø t'ejxkapti, tø ja twandundi sam y'anmija'win tyimñekti. Nayide'ents øts yø xyik'ayo'ombaattit.

¹³ Jaanimts ja pyabøjkpitøjk ja tja'gyukidøø, jøts kudam ja nwindson'ajtim Jesús ja ja' tyamimadya'agyidi ja Juan Bautista ku ja Elías tijy tø y'atmengojmi.

Ku ja Jesús tyikmøkpiky tu'uk ja mixyu'nk pøn wyinaty ja miku' tø tyatøkiyi

¹⁴ Xjats ku ja ojts yja'atti ma jaa'y jam wyinaty, jamts ja nwindson'ajtim Jesús tu'uk ja jaa'y ñimejniyi jøts ja ojts wyinguxanay'øyiysi, yide'en ja ñimaajyi:

¹⁵ —Me teety, ayo'ejxik øts n'u'nk, adsu'jky adsu'jky mø'ødyi pa'am yø pyaadyiysi jøts tsaach'ijxyim tyuñiysi; atsnaxkidakp may'ojk jam jønjojp, uk nøøjøtpy paat ñødøki.

¹⁶ Ixyats mets yø mbabøjkpitøjk yø tønjanimiñ, ka'ats yø myayidi jøts yø tyikmøkpøktit.

¹⁷ Jøts ja nwindson'ajtim Jesús y'adsøøy, jøts tnøjmi pøn jam wyinaty:

—¿Mee kajanchja'wibidi, yø mbøky nugo myik-majadaktip! ¿Ma windemnim meets ngajpxy n'ayuujk xpabøjkit? ¿Jøts windemnim meets yø yjade'embì xuktatso'okt ku øts yø ejtp njanch-janigajpx'ity? Meets, yikmen yø pamaa'y.

¹⁸ Jøts ja nwindson'ajtim Jesús ojts tkajxpidsimy ja miku', ojts ja ttukmajtstu'uty ja mixy jøts idø'øn ja jade'en jatyi tyimyøkpjiky.

¹⁹ Winetnimts ja nwindson'ajtim Jesús ja pyabøjkpitøjk myigajpxi jibiky'ampy, jøts ja ojts yiktiiyiyi:

—¿Tigøjxp ku øøts yø miku' tø ngayikpidsimy?

²⁰ Xjats ja nwindson'ajtim Jesús ja ñimaajyidi:

—Ja'agøjxp ku mjanchja'win kyamøkidi. Janch øts idø'øn nwa'añ ku jeexyip ja mjanchja'win ñiyjade'en xmøøt'atti sam mortas pajkin, øyts meets yø kojpk xnøjmit: “Jiwa'ak ya jøts mnøjkxt abikytsoo”; jiwa'akpts ja kojpk. Ka' mee ti mgamayit ku janchja'win møk xjanchmøøt'attit.

²¹ Yø yjade'embì miku' ja yø iiy pyidsimy ku Dios n'ajot'ajtint, ku n'amaay'ajtint ngagugaa'yint ngagu'uujka'ant.

Ku ja Jesús tñigajpxy jadigojk ja y'o'jkin

²² Nay ixjamnim idø'øn ja wyinaty wyidetinim ma ja et txøøwi Galilea, ku ja nwindson'ajtim Jesús ja ojts tyukmadøyidi jøts ku mayjaa'y ja kyøyakit,

²³ jøts ja yik'oogit, jujkpyøkpts ja jadigojk kyidigøøk xøøw. Ja'ats ja tyimchaachjot-mayja'widøø ku ja jade'en tnija'widøø.

Ku ja tsaptøjk yikugubety

²⁴ Xjats ku ja nwindson'ajtim Jesús tmøøtja'jty ja pyabøjkpitøjk jam Capernaumit kajpkøjxp, jamts ja

jaa'dyi pøn yiktsaptøjkugubajttip, ja'ats idø'øn ojts tñinøjkxti ja Pedro, jøts ja ojts tyiktøwdi:

—¿Ka' meets yø myik'ixpøjkpi tkugubety yø tsaptøjk?

²⁵ Jøts ja Pedro y'adsøøy:

—Kyugubejtpyxi yø'.

Xjats ku ja Pedro tyøjkiyi'ñ tøjkjøtpy, japts ja nwindson'ajtim Jesús ja jawyeen ñimaajyi:

—¿Sa me Simón mwimay? ¿Pøn yjawi yø windsøndøjk tyukugubajttip, ja kyø'ømigu'uk uk ja wenk jaa'y?

²⁶ Jøts ja Pedro y'adsøøy:

—Ja wenk jaa'y yø tyukugubajttip.

Jøts ja nwindson'ajtim Jesús y'adsowimbijty:

—Aaa ka'ats tam adøm idø'øn xpaat'ajtyim nyajkint ja tsaptøjk kugubajtin, pøni abiky jaa'y tyukugubajttip.

²⁷ Jøts nipøn ngayik'ambøjkin, nøjkx mejy'agø'øm jøts jam xjuutt ja ajkx, pøni midi inet mijawyeen mjuu'tpy, ja' y'aawjøltpyts inet meen xpaatt tu'uk. Pyaatpts inet ja' jøts ja namajtsk ngugubajtin'ajtin; ja'ats myiknøjkxp jøts x'atsmo'ot ja yikugubajtpi.

18

Pøn idø'øn jawaani møj ma Dios ja yjaa'y ja kyutujk ttanitani

¹ Ñiñayi winets ja nwindson'ajtim Jesús pyabøjkpitøjk ñimejniyi, jøts ja ojts yiktiiyiyi:

—¿Pømbi øø nidu'ugin ja tyimy'ukmøjtøkip ku ja mgutujk xyiknaxkida'akt?

2 Winets ja nwindson'ajtim Jesús tyaajxiyih'ñ tu'uk mutsk mixyu'nk, jøts ja tyikwa'k'øiyih'ñ ja y'agujk'amdi,

3 jøts ja tnimaay ja pyabøjkpitøjk:

—Janch øts idø'on nwa'añ, pøni ka' meets ja mdsinaa'yin xyiktigach, pøni ka' meets jade'en mnabyikta'agyi sam ne'egi mutskuna'jk yja'gyukindi, ka' mee mibaat jade'en myikupøkt jøts mdøkidit ma Dios ja kyutujk ttanitani ja naxwii'ñit jaa'y.

4 Patyts ja' myøjtøkit jam ma Dios ja kyutujk ttanitani ja naxwii'ñit jaa'y ja' pøn yik'ayowim jaa'y'ajtp, pøn jade'en nabyiktaajkip sam ya'at mutsku'ngin.

5 Jøts øy pøn pøni xukpøjkidip øts ja nja' midi yik'ayowim jaa'y'ajttip sam ya'at mutsku'ngin, øts idø'on ja wyinaty kø'øm xkupøjkp.

Ja' midi yikpøkpyajtp

6 Jøts pøni pøn t'ukyikpøkyu'ump øts ja nja' pøn ø xjanchja'widip, ne'egi ja øyik y'ijty jøts ja mejjyøtpy yikuwibejpit, ku møj paandaak ja y'ukyiktayukxotsit.

7 Janch kawindøøp yø naxwii'ñit ku ja y'ity midi jaa'y tyikpøkpyajtp! Nøjkx naxpyim yø jade'en, jøts iyjanch'ayøøy ja' pøn ja myigu'uk yikpøkyundip!

8 'Paty nayide'en pøni myikpøkpyajttip mgø' mdeky, ja'ayi ku xtyimwyiboottit jøts jagam xpikta'aktit; ne'egi øy'atp ku køtuk paktuk mdøkit jap ma Dios jam, jøts kidi ka'pxy xminijkxy ja mgø' mdeky jap infierno.

9 Jøts pøni yø mween myikpøkyuujnip, nawy- eenjuudits jøts abiky xpikta'akt; ne'egits øy'atp ku

ne'egi wendu'uk mdøkít jap ma ja Dios, jøts kidi yø mween ka'pxy xmidøki ku myikuwibepít jap jønjøtpy midi jap inferno.

Ku ja Jesús tmadyakpaajty tu'uk ja borreek midi tigøøpy

¹⁰ 'Kidits øts ja n'u'nk n'unajk xmi jotma'jtidi. Janch øts idø'øn nwa'añ jøts ku y'ankilis ja jap tsajpjøtpyti Dios Teety wyingujkpy.

¹¹ Pø ja'axi tø nnimiñ jøts øts ja nyiknitso'ok'attit pøn ja pyøky yikwindigø'øyiñidip.

¹² '¿Sa mee m'ukwa'añ? Ku jaa'y jam wyinaty tmøøt'aty nimagø'pxy ja borreegi, jøts kuts ja tu'uk tyigø'øty, ¿ti ka'ap ja t'ats'ixa'at? Kuwanixi ja jam kojpkøjxp tyikta'ant ja ñimakta'pxy myaktaxujkpi, jøts ja t'ats'ixa'at midi tø tyigøy.

¹³ Kuts ja tpaatt, ne'egi tyaxonda'akpts ja' midi tø y'uktigøy jøts nika'ap ja jade'en ne'egi yiktaxonda'akti ja ñimakta'pxy myaktaxujkpi midi kadigøødyip.

¹⁴ Jade'ents meets idø'øn ja Dios Teety mjawiyidi pøn jap tsajpjøtpy, ka'ap ja ttsøky jøts y'u'nk y'unajk ja jade'en tyigø'øty.

Sa nmigu'uktøjk nmaa'kxuujkint

¹⁵ 'Pøni jam mmigu'uk mga'ødyuñiyi, nagyajpxidits anadyu'uk jøts xukwinjawit ja pyøky. Pøni kyupijkpyts, tøts ja mja' wyinaty myajada'aky jøts ja pyøky nayide'en tkagu'ayo'ombaadit.

¹⁶ Kuts mgagupøkit ku ka' mmadoowa'anit, winets tu'uk majtsk jaa'y xwaadso'ot jøts ja t'ejxtit tnijawidit pøni sa jam pøn wya'añ.

17 Kuts ja kyayikmøjpiktakmidit, winets xuk-mado'ot ja mayjaa'y pøn tjanchja'widip ja Dios; jøts ku ni ja'baat kyayikmøjpiktakmidit, winets ja jade'en xpikta'aktit sam ja jaa'y pøn Dios tka-janchja'widip, uk jade'en sam yikugubajtpitøjk yikwa'andi yiktejt.

18 'Janch meets idø'øn nnøjmi, pøni pøn meets ya ja pyøky maa'kxuujkip, nayide'en ja tsajpjøtpy yikmaa'kxukt. Jøts pøni pøn mets ya mgamaa'kxujkpy, nayide'en ja tsajpjøtpy kyayikmaa'kxukt.

19 'Nayi ndukmadoodip ixyam, pøni pøn tu'uk majtsk nagyajpxidip, jøts t'amidoowa'andi tpøktsoowa'andi tigati ja Dios Teety, mo'ojidipts ja'.

20 Pøni mā tu'uk majtsk ñamyukyidi ja jaa'y øts køjxp, jamts øts ja møøt n'ity.

21 Xjats ja Pedro ojts tninijkxy ja nwindson'ajtim Jesús, jøts ja ttiibyijky:

—Windsøn'ajtim, ¿winaak ojkin øts ja nmigu'uk nmaa'kxt ku øts ja xka'ødyu'unt kawinaak ojk? ¿Øy ku wixujk ojkin?

22 Jøts ja nwindson'ajtim Jesús y'adsøoy:

—Ka'axi me nnøjmi jøts ku ja'ayi wixujk ojk. Nømpxi øts yam nwa'añ jøts kawinaak ojk pøni winaak ojk meets ja jaa'y mmidundigøyidi.

Ku ja Jesús tmadyakpaajty ja tumbi pøn tka-maa'kxujkp ja myigu'uk

23 'Jade'en idø'øn ja Dios kyutujk sam tu'uk ja windsønin pøn ja tyumbitøjk ojts tyojpayø'øy.

24 Exam idø'øn wyinaty tñibøkinim, ku ja ojts yiktaniway tu'uk ja tyumbi midi ja wyinaty kawine'en miyoj'ajtiyip.

25 Kumi ka'ats ja tyumbi myeeñ ti ja tyagubap ja yoj, winets ja windsøn wyaañ jøts wan tyiknitookti møøt y'u'nk ñidø'øxy, jøts pøni ti jaty jam pyikta'aky'ajttip. Jøts pøni wine'en ja choobaatti, ja'ats ja yoj kyudøkip.

26 Xjats ja tumbi tminuu'kxaajky ja wyindsøn, ojts ja twinguxani, yide'en ja tñimaay: “Windsøn, miduda'aky'ajtk øts, ngubatp øts ja tuki'iyi.”

27 Xjats ja windsøn ja ojts y'ayo'ijxyi, jøts ja yoj ja tyamaa'kxuujkyi jøts ja yik'awa'atspidsøjmiyi.

28 Kuuyi ja tumbi ja'ayi pyidsimy, jøts ja ojts tu'uk tminabyaadyiyi ja myigu'uk ja myøøtumbi, ja' ja miyoj'ajtiyip tu'uk pesi majtsk pesi. Yukpajkiixpy ja ojts tyimyach jøts ja jadi'ni tyukpani, yide'en ja møk'ampy tñøjmi: “iPe'tpy xkubatt ja yoj, yak putyi!”

29 Winets ja myigu'uk ñagyuxendyaajkøø ja' wyindum jøts ja ojts myinuu'kxa'agyiyi: “Miduda'aky'ajtk øts, ngubatp øts ja tuki'iyi.”

30 Jøts ja yjadu'ukpi, ka'ap ja tkupijky, ojts ja ñijkxy jøts ja ojts tpikta'aky ja myigu'uk jap puxøjkjøtpy kunim ja tymgyubatt ja yoj.

31 Kuts ja yjadu'ukpi ja jade'en t'ejxtøø, tyimy'ayojidi ja' jøts ja ojts t'atstukmadowdi ja wyindsøn sa jaty ja wyinaty tø t'ejxti.

32 Winets ja windsøn ja tyumbi tñankwyadsojøø midi idø'øn jade'en adøtsp, jøts ja tñimaay: “iMets miku!, burri! Tø mets ja myoj ndamee'kxy ku me tø xminuu'kxa'aky.

33 Nayide'en me ndijy jeexyip ja mmigu'uk x'ayo'ijxy sa me tɔ n'ayo'ijxyin."

34 Yikxon ja windsøn yjantyimy'ambijky, jɔts ja tkejxy ayoobi kunim ja myigubajtkøxit.

35 Jɔts ja nwindsøn'ajtim Jesús yide'en myadyak'abajtiyih'ñ:

—Nayide'en meets ja Dios Teety mduniyit pɔni ka' amumjoojt xmaa'kxukti ja mmigu'uk.

19

Ku ja Jesús kyajpxwiyj sudso ja amajtsk'ajtin ñaxy

1 Ku ja nwindsøn'ajtim Jesús jade'en wyinaty tɔ wya'añ, xjats ja chøø'ñ Galilea etjotp, jɔts ja ñijkxy jam Jude'it etjotp midi tãmp nøøbukø'øm Jordán.

2 May jaa'y ja pawidejtiyip, jɔts ja jam may tyikt-søjky ja pamaa'y.

3 Winets ja fariseotøjk winaagin tnimendi ja nwindsøn'ajtim Jesús jɔts ja tkajpxy'ejxwa'andi, ojts ja tyiktøwdi:

—¿Kutuky yø jade'en jɔts øy pøn tmajtstu'utt ñidø'øxy ku ja yiin waan tyundigøy?

4 Jɔts ja t'adsøøy:

—¿Ka'anim meets ja Dios kyajpxy x'ejxi? Pø patyxi ja yaa'y ja tø'øxy tyik'øyyih'ñ pøn xyiktso'ondaajkindip.

5 Nayi nøøm ja': "Ja'agøjxp ja yaa'dyøjk ja ty-eety ja tyaak tmajtstu'utt, jɔts ja ñidø'øxy ja møøt tu'ugyi ja'ayi chøønit."

6 Tu'ugyi ja ñamyayi tymbyaaty øy ja jaa'y yjanamajtskidi, paty ka'ap pyaat'atyj jɔts jaa'y ja

tnankñawya'kxit midi Dios tō ttanibiktaagi tu'uk yaa'y jōts tu'uk tō'ōxy.

⁷ Xjats ja ttiibyōjkti:

—Jōts tigōjxpts ja Moisés tyajky ja tīy'ajtin ja tō'ōxyōjk jōts ōy ja yikmajtstu'utt?

⁸ Jōts ja nwindson'ajtim Jesús ja t'adsōy:

—Meets jade'en ja mgawindi'yajtin myikmajadakpy ku ja Moisés ojts tyikutuky jōts ōy xminawya'kxidit ja mnidō'ōxy; ka'apts yō y'ijty jade'en tso'onda'agyip.

⁹ Ōts wamp, pōni pōn tminawya'kxip ja ñidō'ōxy a'ōy'ampy, ku ja wenk yaa'dyōjk ja wyinaty tjagamōt'aty, jōts ja tmōt'amajtskigyojmi ja wenk tō'ōxyōjk, ja' idō'ōn pōktyump; nayi pōky ja nayide'en pōn tmōt'amajtskiyip ja tō'ōxyōjk midi tō yikmajtstu'uty.

¹⁰ Xjats ja pyabōjkpitōjk ja ñimaajyiyōō:

—Pōni jade'endam yaa'dyōjk tmōtsōōni ja ñidō'ōxy, ne'egi ōy tamts ja' ku nguidy-imy'amajtska'ant.

¹¹ Jōts ja nwindson'ajtim Jesús ja ñimaajyidōō:

—Pō janch jade'en, ka'apts niduki'iyi tkupōkti. Ka'ap ya'at winmaa'ñ pōn nugo ajāwi tja'gyuki, ja'ayi dō'ōn tkupōjktip pōn Dios mōōjyidip.

¹² Ja mayjōōjp ja winmaa'ñ jōts jaa'y kya'amajtskidi: ku winaagin ka'pxy kyamendi naxwiñ, winaagints kō'ōm ñadyuñidi ku ñay'isabikyidi jōts ka' y'amajtskidit, jōts ja winaagin pōn tkagu'amajtskip ja Dios kyutujk. Pōni pōn jade'en ttunwamp, wants jade'en ttuñ.

Ku ja Jesús tkunuu'kxy ja mutskuna'jk

13 Winets ja nwindson'ajtim Jesús yiktanımıñ mutsk mixyuna'jkti jøts ja tkønixajt jøts ja tku'amidowit; jøts ja pyabøjkpitøjk yide'en ja tnimaay ja jaa'y pøn twaamendip ja mutskuna'jk jøts kyatøkidit ja mutskuna'jk.

14 Yide'ents ja nwindson'ajtim Jesús wyaañ:

—Majtstu'utti, wan øts yø mutskuna'jk xnimendi, kidi meets yø xkayiknajxni; yø' dø'øn Dios ja'ajtidip pøn jade'endi sam yø mutskuna'jkindi, ja'ats tpaattip ja Dios kyutujk.

15 Jøts ja ojts tkunuu'kxy ja mutskuna'jk, jøts ja jam ojts cho'oni.

Ja kumeeñ jaa'y

16 Tu'uk idø'øn una'jk jaa'y, ja'ats ojts t'ats'ixy ja nwindson'ajtim Jesús, jøts ja t'atsnimaay:

—Mets øyjaa'y yik'ixpøjkpi, ¿ti øy'ajtin ø ndu'ump jøts øts ja n'anmija'win ja jujky'ajtin tpaatt xemikøjxp?

17 Xjats ja nwindson'ajtim Jesús ja tnimaay:

—¿Tiku ø xnøjmi jøts ku ø n'øyi? Tu'ugyi ja' midi øy, jøts ja Dios idø'øn ja'. Pøni mbaatwampyts ja jujky'ajtin xemikøjxp, paduujnits ja Dios kyutujk.

18 Jøts ja una'jk jaa'y wyaañ:

—¿Midi'ibi?

Jøts ja nwindson'ajtim Jesús tnimaay:

—Kidi myikjaa'y'øøky; kidi mmigu'uk ñidø'øxy xpøjkxi; kidi mmeech; kidi pøn xwindaay'aty;

19 windsø'øgi mdeety mdaak; jøts tsok mmigu'uk sam kø'øm mnachøkyin.

20 Jøts ja una'jk jaa'y yide'en tnimaay ja nwindson'ajtim:

—Tø øts yø jade'en njatunguixy, jaayim øts yø jade'en mbaduñ ku nmutsk'aty. ¿Tits øts idø'on njaaktu'ump?

²¹ Jøts ja nwindson'ajtim Jesús ja ñimaajyøø:

—Pøni øy yikxon mjaa'y'atwa'añ, nøjkx x'atsto'okjø'økiy ti jaty jam mjagyejpy jøts xmo'ot ja ñimeeñ ja ayoobi jaa'y, winets xpaatt ja øy'ajtin ja xondaajkin jap tsajpjøtpty; ku jade'en x'uktu'unt, winets mme'ent jøts ø xpawidett.

²² Xjats ku ja jade'en tmadøøy, jøts ja yjot-madyøjkii'ñ, kumi jantymgyumeeñ, kumi jantymgyubiktā'aky idø'on ja'.

²³ Winets ja nwindson'ajtim Jesús tnimaay ja pyabøjkpitøjk:

—Øts yam tyimwyamp jøts ku møk y'adukyi jøts kumeeñ jaa'y tpaajttit ja Dios kyutujk midi jap tsajpjøtpty.

²⁴ Jøts jaaktyimwyamp øts jøts ku ja kumeeñ jaa'y janch apeni ñaxti mā Dios ja kyutujk ttanitanī tuki'iyi, pø ne'egi tsojk ñaxt ja møj jiyujk jap xu'unjutjøtpty.

²⁵ Kuuyi ja pyabøjkpitøjk ja jade'en tmadoodøø, janch ñigyumaap ja tyimya'widøø, jøts ja xem yam ñayiktøøjidøø:

—¿Pønimts idø'on nitso'ok'atp?

²⁶ Xjats ja nwindson'ajtim Jesús ja ojts y'ijxyidi, jøts ja ñimaajyøø:

—Ka'ap yø øy pøn jaa'y kø'øm ñankñitso'ogiyit, ja Dios ja'ayi myøøt'ajtpy ja møk'ajtin sudso xyiknitsoojkint, niti Dios tkatsepjawi.

²⁷ Xjats ja Pedro tyiktiy:

—Windsøn'ajtim, tø øø tuki'iyi n'ixmajtskixy ti jaty øøts y'ity njagyejpy, jøts øø tø ndsøøñ jøts me myikpawidity. ¿Tits øøts idø'øñ nbaatp, ti øøts idø'øñ nbøkp?

²⁸ Jøts ja nwindson'ajtim Jesús ja t'adsøøy:

—Janch øts idø'øñ nwa'añ, ku yja'att ja xøøw ja jumøjt ku tuki'iyi yjemyigyøxt jadigojk, ku ø n'ixa'akt ngutujktaajkjøtpy ku øts ja møk'ajtin nmi'ixa'akt, jøts meets wine'enin meets ixa xpawidity, xnayimøøt'ixa'akp meets nayide'en nimakmajtsk jap kutujktaajkjøtpy, jøts xiidyu'undit ja Israelit jaa'y niduki'iyi.

²⁹ Jøts nayide'en pøn jaty tø tmajststutkøxti ja tyøjk, ja myigu'uktøjk, chø' y'uch, tyeety tyaak, y'u'nk ñidø'øxy, uk ñaajx kyam tmajststu'uttibaat øts ngutujkøjxp, yikmo'odipts ja jinaxy jinaxy øy ti, jøts pyaattip ja' ja jujky'ajtin midi xemikøjxp.

³⁰ Jøts may ja wyindigø'ødyit pøn ixyam namyøjpiktaajkidip kø'øm; jøts pøn ixyam ne'egi windigøy'ejttip, ja'ats ne'egi nøjkx møjtøkidip.

20

Ku ja Jesús tmadyakpaajty ja tumbitøjk

¹ Jade'enin idø'øñ ja Dios kyutujk midi yjaa'y tyanitanaapy sam tu'uk jaa'y kyugam'atyin jøts ja chøøñ jøpyi jøpyi tumbi ixaabyi jøts ja y'uivitsa'am pyidø'økt.

² Ojts ja tyikwin'øyiidi møøt ja tumbitøjk, øy ja tmiju'uty tu'uk puxmeeñ tukxøøw, jøts ja ojts tkexy tumbi jam kyamjotp.

³ Jøts idø'øn ja ojts cho'ongojmi, ja xøøw wyinaty tuk'ajopu'nk, jøts ja jap maayjøtpy ojts tjaak'ixy ja jaa'y pøn awatsidip.

⁴ Yide'en ja tnimaay: “Nøjkx mee nayide'en mduñ jap kamjøtpy, jøts nmiju'udyit nayide'en sam pyaat'aty.” Winets ja ojts ñøjxxti.

⁵ Xjats ja windsøn cho'ongojmi ku ja xøøw kyukiyi'ñ, nayide'en winakxyøøw nay ja tumbi dø'øn ja y'ats'ejxkojmip.

⁶ Jøts ku ja xøøw jawaani kyajajxni, xjats ja ojts cho'ongojmi tumbi ixaabyi, jøts ja ojts ñijkxy nay jap maayjøtpy, jøts ja ojts tjaakpaaty ja jaa'y pøn wyinaty awatsidip, yide'en ja tnimaay: “¿Tiku meets ya nugo mxinaxy, ti kidi mee mdunwa'añ?”

⁷ Yide'ents ja y'adsoodøø: “Kumi ka'ap øø pøn xyiktunkpaatwa'añ.” Xjats idø'øn ja tnimaay: “Nayi nøjkxts mdundi øts ngamjøtpy, jøts nmiju'udyit.”

⁸ Xjats ku y'ux'ajty, winets ja windsøn tnimaay ja tyumbi midi yiktump: “Yaajxi yø tumbitøjk jøts xmo'ot myijuu'ñ yø' jawyenidip pøn ix'oojk tø tyøkidi tumbi, jøts ja ix'oojk xmiju'uty pøn jawyeen tø tyøkidi tumbi.”

⁹ Winets ja myendøø pøn wyinaty ix'oojk tø tyøkidi tumbi ku ja xøøw jawaani kyajajxni, jøts ja myijuu'ñ ja ojts ka'pxy t'axajidi tu'uk puxmeeñ nidu'uk nidu'uk.

¹⁰ Xjats ku yja' ja tyaja'jtidoø pøn wyinaty jawyeen tø tyøkidi tumbi, jade'en ja wyinmaydi yikmiju'udyip ja tijy jawaani tsowi; nayide'en myijuu'ñ ja ojts t'axajidi tu'uk puxmeeñ nidu'ukjaty.

¹¹ Ku ja jade'en ojts t'axajidi ja myijuu'ñ, xjats ja

tni'ambøjktøø ja wyindsøn,

¹² yide'en ja tnimaadyøø: “Pøn ne'egi oojk tø yja'atti, ja'ayi tø tyundi tuk'hori; jøts ne'egi nayide'en tø xmijuy sam øø tø xmijuyin, jøts tøts øøts yikxon nduñ jøts øøts yikxon tukxinaxy tø nni'añ.”

¹³ Jøts ja windsøn y'adsøøy, yide'en ja winaagin yiknimaadyøø: “Ka' me migu'uk yam sa nduñ. ¿Ti kidi tø nnagyajpxyin jøts ku nmiju'uty tu'uk puxmeeñ?

¹⁴ Axaji yø mmijuu'ñ jøts mnøjkxnit. Nayide'en øts yø nmijuuwya'añ pøn oojk tø tyøkidi tumbi sam mee tø myikmijuyin.

¹⁵ ¿Pøn øts yø ndejin jade'en xkaduktu'ump pøni sa øts nmeen kø'øm nyiktunkpaatwa'añ? ¿Uk yø' idø'øn m'ama'at'ajtpy ku n'øyjaa'y'aty?”

¹⁶ Jøts ja Jesús jadigojk yide'en wya'añ:

—Jade'ents idø'øn ejx øts ja nwa'añ, pøn tandip ix'oojk, ja'ats ne'egi jawyenidip, jøts pøn jawyenidip, ja'ats ta'andip ix'oojk. Kumi may ja'adi pøn yiktukmadoodip jøts mye'endit, niwaanits ja'adi pøn yik'a'ejxidip jøts ty'a'andit. Nayide'ents ja Dios Teety ttu'unt ja naqxwii'ñit jaa'y.

Ku ja Jesús tnigajxpy jadigojk ja y'o'jkin

¹⁷ Xjats ku ja nwindsøn'ajtim Jesús jam wyinaty tuu'amni midi Jerusalén nøjxpx, winets ja abiky tjíwaay ja pyabøjkpitøjk midi nimakmajtskti, jøts ja tnimaay:

¹⁸ —Ixya tø nbejtyindi Jerusalén ma øts nyikøyakt, jøts øts ja teetywindsøndøjk, jøts øts ja kajpxwejpitøjk nyiktagidøkit pøn ø xyik'ooktip.

19 Ja'ats ø xkøya_{aktip} jøts øts ja xagidøkidit pøn ka'israelit ja_a'dyi, ja'ats ø xnixe'ektip xjaxe'ektip, ja'anim ø xwinwoptip xjipwoptip jøts øts ja xyikruspattit; kidigøøk xøøwts øts ja o'jkin nmimada'akt jøts ø njujkpyøkt jadigojk.

Ku ja tøøxyøjk t'amidøøy ja may'ajtin midi tyaak'ajtp ja Jacobo møøt ja Juan

20 Winets ja Zebedeo y'unajk jam myendøø møøt ja tyaak ma ja nwindson'ajtim Jesús jam wyinaty. Ja Juan idø'on ja' møøt ja Jacobo, ja'ats idø'on ja tyaak jam ojts twinguxani ja nwindson'ajtim Jesús, jøts ja t'amidoowa'añ tu'uk ja may'ajt.

21 Jøts nwindson'ajtim Jesús ja ojts yiktiiyiyi:

—¿Ti dø'on mdsøjkpy?

Jøts ja t'adsøøy, yide'en ja tnimaay:

—Tun may'ajt, jøts øts n'u'nk xyik'ixajkit ad-sow aduuk ku mgutujk xyiknaxkida'akt, tu'uk aga'ñ jøts jadu'uk anajy, jøts jade'en ja kutujk tmida'andit.

22 Jøts ja nwindson'ajtim Jesús ja y'adsoojidøø:

—Ka' mee xnijawidi pøni ti mee m'amidoodip. ¿Mgupøkp meets ja ayo'on midi ø nbaatp?

Jøts ja wyandi:

—Ngupøkp øøts ja'.

23 Xjats ja tnimaay:

—Janch tiigyajpxy. Mgupøkp meets ja sa jaty ø njatt ngubatt; jøts kuts øts idø'on xmøøtsinaawya'andi tu'uk aga'ñ jøts jadu'uk anajy, ka'øtsip ja xpaat'ajtip jøts meets jade'en nyik'ixa'akt, ja' ja yikmo'odip pøni pøn ja Dios Teety køøm jade'en tø tyanibiktaagiyidi.

24 Xjats ku ja jade'en tmadowdi ja yjanimajkpidi, jøts ja tjantyimy'i'ambøjktøø ja ñamajtskpidi mididi tukjaa'dyi.

25 Jøts nwindson'ajtim Jesús ja ojts yjayajxniiyidi niduki'iyi, jøts ja ojts ñii'mxyidi:

—Jade'en sam x'ejxtin xnijawidi, ja jaa'y pøn tnitanaadyip ja naajx ja kajp, øy ja sagasa y'adøtsnidi pøni sa ja kø'øm ttsokti; kuts jam pøngapøn møk yjaakyikutujkni, tu'ugyits yja' ja tyikmøji.

26-27 Jøts ka' meets mja' jade'endi, ne'egi yide'en meets mja'. Pøni pøn namyøjpikta'akwajnip, ja' idø'øn paat'ajtip jøts ja tuki'iyi ttu'unt pøni ti myigu'uk ejtxidip ka'ejtxidip, ja' idø'øn ja twindsø'øgip,

28 jade'en sam ø nduñin, kaja'ajipxi ø tø nnimiñ jøts øts jawyeen nyikwindsø'øgit, pø ja'axi ø tø nnimiñ jøts øts ja windsø'jkin nyakt, jøts øts kø'øm ngudanit ja pojkpitumbi jaa'y pyøkyi, jøts ja may ñitso'ok'attit.

Ku ja Jesús tyikwin'ejxwa'kxy ja winap jaa'y

29 Xjats ku ja jam wyinaty cho'onidi jam Jericó, jøts nwindson'ajtim Jesús may ja jaa'y ja ojts pyadsøøñiyi.

30 Jamts wyinaty namajtsk winap jaa'y chøøniidi tuu'am, jøts ku ja tmadowdi ku ja nwindson'ajtim Jesús jam wyinaty ñaxy, jøts ja møkta'aky tniimaadyøø:

—jWindsøn'ajtim, rey David y'u'nk y'ap, ayo'ejxk øøts!

³¹ Jøts ja mayjaa'y ja ojts y'øjyidi, ojts yiknøjmidi jøts y'amo'ondit, jøts ja tjaaktyimyikjinajxtøø jawaani møk:

—iWindsøn'ajtim, rey David y'u'nk y'ap, ayo'ejxk øøts!

³² Winets ja nwindsøn'ajtim Jesús wya'k'øyyii'ñ, jøts ja tyaaixiyii'ñ ja winap jaa'dyi jøts ja ttiibyiky, yide'en tnimaay:

—¿Ti dø'øn mdsojktip, ti ø ndu'ump?

³³ Jøts ja ojts y'adsowdi:

—Windsøn'ajtim, jawin'ejxwamp øøts.

³⁴ Winets ja nwindsøn'ajtim Jesús ja jaa'y ojts t'ayo'ixy jøts ja ojts twinguxaji. Jøts ja winap jaa'y nay jatyi wyin'ejxwa'kxtøø, jøts ja ojts tpadsoondi ja nwindsøn'ajtim Jesús.

21

Ku ja Jesús kyajptøjkiyii'ñ Jerusalén

¹ Kuts jam Jerusalén wyinaty yja'atwanidi, jøts ja kajp ojts tpaatti midi txøøw'ajtp Betfagé, midi jam tmiwíngon'ajtp ja kojpk midi yiktejp Olivos, winets ja nwindsøn'ajtim Jesús tkejxy namajtsk ja pyabøjkpi,

² yide'en ja tnimaay:

—Nøjkxti ixé kajpjøøjty ixé wíngon. Jamts inet buuri tu'uk xpaattit kuwii'ñ møøt y'u'nk. Ja'ats inet migajidip jøts ya xyikme'endit.

³ Jøts ku pøn sa wya'ant, jade'en xnøjmidit jøts ku ø ndsøky, jøts ku ø tsojk ngøyajkojmit.

⁴ Jade'en'ampy idø'øn ja jade'en yjajty, jøts ty-imyjade'en yjatt sa wyaañ ja Dios kyugajpxy ku ja yide'en tjaay ja nøky:

⁵ Nøjmidi ja Israelit kajp:

“Ejx yø mwindsøn mnimiñiyi mnija'adyiyi, amyujy tsaachyujy, taku'xni byuuri'u'nk.”

⁶ Xjats ja pyabøjkpi ojts choondi jøts ja ojts ñøjkxti, ojts ja jade'en ttundi sa nwindson'ajtim Jesús ja wyinaty tø y'ane'emyidi.

⁷ Ojts ja twetsti ja buur møøt y'u'nk, jøts ja ojts wyet ttajiba'andi jøts nwindson'ajtim Jesús ja ojts ttawaa'tspety.

⁸ Jøts ja jaa'dyi janch namay ja'adi, jøts ja ojts tya'apti ja wyet jam tuu'am; pømbi twidøjti ja ujts'aay jøts ja ojts tpikta'akti jam tuu'am.

⁹ Jøts ja jaa'y møk wyambinaxwa'ktøø pøn jawy-
een yø'ødyip, jøts nayide'en pøn ix'oojk payø'ødyip:

—¡Dios Teety tsajpøtpit! ¡Kunuu'kx yø rey David y'ap y'u'nk pøn me tø xkexy! ¡Kuuyi Dios Teety jadu'uk yjaak'øyi!

¹⁰ Xjats ku ja nwindson'ajtim Jesús kyajptøjkiyihñ jam Jerusalén jøts ja kajp kyajotkukidi, may ojts ja jaa'y wya'andi:

—¿Pøn yø jade'en?

¹¹ Jøts ja jaa'y wyandøø:

—Ja Jesús yø' ja Dios kyugajpxy, pøn kyugajp'ajtp Nazaret jam Galile'it etjotp.

Ku ja Jesús twojpidšømguixy ja too'kpitøjk jam tsaptøjkjotp

¹² Jøtsnim ja nwindson'ajtim Jesús tyøjkiyihñ møj tsaptøjkwimpy, jøts ja ojts tkajxpidsømguixy pøn jaty jap wyinaty too'ktip yajktip, juudyip kajpxtip jap tsaptøjkwimpy. Ojts ttejtsapwajkixy ja mesi midi ja jaa'y yiktundi pøn ja myigu'uk myeeñ

tkugojn̄idip, jøts nayide'en chinaabyajt ja yik-tejimbejtøø ja paktoo'kp̄idi;

¹³ jøts ja tn̄imaay:

—Yide'en jap n̄økyijxpy wya'añ, jøts ku ajot'ajtaajk ja chaptøjk wya'ant, jøts jade'ents meets yø tø xpiktakni sam maa'tspitøjk chinaadyøjkti.

¹⁴ Jøts ja nwindson'ajtim Jesús jam tsaptøjkjotp winaagin ñimejniyi ja jaa'dyi pøn winapti pøn pakma'atti, jøts ja ojts tyikmøkpøjkixy.

¹⁵ Kuts ja teetywindsøndøjk jøts ja kajpxwejpitøjk ojts t'ejxti ku ja jade'en ttuñ milagri, jøts ku ja ojts tmadowdi ku ja mutskuna'jk jap tsaptøjkjotpy møk wya'andi: “¡Dioskujuyip rey David y'ap y'u'nk!”, jøts ja yjantyimy'ambøjktøø

¹⁶ jøts ja ojts tnøjm̄idi ja nwindson'ajtim Jesús:

—¿Madøøpy yø' ku yø ixa jade'en wya'andi?

Jøts ja nwindson'ajtim Jesús ja t'adsøøy:

—Nmadøøpy øts yø'. ¿Ti ka'an̄im meets ja Dios kyajpxy x'ejxi ku yø tø tjanigajpxy? Yide'enxi ja wya'añ:

Tø ndanibiktaagi jøts øts mutskuna'jk xjanchjawidit xjanchkunu'u'kxyjawidit.

¹⁷ Xjats ja Jesús tmajtstuupty, jøts ja ojts chøøñ jam Jerusalén jøts ja ñijkxy Betania, jamts ja ojts mya'ay.

Ku ja Jesús ojts t'ayo'onmigajpxy ja iigi tsā'amguipy mid̄i ja tyøøm ka'ejtp

¹⁸ Xjats ku yjøpy'ajty, jøts ja wyimbejtkojmi ñøjkxkojmi jam kajpjotp, winets yuu ja ojts pyaadyiyi.

19 Xjats ja t'ejxpaajty tu'uk iigi kipy jam tuu'ba'am, jøts ja ojts tniinjky, ojts ja kipy tjawi'ixy jøts ja ni tu'uk tyøøm tkapajtøø, nugo janchtum'aay ja'. Winets ja nwindson'ajtim Jesús ojts tnøjmi ja iigi kipy:

—iNijuuni mga'uktøømiñit!

Jade'en ja ojts wya'añ, jøts ja iigi kipy jatyi tyimdyijch.

20 Xjats ku ja pyabøjkpitøjk ja ojts jade'en t'ejxti, jøts ja jantyimyñigyumaap tjantyimya'widøø, winets ja tyiktøødøø ja nwindson'ajtim Jesús jøts ja tnimaadyøø:

—¿Sudso yø iigi kipy tsojk tø tyimdyi'ich?

21 Jøts ja nwindson'ajtim Jesús ja t'adsøoy:

—Janch øts idø'on nwa'añ, pøni mjanch-møøt'ajttip ja janchja'win, jøts ku kø'øm ka' xwinma'adyit majtsk'aaw majtskjoojt, kidi yø'øyipts mee mjaatp sam øts yø iigi kipy ixa tø nduñin, yø kojpk paat mee xnøjmit: “Jiwa'ak ya jøts mnøjkxt mejyotp”, jantyimyjatpts idø'on ja jade'en.

22 Jøts ku øy ti x'amido'odit xpøktso'odit ajot'ajtingøjxp, pøni amumjoojt ja janchja'win xmøøt'atti, myikmo'odipts ja' pøni ti m'amidoodip.

Ja Jesús myøk'ajtin

23 Jøts ja nwindson'ajtim Jesús tyøjkiiñ tsaptøjkjotpy, ixap ja wyinaty yik'ixpiky ku winaaagin jap myendøø ja teetywindsøndøjkti jøts ja møjaa'dyøjkti, jøts ja ojts tyiibyikyiyi, yide'en ja ñimaajyøø:

—¿Pøñ yø yjade'embì mdanìgutujk'ajtip jøts yø jade'en xu'unt? ¿Pøñ yø kutujk jade'en tø mmø'øyi?

²⁴ Jøts ja nwindson'ajtim Jesús t'adsøøy:

—Nayide'en meets yam nyiktøwami; jøts pøni m'adsowimbejtíp inet, winets meets ja ndukmado'ot pøni pøn øts yø jade'en xanìgutujk'ajtp ku øts yø jade'en nduñ.

²⁵ ¿Pøñ ojts Juan Bautista tyanìgutukyiyi jøts ja ya yiknøbatt? ¿Dios, uk jaa'y?

Jøts ja xem yam kø'ømyi tka-jpxy'ajtpinaxwa'ktøø, yide'en ja ñawya'añidi:

—Ku net yø njanima'ayin jøts ku Dios ja tni'ane'emy, yide'ents inet yø x'adso'owin: “Jøts ¿tigøjxp ku ja ojts xkajanchjawidi?”

²⁶ Jøts ku net njanima'anya'an jøts ku nugo jaa'y ja ojts kyexyi yiknøbatpi, winets yø mayjaa'y xnibidø'jka'andit; kumi niduki'iyi yø jade'en tnija'widip jøts ku ja Juan tum ja' tkajpxy midi Dios yja'ajip.

²⁷ Jøts ja ojts nugo t'uknimaañidi ja nwindson'ajtim Jesús:

—Ka'ap øø nnijawi.

Winets ja ojts ñii'mxyidi:

—Ni øts meets inet ja ngadukmado'ot pøni pøn øts yø jade'en xanìgutujk'ajtp ku øts yø jade'en nduñ.

Ku ja Jesús tmadyakpaajty namajtsk ja jaa'y tukmiga'axpi

²⁸ Xjats ja tjaaknimaay:

—¿Sa meets idø'øñ x'ukja'gyuki ya'atpi ayuujk? Tu'uk idø'øñ jaa'y, jamts namajtsk myajnk; jøts ja

tu'uk tniimaay: “Mets u'nk, ixyam mnøjkxt tumbi jøts ø x'atstujkit ja n'uvi tsa'am.”

²⁹ Jøts ja myajnk ojts yide'en y'adsøyiyi: “iKa' nnøjkxwā'añ!” Winmaadyigajts ja jadigojk xjats ja ñijkxy tumbi.

³⁰ Jøts ja u'nkteety ojts ja tñijnijkxy ja yjadu'ukpi majnk, jøts ja ojts nayide'en tnøjmi, jøts ja ojts yide'en y'adsojiyi: “Øyip teety, øy ø nnøjkxt.” Jøts ja nigidi y'uknøjkxni.

³¹ ¿Pømbits ja tpaduun jade'en sa ja møjaa'y tjatsøky?

Jøts ja wyandøø:

—Ja' midi ja jawyeen y'ukniimaay.

Xjats ja nwindson'ajtim Jesús wyaañ:

—Janch øts idø'on nwa'añ, jøts ku ja ne'egi jawyeen ja Dios kyutujk ttatøjkiyidit ja'adi pøn pøkyun'ejtkunajxtip, jøts nigidi meets.

³² Kumi ja' meets ja Juan Bautista tø mdanimiñiyi jøts ja mduk'ixpikyidi sa mdsøønidit mdanidit sa mjuky'attit, jøts ka'ats ja tø xmibøkti; ne'egi ja' ja ojts tjanchjawidi ja jaa'dyi pøn pøkyun'ejtkunajxtip. Jøts kuts meets øy ja ojts jade'en xja'ejxti, ka' meets ja ojts xjanchjawidi, jøts ka' mdsinaa'yin xyiktigajstøø.

Ku ja Jesús tmadyakpaajty ja ka'ødyumbi

³³ 'Ukmadowdim jadu'uk ya'at madya'aky: Tu'uk ja jaa'y midi ja kam kaja'ampy tjagyajp, ja'ats ojts tni'ipy ja uvi kipy jam kyamjotp, jøts ja ojts tnaguemy; jøts ja ojts tyik'øyi tu'uk ja abøjk'i'i'ñ mā ja uvi nøø yik'amøø'kxīt, jøts tu'uk ja ne'ey janch køjxp mā ja kam yik'ejx'ett.

'Xjats ja ojts winaagin ja tyumbi tmø'øy ajuudyujk ja kyam, jøts ja ojts tkømø'øy jøts ja chøø'ñ widejtpi.

³⁴ Xjats ku tpaajty ja uvi tujk'aats, winets ja ojts tkexy winaagin ja tyumbi, jøts ja ttaniguexy ja yjadu'ukpi tumbidi midi ja wyinaty tyuk'ajuudyujkpy ja kyam, jøts ja yik'amido'odit ja pikta'aky midi ja paat'ajtiyip.

³⁵ Ka'ap ja ñømdøø, ojts ja tmajtsti ja tumbi midi yikajxtip, pømbi yikwojp yiktse'jk, pømbi o'jk jøts pømbi yikwinga'jts yikjöpka'jts.

³⁶ Jøts ja kugam ojts tjaakajxkojmi ja tyumbi jawaani namay, nigidi jade'en sam ja yjawyeembidi; nayide'ents ja kam ejx'ejtpi ja ojts tyungojmiyidi.

³⁷ 'Jøtsnim ja ojts tkexy ja kyø'øm'u'nk, yide'en idø'on ja y'ukwinmay: "Yikwindsø'ögip øts n'u'nk."

³⁸ Jøts kuts ja ojts ja'ayi yik'ixy, winets ja kam ejx'ejtpi ñawyajnidøø: "Yø' yø kam yø' yø pikta'aky tmidanwangøjxp, yø' yø tmaabyøkwap; wan tyimykpa'ø'jkyindi jøts adøm yø nmidaangøjxint."

³⁹ Xjats idø'on ja tmajtstøø, jøts ojts tyikpidsømdi jam kamjotp, jøts ja ojts tyik'ookti.

⁴⁰ Winets ja nwindson'ajtim Jesús ttiibyiky, jøts ja wyaañ:

—Ku mye'ent ja kugam, ¿sats ja tumbitøjk yiktu'undit midi kam'ejx'ejtip?

⁴¹ Jøts ja teetywindsøndøjk jøts ja møjaa'dyøjk wyandøø:

—Niwine'en ja tkidyimy'ayo'ext yø yjade'embu ka'øy jaa'dyi, yikpa'ookp ja', jøts ja t'ayajknaxt jadigojk ja ñaajx, jøts ja abiktyumbi ja tmo'ot

pøn ja mo'ojȳȳip ja pyikta'aky pøni wine'enin ja pyaat'atyi.

⁴² Winets ja nwindson'ajtim Jesús ja ñimaajyidøø:

—¿Niwindinim meets Dios kyajpxy xka'ejxi? Yide'enxi ja wya'añ:

Ja tsaa midi ja pojtspi kya'uk'a'ejxidøø, ja'ats ne'egi ıxyam tø y'ukyikpiktakni jam pøch kyubajkp jøts ja t'amajtsmujkixy ja pøch.

Ja Dios Teety idø'on yø jade'en tø ttuñ, øy yø ñigyumaap njaja'wandi.

⁴³ Jade'ents ja Dios kyajpxy wya'añ, paty mee nnøjmi jøts ku ka' myikmo'odit jøts xatøjkidit ja Dios kyutujk, ja' ja ne'egi yikmo'odip pøn tyikwingaxø'jkidip ja Dios yja' midi ja yja'ajtpy.

⁴⁴ Jøts ja tsaa ku jam pøn y'uknaxkida'akt, windigø'øpy ja ayoobi; jøts ku ja tsaa pøn y'uktanaxkidakpatit; yikpu'xkiyip ja'.

⁴⁵ Kuts ja teetywindsindøjk jøts ja fariseotøjk jade'en tmadoodøø ja madya'aky midi ja nwindson'ajtim Jesús ja tamimadyaajkidip, ojts ja tjä'gyukidi jøts ku ja' yiknimadya'akti.

⁴⁶ Winets ja tjadyimyjamatswandøø, ja mayjaa'yts chø'jkidip pøn tnija'widip jøts ku ja nwindson'ajtim Jesús ja Dios Teety yja' tkajpxi.

22

Ku ja Jesús tmadyakpaajty sam tu'uk windsøn tyik'amajtski ja myajnk

¹ Xjats ja nwindson'ajtim Jesús ojts jadigojk ttamimadyaktøjkigyojmi jadu'uk madya'aky, yide'en ja wya'añ:

2 —Jade'en ja Dios kyutujk midi yjaa'y ja tyanitanaapy sam tu'uk windsøn pøn xødump jøts myajnk ja tyik'amajtski,

3 jøts ja tyumbi ja ttaniguexy pøn jaty ja yikaawyampy yik'uukwampy jøts ja t'atswa'adit, ka'ats ja jaa'y ja pyadsoo'nidøø.

4 Jøts ja ojts abiktyumbi tjadanigajxkojmi, yide'en ja t'uknimaay: “Nøjkx ja x'atstukmadowdi pøn jaty ø nwaawampy, jøts ku ja kaaky jii'kxy ya abaadi y'ejtni. Tø øts ndsakaa nyik'øøky jøts tyimdyumjane'kxpi tyimdyumjayeekpyi, abaadi a'ejxi y'ejtni, wan tmenidi tø'øxñigaabyi tø'øxñi'ukpidi.”

5 Kidyimyøjpiktakti ja' pøn idøøn jayikwaadsoodip migaabyi mi'ukpi. Pømbi nøjkxni kyamjotp, jøts pømbi tyunk tniyø'øyini mā jaty pøngapøn myeembyiky,

6 jøts pømbi axaji tyikja'jttøø ja windsøn tyumbi jøts ja tjemdunidi tedunidi, yik'oo'ktibaat ja'.

7 Winets ja windsøn yikxon yjantyimy'ambijky, jøts ja ojts tkexy syoldaditøjk jøts ja tyikpa'ookit ja jaa'y pøn tyimyikjaa'y'oo'knidip, jøts ja tnitsaajyidit ja kyajp.

8 Winets ja tnimaay tyumbitøjk: “Tum ja abaadi y'ejtni jøts xøøw yiktu'unt, ka'adamts yø yjade'embijaa'y pyaat'atyidi jøts yø nyikmiga'ayin nyikmi'uujkin.

9 Nøjkxtits jam mā jaa'y ñaxy tyøki, jøts ja niduki'iyi xwa'adit tø'øxñigaabyi tø'øxñi'ukpi pøni pøn jaty jam mbattip.”

10 Jøts ja tumbi cho'ondøø ñøjkxtøø jam tuu'am, jøts ja ojts twaamukti pøn jaty ja jam pyattøø,

jam oýjaa'byi ka'oyjaa'byi; jøts ja mayjaa'y jade'en tyik'ujstøø ja tøjkjoojt.

11 'Xjats ja windsøn jam tyøjkiyiñ jøts ja t'ejxwa'añ pøn jaty tø yja'atti migaabyi mi'ukpi, winets ja jap t'ejxpajty tu'uk ja yaa'dyøj, jøts ku ja ka'ap jade'en xyøxyi sam idø'øn pyaat'atyidi ñaxyoxidit ja tø'øxñigaabyidi ja tø'øxñi'ukpidi.

12 Jøts ja tnimaay: “¿Sudso mets ya tø mdøki, jøts ka'ats jade'en mxøxyi sam idø'øn pyaat'atyidi ku tø'øxñigaaky ku tø'øxñi'ukk ñaxy?” Jøts ja nisa kidyimwya'añ, amøñi ja y'ity.

13 Winets ja windsøn ja tnimaay pøn jaty jam wingiidyip wimbøjktip, yide'en ja tnimaay: “Íxe kowøøndi pakwøøndi jøts xwibojpidsø'ømdit, wan tniykxy agugootstujpy ma yjøløt ma ya'aaxt, ma wyingidsetst y'agidsetst.”

14 Kumi may ja yjayikwaadsowdi øy pøn, jøts waanits ja'adi pøn yik'a'ejxidip.

Ku yikajpxy'aty ja kugubajt

15 Jøts ja fariseotøj jam ojts choondi, jøts ja ojts tkajpxy'ejxwa'andi, ja'ats ja tyikpøky'attip jøts ja ttani'øønidit pøni sa yjadyimy'ukwa'añ.

16 Xjats ja jade'en winaagin tkajxtøø ja yjaa'y møøt ja Herodes yjaa'myi, jøts ja t'atstuknimaawya'andi ja nwindsøn'ajtim Jesús:

—Windsøn, tø øø nnijawi jøts ku tiy mgajpxy, jøts ku tiy janch ja Dios yja' xnigajpxiyi, ka'xmøjpikta'aky øy jaa'y sa yjawa'andi kumi ka' mets pøn xkupiky xkagupiky.

17 Tukmadookts øøts sa me m'ukwa'añ: ¿Nmo'op øøts kugubajt ja møj windsøn midi jam Roma tsinaapy? ¿Nmo'op øøts u ka'?

18 Yja'wiyiññts ja nwindson'ajtim Jesús ja' jøts ku ja kya'ødyunwa'añiyi, jøts ja tnimaay:

—Meets win'øømbidi, ¿tiku øts jade'en xkajpxy'ejxti?

19 Tuk'ejxtik øts ja meeñ midi myiktundi ku ja kugubajt xyakti.

Jøts ja ojts t'atskondi tu'uk ja pujxmeeñ.

20 Ku ja ojts t'uk'ixy ja nwindson'ajtim Jesús, jøts ja tyiktiy:

—¿Pøn yø' wyeen y'aaw, jøts pøn yø' xyøøw ixa kyøxja'ayi?

21 Jøts ja t'adsoodøø:

—Ja nwindson.

Winets ja ñimaajyidi ja nwindson'ajtim Jesús:

—Yø'øts meets yø windsøn mmo'op midi yø yja'ajtpy, jøts Dios yø xmo'odit midi Dios yja'ajtpy.

22 Xjats ku ja jade'en tmadoodøø, ñigyumaap idø'on ja tyimyajtøø; jøts ja ojts jade'eñi tmajt-stu'utti jøts ja choo'nidi.

Kujajaa'y tyiktøwdi pøni janch idø'on ja' ku oo'kpi jadigojk yjukpyøktit

23 Jøts nay ja'abi xøøw ja saduceotøjk ojts t'ats'ejxti ja nwindson'ajtim Jesús. Jade'en idø'on ja' ja wyinmaa'ñ tjagyapti jøts ku oo'kpi ka' y'ukjukpyøjknidit; paty ja yide'en tnimaadyøø ja nwindson'ajtim Jesús:

24 —Windsøn, yide'en ja Moisés wyaañ: kuk pøn tku'ookt ñidø'øxy jøts ku ka' tyiktañ ni tu'uk y'u'nk, pøni jamts y'ajch uk y'uch, ja'ats ja ku'økyø'øxy tmøø'tamajtskip jøts ja tyika'axt, jøts ja myigu'uk kyagudigø'øty midi tø y'øøky.

25 Jats øøts y'ity nmigu'uk tu'uk midi jaa'y'ajttip niwixujk yaa'y. Jøts ja jagyooop y'amajtskiyih'ñ, o'jks ja'. Jøts kumi ka' y'u'nk y'una'jk tyiktaañ, jøts ja y'uch ojts tmidañ ja kyap, ja ku'økyø'øxy.

26 Jøts nayide'en yjajty ja myimajtskpi, jøts ja myidigøøkpi nayide'en, tumjade'en ñajxkøjxti niwixujk.

27 Jøts ku ja jade'en y'oo'køjxtøø, jøts ja tø'øxyøjk yjaaktyimy'ø'jky.

28 Jøts kuts ja jadigojk pyidsø'ømdit jujky'ajtpi, ¿midi'ibits ja tniðø'øxy'atp, pø tøxi ja t'atsniðø'øxy'ajtkøxti?

29 Jøts ja ojts yide'en y'adsøyidi ja nwindson'ajtim Jesús:

—Kajaa mdigøydi, ja'agøjxp ku ka' xnija'wiyidi ja Dios kyajpxy, ni ja myøk'ajtim xkanija'wiyidi.

30 Kuts jadigojk ja oo'kpi yjukpyøktit nipøn kya'uk'amajtskiñit, ka' pøn y'u'nk ñøøx tkøyakt jøts ja y'amajtskit, jade'ents ja chinaañidit sam ankilisti midi jap tsajpøtpy.

31 Jøts ku ja oo'kpi yjukpyøkti, ¿ka'aním meets ja nøky x'ixy sa Dios kø'øm tø wya'añ? Nøømxi ja':

32 “Tum øts xDios'ajttip ja Abraham, ja Isaac, jøts ja Jacob.” Kidi oo'kpipts ja ñiDios'ajtpy, pø ja'axi ja ñiDios'ajtpy jøts ja tyikjujky'att øy pøn.

33 Ku ja jaa'y jade'en tmadoodøø, jøts ja ñigyumaap tjawidøø ku ja jade'en yik'ixpikyidi.

Ja møj kutujk midi ja Dios ñi'ane'empy

34 Winets ja fariseotøjk ojts tniðadowdi jøts ku ja nwindson'ajtim Jesús wyinaty tø tyik'amøñ ja saduceotøjkti, jøts ja ñamyujkidøø;

35 jamts tu'uk kajpxwejp̄i tmøødid̄i, ja'ats ja tja'ukajpxy'ejxwaān ja nwindson'ajtim Jesús. Jøts ja tyiktīy:

36 —Windsøn, ¿midi'ibi kutujk jawaani møj midi ja Dios kyutujk myøøt'ajpty?

37 Jøts nwindson'ajtim Jesús t'adsøøy:

—“Windsø'øgi ja Dios amumjoojt, jade'en xtsokt mabaat myajada'aky m'anmija'win, mabaat myajada'aky m'aaw mjoojt.”

38 Yø' idø'øn møj jøts yø' idø'øn jawyenip.

39 Jøts ñiñayjade'en ja myimajtskpi, yide'en ja wya'añ: “Jade'en mmigu'uk xtsokt sam kø'øm mnachøkyin.”

40 Yø'øbi kutujk majtsk møj midi ja Moisés tø tja'ay jap kyutujkjøtpy, jøts midi ñigajpxtip ja Dios kyugajpxy ku yik'ixpøkti.

¿Janch idø'øn ku ja David t'ap'aty ja Cristo?

41 Nay ixamn̄im ja fariseotøjk wyinaty amuki y'etinim,

42 jøts ja nwindson'ajtim Jesús ttībyijky:

—¿Sa mee mwinmay, pøn yø Cristo? ¿Pøn yø' y'u'nk?

Jøts ja tn̄imaadyøø:

—Ja rey David yø' y'ap.

43 Winets ja nwindson'ajtim Jesús ja tn̄imaay:

—¿Jøts sudsomts ja rey David ja Esp̄iritu Santo yikwajnøø jøts ja ojts tijy windsøn? Tiku ja David yide'en wyaañ:

44 Nømp ja nwindson'ajtim ja Dios Teety ñimaajyøø:

“Putsinaaky øts n'aga'ñ'ampy, kunim øts yø nm̄imajadākøxt pøn

jaty mmidsep'ajtíp.”

⁴⁵ ¿Sudso ja Cristo ja yiknitsokpi, sudso ja David ja y'ap'atyí, jøts yide'ents ja David kø'øm wyā'añ jøts ku ja twindsøni?

⁴⁶ Jøts nipøn nisa kidyimwya'añ, jøts ja'abi xøøw ttamajstuttøø, jøts ka'ap pøn y'uktiibyøjkniyi tigati.

23

Ku ja Jesús ttamigajpxy sa y'adø'øtsti ja fariseotøjkti møøt ja kajpxwejpitøjkti

¹ Xjats ja nwindson'ajtim Jesús tnimaay ja mayjaa'y jøts ja pyabøjkpitøjk:

² —Yø kajpxwejpitøjkti jøts yø fariseotøjkti, jade'en yø wyā'andi jøts ku yø tyimbyaat'atyidi, yø' idø'øn ja tyimñigajpxtip wa'ats, yø' idø'øn ja tyimñija'widip ja Moisés kyutujk.

³ Jade'ents meets yø xpadu'unt, tundi dø'øn jade'en tuki'iyi pøni sa mni'mxyidi; kidits nayide'en m'adø'øtsti sam yø y'adø'øtsti, kumi jade'en'ajttip yø', wenk yø jaayi y'ukwa'andi jøts wenk y'adøtskojmidi.

⁴ Nugo tukmajada'ak myajada'akti midi janch kamaabyim, jøts ja'ats ja jaa'y tyukpadunwandip; jøts niwine'enin ja kø'øm jade'en tkatunwa'andi.

⁵ Jade'en'ampy jade'en y'adø'øtsti jøts ja kajp y'ejxidit, jøts ja mayjaa'y y'ejxidit. Wyet nikijxy tkøxja'adi wan jaty ja Dios kyutujk, jøts yik'agajpxtit ku ja tjantymbyadundi, jøts nayide'en ñachojkmiyidi jøts wyet tum yøn tnajtskudiiyi tmiwidettit, ka'ap jade'en tyiktundi sam o pøn jaa'y.

6 Ja' chojktip jøts tum jam tyimy'ixa'aktit ma ja windsøn tsinaabyajt jam ku xøøw ku ti tyuñi tsaptøjkjøtpy,

7 jøts jade'en ttsokti jøts ja jaa'y nøø'ajy tuu'ajy wyindsø'øgiyidit kyajpxpoo'kxiyidit, jøts ja tyimyiktejtīt ku ja kyajpxwejtī.

8 Jøts meetsts kidim jade'en jaa'y xnīmaañidi jøts jade'en myknøjmidit jøts ku mee mgajpxwijy, pø tu'ugyixi mee tum jade'en mnay'uch'atidit mnay'ajch'atidit, jøts tu'ugyits ja mgajpxwejpidi midi mgajpxwejidip, ja Cristo ja', ja yiknitsokpi.

9 Jøts kidi pøn xejtī teety yā naxwiiñ naxkijxy, tu'ugyixi meets mdeety ja' pøn jap tsajpjøtpy.

10 Jøts nika' mnawyindsøndejidit, pø tu'ugyixi ja' pøn mwindsøn'ajtip, ja Cristo, ja yiknitsokpi.

11 Pøn ja myigu'uk twindsø'jkip, ja' idø'øn møj, ja' idø'øn nmigubajk'ajtidip.

12 Pøn ja namyøjpikta'akwajniyip kø'øm, yik'amutski ja nøjkx yjaty, jøts pønts nabyiktaajkip yik'ayowim, ja'ats idø'øn nøjkx møjtojkīp.

13 'iTi jade'en mnadyatuujnidip meets kajpxwejpitøjkī meets fariseotøjkī, wine'enin win'øø'ndsøonidi! Meets ja m'agajpxujkpy jøts mmigu'uk xkaduktatøkiwya'andi ja Dios kyutujk. Jøts ka'ats kø'øm mdøkidi, jøts nika' xyiktøkiwyamidī pøn ja tsojkin tjajagyajp.

14 'iMjanch'ayøøy meets kajpxwejpitøjkī, meets fariseotøjkī, wine'enin xnidunk'atti ja win'øø'nk!, ku ja ku'økyø'øxy ja tyøjk ja pyikta'aky xpøjkxidi jøts ñadyijyi xkayikniğaxø'økti, ñadyijyi ja tsapkaixpy janch yøñ xkajpxti, yø' meets yikxon myiktagubatp.

15 'iTi jade'en mnadyatuujnidip meets kajpxwejpitøjkti, meets fariseotøjkti, wine'enin ja mmigu'uk xwin'øøndi! Mjantyimyijotigøødyip meets, jøts ja jaa'y xukupøktit ja mdsinaa'yindi sa mee m'adø'øtsti, jøts kuts ja jaa'y jade'en tø xundi, ne'egi jawaani ka'øy meets ja jaa'y xjaaktyimdyuñ, jade'en ja tpatni sa ja øy øy tyimñøjkxt jap infierno, jøts nigidi meets jade'en mdyimyjatt.

16 'iMjanch'ayøøy meets tuu' niwaaabidi, jade'ents xundi sam winapjaa'yindi!, ku mee mwa'añ: “Ku pøn wyanda'aky jøts tyiktestigi'aty ja tsaptøjk, jade'ents ja yikpikta'aky sam pøn kyawanda'agyi; jøts pønts wandakp jøts tyiktestigi'aty ja oori midi ja tsaptøjk yja'ajtpy, ja'ats idø'øn tiy janchwandakp.”

17 iMeets mo'otpidi, jade'en xundi sam winap jaa'yindi! ¿Midi'ibi dø'øn jawaani jaaktyimyøj: ja oori, uk ja tsaptøjk midi tyikunuu'kxy jajtp ja oori ku ja yikajpxpaaty?

18 Jøts nayide'en mwamidi: “Ku pøn wyanda'aky jøts tyiktestigi'aty ja altajr, ka'ap ja wyanda'agyi; kuts pøn wyanda'aky jøts tyiktestigi'aty ja limunsi midi yikyoxp jam altajrkøjxp, ja'ats idø'øn tiy janch wanda'aky.”

19 iMee mo'otpidi, mee wimbeets kugoots ejtpidi! ¿Midi'ibi jawaani jaaktyimyøj: ja yojxin, uk ja altajr midi tyikunuu'kxyjajtp ti jaty jam yikyoxp?

20 Jøts pønts tyiktestigi'ajtp ja altajr ku wyanda'aky, kidi ja'ayip ja nugo yiktestigi'ajtpy, nayide'en ja tyestigi'aty ti jaty jam altajrkøjxp;

21 jøts pøn tyiktestigi'ajtp ja tsaptøjk, kidi

ja'ayip ja nugo yiktestigi'ajtpy ku ja wyanda'aky, nayide'en Dios ja tyiktestigi'aty pøn ja chaptøjk'ajtpy.

²² Nayide'en pøn wandakp jøts tyiktestigi'aty ja tsajp, ja Dios idø'øn chinaadyaajk ja yiktestigi'ajtip, jøts ja Dios kø'øm midi jap tsinaapy.

²³ 'iMjanch'ayøøy meets kajpxwejpitøjkti, meets fariseotøjkti, ku ja win'øø'nk xunk'atti! Køx kida'ak meets xjanchkugubatkixy, jøts ka'ap ne'egi xpadu'unxidi midi ja Dios kyutujk jawaani ne'egi yjani'ane'empy ku ja ttsøky ja ødyiidyu'unin, ja pa'ayo'ejxk jøts ja janchja'win. Ya'atpi meets idø'øn ne'egi jawaani mjapaat'ajtip mbadu'ump.

²⁴ Meets winap tuu'waabidi, ku ti x'uukti tum axity ja xyiknaxti jøts ja uux jam kyatøki, jøts nika'ats xjawidi ja møjpi jiyujk ku ja amuum xjøøndi!

²⁵ 'iTi jade'en mnadyatuujnidip meets kajpxwejpitøjkti jøts meets fariseotøjkti ku xunk'atti ja win'øø'nk! Ja'ayi mee mjanchkamijotkukip sudso ja texy ja tas nikijxyi nadyijyi wa'ats y'ett, jøts ka'ap ja xunk'atti pøni sadam ja yjotpy. Ni xkaja'gyukidi kudam m'amp mjotp tum ja axøøkpø yigaappi xjamøøt'atti, ku jaaj'y nugo xwin'øøndi xwimaatsti.

²⁶ Meets fariseo winapti: jawyeen yø mga'øy'ajtin xmajtstu'uttit, jøts jade'en ja m'anmija'win ttaniwa'ats'attit ejxim n'uk'ejxint tasi nyikwaajtsin, jade'en nikijxy jade'en jøtpyi.

²⁷ 'iMjanch'ayøøy meets kajpxwejpitøjkti jøts meets fariseotøjkti, meets win'øø'mbidi!, jade'en mee mgaxi'iky sam ja oo'kpø nipotsin midi tø yikpoobi jøts ja janch tsuj nikijxy kyaxi'iky, jøts

ku jap jøtpy ujts abøki oo'kpi pajk jap, jøts tum ja axøøk ja jap myøøt.

28 Jade'enxi meets idø'on; wemp am ñadyijyi xuk'ejxti ja jaa'y jøts ku mee m'øyjaa'y. Midi'its jap m'aawidip mjoojtidip, tum ja taay'ajtk, tum ja kya'øypi jap mwinmaa'ñ'ajttip.

29 'iMjanch'ayøøy meets kajpxwejpitøjkti jøts meets fariseotøjkti, meets win'øø'mbidi! Meetsxi ja Dios kyugajpxy ja ñipots myik'ø'yidip ku ja y'ookti, jøts ja xyo'om yik'øyidi wying'i'jy pøn tø y'ats'øyjaa'y'atti,

30 jøts mjanch'uknømdi: “Kuk adøm jeexyip n'ukja'ajtyindi, ka'ap adøm ja møjaa'dyøjk jeexyip tø nbudøjkindi ku ja tø tyik'ookti ja Dios kyuga-jpptyi.”

31 Yø'øyits meets kø'øm mnadyani'øø'niyip jøts ku ja xeety'apidi pøn ja Dios kyugajpxy tø tyik'ookti.

32 'iYik'abaadidits inet midi ja mdeety'aptøjk tø ttunjøpidi!

33 'iMeets win'øø'mbidi! 'iMeets kawindiyjaa'dyi! ¿Sudso meets xijy ja ayo'on m'ukniwaaajtsniyidit midi jap ayodaajkjøtpy mbaattip?

34 Yø'øgøjpx øts kugajpxy ngaxt møøt ja wi-jyjaa'dyi møøt ja yik'ixpøjkpidi. Jøts myik'ookpts meets ja winaagin jøts ja xyikruspattit, jøts pømbi yiktseekp yikwopp jap tsaptøjkjotp, jøts pømbi yik'ixa'ap yikpawidetp kajp kajp.

35 Jade'ents meets ja pøky mdaja'adit, jøts ja xku-battit ku ja øyjaa'y kawine'en tø xyik'oo'knidi, Abel ñikøjxp cho'ondā'aky pøn øy pøn yikxon jaa'y'ajtp, kunim ja Zacarías ttamigugøxi pøn ja Berequías

myajnk'ajtpy, pøn mee myik'o'jk jap tsaptøjkjötpy ma ja altajr y'ity.

³⁶ Janch øts idø'øñ nwa'añ, ku jade'en yiktuñ yø'øbi pøky, yø ya'atpi jaa'y yø taja'adidip jøts yø yiktagubattit pøn jaty ja ixyam tsinaadyip.

Ku ja Jesús t'ayo'ijxy ja Jerusaléngit kajp

³⁷ 'iJerusaléngit kajp, Jerusaléngit kajp, meetsxi myik'øø'kpy ja Dios kyugajpxy, jøts xwinga'atsti xjöpka'atsti pøn ja Dios kyajpxy tyikyø'øydip, pøn ja Dios mjadanigajxidip! ;Tø meets njapeemukwa'añ njakonmukwa'añ kawinaak ojk, sam tsikuna'jk ja tyaak ñimu'uxyi, ka'ats meets ja jade'en tø xkupiky!

³⁸ Ejxtits inet ja tsaptøjk ku ja abak tyani;

³⁹ øts idø'øñ wamp jøts ku meets xka'uk'ejxnit tsojk, jøts ku meets jaanim x'ejxtit pøni juuni ja tiempi yja'aty ku mnø'ømdit: “Ejxik Dios ja kyunuu'kxyu'nk ñadyaguguexyi midi mmime'enxiyip ja kyutujk.”

24

Ku ja Jesús tnigajpxy jøts ku ja tsaptøjk kyida'att

¹ Xjats ja nwindson'ajtim Jesús pyidsiimy jam tsaptøjkjotp, jøts ixam ja wyinaty ñajxni ku ja pyabøjkpitøjk ja jam wingon ñimejniyøø, jøts ja tyukmadoobinaxwa'jkøø sa jaty ja tsaptøjk jam t'ijxy ku ja janch tsuj janch øy.

² Jøts nwindson'ajtim Jesús ja t'adsøøy:

—¿M'ejxtip ixa jade'en tuki'iyi? Øts wamp jøts ku ya nitu'ugin ja tsaa kyata'ant nikiibyety, kuja'jigyøxp yø tuki'iyi.

Ja ejxa'an midi yik'ejxp ku wyinaty yiktĩdyunwanidi ja naxwii'ñit jaa'y

³ Winets ja ojts ñøjkxti jam kojpkøjxp midi yik-tejp Olivos; jøts ku ja nwindson'ajtım Jesús ixam wyinaty tø y'ixa'aky, winets ja pyabøjkpitøjk ja ojts ñinijkxyiyi, jøts ja ojts ñimaajyidi amaa'tsk:

—Ja' øø ndsøjkpy jøts øøts xukmado'ot windem idø'øn ja jade'en yjatt. ¿Ti ejxpajt ti ejxa'an øø n'ejxp jøts ku wyinaty mmenwa'añ, jøts ku wyinaty yja'atwa'añ ja tĩdyu'unin xøøw?

⁴ Jøts nwindson'ajtım Jesús ja ñimaajyidøø:

—Øyim mnay'ejx'etidit jøts kidi øy pøn nugo mwin'iĩñidi.

⁵ Kumi may ja jaa'y mye'endit jøts ja jade'en ñadyejidit jøts ku ja y'øtsi, yide'en ja wya'andit: “Øts idø'øn Cristo ja yiknitsokpi”; jøts mayts ja jade'en twin'øøndit ja jaa'y.

⁶ Jøts mmado'op meets jøts ku jaa'y tnigajpxtit ja tsep, uk tnigajpxtit sa jaty ja tsep yjaaktunit, sa jaty ja ayo'on yikpaatt; kidits mdsø'øgididi, jatp idø'øn ja jade'en; ka'animts wyinaty tmibaat'aty jøts ja naxwii'ñit jaa'y yiktĩdyu'undit.

⁷ Kumi tseptu'undip ja jaa'y pøn ki'abikñaaajx ki'abikyajpti jøts ñañibidø'øgidit xem yam, jøts ja windsøndøjk nayide'en cheptu'undit ja xem ja yam pøn jaty ja kajp ja naajx tnitanaadyip naxwiiñ; etp yuu xøøw, jøts pa'am køx kida'ak jøts ujx ñaxt maawyeen.

⁸ Tso'ondakpnım ja ayo'on wyinaty jade'en midi yikxon yik'ejxpnım.

⁹ Winets meets myikøyakt jøts myikjemdu'undit myiktedu'undit, jøts jaa'y yik'oogidit, jøts

nipøn mgatsokidit o magajp, ja'agøjxp ku mee xjanchjawi.

10 Winet ets ja jaa'y may ja yjanchja'win t'ixmatstit, yja'dyigøøgyøxnidip ja Dios yja' ja'ami jøts ja myigu'uktøjtkøyajknidit.

11 May ja windaay'ajtpi pyidsø'ømdit, ñadyijiywa'andit jøts ku Dios yja' ja tñigajpxidi, jøts may ja myigu'uk twin'øøndit.

12 Kawine'en ñaxt ja ka'ødyu'unin jøts ja ka'øwyinmaa'ñ, may ja jaa'y xem yam kawin'ijxyim ñayjawi'idit.

13 Jøts pøn tmidanaapy jøts pøn tu'ugyi winmaapy, ja'ats idø'øn nøjkx nitso'ok'ajtp ja y'anmija'win.

14 Jøts ya'at øy madsoo yikajpxwa'kxt wine'enin naxwii'ñit y'ity, ya'at Dios y'øgyajpxy y'ømyadya'aky, jøts naajx kajp ja møj ja mutsk tñijawidit; jats idø'øn tmibaat'att jøts naxwii'ñit jaa'y yiktiidyu'undit.

15 'Ja Daniel, pøn ja Dios kyugajpxy'ajtpy, ja' yide'en tñajtsja'wiyii'ñ jøts tñigajpxy ti yikpøkpyajtp, ti midundigøøpy; jøts kuts x'ejxtit jøts ku ja'baat jap yik'ejxni yikpatni ma ja tsaachjagunuukxy chaptøjtk jap, japtis ja mga'ukmaa'kxniyidit. Pøni pøn ya'atpi nøky kajpxp, wan tja'gyuki.

16 Wants ja tka'akti pøni pøn tsinaadyip jam Judea jøts kyaknøjkxtit jam kojpkøjxp.

17 Jøts pøni jam wyinaty pøngapøn tø pyety tyøjkjøjxp ja'abi xøøw, ka'ats t'ukniwinajknit ok idø'øn ti tjaak'atsjuutt jap tyøjkjøtpy;

18 jøts pøni jam wyinaty pøngapøn wyidity

kyamjotp, wan ka' t'ukwimbejtne, ni wyet ni ñaamy tka'atswetst.

¹⁹ jAyo'ijxyim ja tø'øxyøjk yjanchjattit pøn jaty mutsk jam wyinaty tnikøjxp'ajttip, pøn jaty myaxu'nk jam wyinaty tø tyikaxø'økti!

²⁰ Amidowdi pøktsowdi Dios jøts kidi ja et mga'akti ku ja et y'amxuxy chaachxuxy, jøts kidi wyinaty yjaty ku poo'kxin xøøw;

²¹ møk ja ayo'on yik'ext sam ka' wīndi yjatyin wine'en ixyam kujk ñaxy ku ñaxwii'ñit cho'ondaajky. Jøts ku ja ñaxt ni kya'ukyik'ejxnit jadu'uk nayide'en.

²² Jøts ku Dios tyikjakt ja ayo'on jøts jeky y'ett, ka' pøn ñitsoojkin tpaatt; jøts ka'apts jade'en ttu'unt, ja'agøjxp ku ttsøky ja jaa'y jøts tpa'ayøy pøn ja kø'øm tø twi'ixy.

²³ Jøts ku winet pøn mnøø'mxidit: “Ejxti, ixya ja Cristo midi yiknitsokp”, uk ñø'ømdit “Ejxti, ixem ja”, kidi xmibøkti.

²⁴ May ja windaay'ajtpi mye'endit jøts myikwin'øøndit, ñadyijyi ja ñadyejidit Cristo midi yiknitsokp, uk ñadyijyi ja ñabyikta'agit jade'en sam ja jaa'y pøn Dios yja' tkajpxidip; jøts tñanky'ejxidit ja ejxa'an ja ejxpajt, ñadyijyi ttu'undit ja milagri jøts ja jaa'y ttawin'øøndit, ja'baat ja twin'øønwa'andit pøn ja Dios kø'øm tø wyi'ijxyidi.

²⁵ Patki'jyi meets yø ixyam ndukmadøy,

²⁶ kuxip myiknøjmidit: “Ejxti, ixem ja abak etjotp”, kidits jam mnøjkxti; uk mjayiknøjmidits; “Ejxti, ixyajp tam ja tøjkjøtpy”, kidits meets ja xmibiky.

²⁷ Ku ø nme'ent, jade'en ø nme'ent sam

wyidsukyin ku ja kyaxi'iky jam xøbidsimy, nayide'ents ja nay jatyi kyaxø'kmi xøjexy jam tsajpwemp.

²⁸ Niduki'iyyi meets ja xnijawit ku nme'ent.

Sa mye'ent ja Dios ja myøjkudanaabyi ja yiknitsokpi

²⁹ 'Kuuyi ja ayo'on jade'en y'uknaxt, winets ja xøøw y'ookt, winets ja po' ka' y'uk'anit, jøts ja maadsa' kya'adit. Ku ja tsajp y'adøtspøjkøxnit, tuki'iyyi tum jade'en yjattit ti jaty jam ejtp tsajpwemp.

³⁰ Winetnimts ja x'ejxtit jam tsajpwemp midi øts jawyeen nanky'ejxip, jøts ja naxwii'ñit jaa'y ni'ijtyi ya'axtit, jøts t'ejxtit jøts ku ø nmime'ent yootsjøtpy ja nmøk'ajtin jøts ja kunuu'kxin.

³¹ Winets ja puxujx yikmado'ot møk'ampy jøts ø ndanigaxtit ja ankilistøjk, ja'ats twaamukøjxp pøn jaty ø nja'ajtpy wine'en naxwii'ñit jaa'y amuum tuk'oiky i tuktsajp'agida'aky.

³² 'Øy x'ukja'gyukidit yø madya'aky ku yø iigi kipy yiknimadya'aky: Ku ja y'awaj y'axeeñ u'nknim, jøts pyidsimy ja y'aay, jade'ents meets ja xnijawi ku ja y'anda'akwani.

³³ Nayide'ents idø'øn ja nbiktaajki ku ja ayo'on jade'en x'ejxtit, jade'ents meets ja xnijawit jøts ku wyingøñ juuni ja tiidyu'unin ñaxkida'akt, tyim'yixaani dø'øn ja wyinaty jøts ja jade'en yjatt.

³⁴ Jade'en øts idø'øn nwa'añ, jøts ku ja jaayi jade'en yjatt namga'anim y'oo'køxti pøn jaty ja jujky'ajttip ixyam.

35 Najxp y'ity yø naajx tsajp, øy yø juuni kyudigø'øty, jøts øts n'ayuujk nijuuni yø kyakixy kyanaxy kunim jade'en tyimyjatt.

36 'Ka'ats pøn tnijawī pøni ti xøøw pøni ti jumøjt ja jade'en yjatt, ni ja ankilistøjk ja tkanijawidi pøn jap tsajpjøtpyti, jøts ni øts ja kø'øm nganijawī. Tu'ugyi ja Dios Teety ja tnijawī.

37 'Nayide'en sam ja Noé yjajty, nayide'ents jadigojk yjatt ku ø nme'ent.

38 Ku dø'øn jekyip, ku ja ayo'onduu wyinaty ka'anīm myiñ, jøts ja jaa'y wyinaty yikxon yjanchkaydi yjanch'uukti jotkujk, pømbi amajtskip, pømbi y'u'nk ñøøx jam tni'adso'owip jøts yaa'byøkt, jaabaat jade'en yjaaktyimy'adø'øtsti ku ja Noé tyøjkiyiñ jap møj barkijøtpy;

39 jøts nigidiyi ja tyimy'ejxtøø ku ja møktuu ku ayo'onduu myiñ, jøts ja nøøgom ja ojts yik-tso'onguixyidi. Nayide'ents idø'øn nøjkx yjaty ku ø nmemit, ka'ap pøn xjøp'ejxtit.

40 Winaagin jaa'y jam wyinaty namajtsk tyundi jam kamjotp; tu'ukts ja ñitso'ok'att jøts jadu'uk wyindigø'øty.

41 Jøts winaagin tø'øxyøjk jam wyinaty namajtsk yjotsti; tu'ukts ja ñayide'en ñitso'ok'att jøts jadu'uk wyindigø'øty.

42 'Nayjøp'ejxidits meets, kumi ka' xnijawidi pøni juuni ø nme'ent.

43 Ukmadowdam ya'at, ku n'ukmadyaajkint ku pøn kudøjk wyinaty t'uknijawī juuni yja'att ja maa'tspi ku koots, çti jats ja jujky kyadsunaxt, ti

jaa ja tmajtstu'utt ja tyøjk jøts wan ja maa'tspi tyik'awatsnidi?

⁴⁴ Paty idø'øñ nnøjmidi, jøts jøp'ijxy xyik'ettit yam meets ja xkagumay ku øts jotmøñ nme'ent.

Ja ødyumbi ejx'ejtpi

⁴⁵ 'Pømbi tumbi dø'øñ wijy, ja'ats idø'øñ ja ty-imyida'amp pøn jaty ja windsøn jam yiktsinaapy tyøjkjotp, jøts ja abaadi tmo'ot kyaaky yji'kxy.

⁴⁶ ¿Kidi ja'ajip nekim pøn ja wyindsøn paajtíp, jøts ku ja ixam ka'pxy tpaduñ sa ja tø yik'ane'emy ku ja wyindsøn yja'aty?

⁴⁷ Janch øts idø'øñ nwa'añ, ja'abi tumbi dø'øñ ja windsøn pyikta'akp jøts ja ttuk'ejx'ett tuki'iyi pøni ti jaty ja jam yjagyejpy.

⁴⁸ Kuts ja tumbi kya'øy'att, ku nichøky wyinma'aty jøts ku wyindsøn ka' chojkja'aty,

⁴⁹ jøts ja tjemdumbinaxwa'jki tte-dumbinaxwa'jki ja wyindsøn tyumbi, uk myu'ugyi kyu'uxyi møøt ja amu'ukyjaa'dyi,

⁵⁰ jøts kuts ja wyindsøn wyimbett agumoni yam ja tkajøp'ijxy ja'abi xøøw;

⁵¹ jøts ja yikxon tyagubatit, nayide'en yiktu'unt sam ja jaa'dyi pøn ja win'øø'nk ttunk'ajttíp. Jøts ya'axt yjøøt tmiwingidsetst tmi'agidsetst ja ayo'on.

25

Ku ja Jesús tmadyakpaajty nimajk ja kiixye' una'jk

¹ Jøts ja Dios kyutujk jade'en yjatt midi yjaa'y ja tyanitanaapy sam nimajk ja kiixye' una'jkindi, midi ja yjaj ojts t'ukondi jøts ja tminøjkxti ma

ja jaa'y jam y'amajtskiwya'andi, jøts ja jemyaa'y twindsø'øgiwya'andi.

² Nimagoxk ka' ti møj tjawidi, jøts ja nimagoxk janchwijy ja yjaa'y'atti.

³ Pønts ka' ti møj tjawidi ku ja tkondi yjaj, nika'ap ñøø ja ojts tkojnidi, ka'ap ja te midi ja tyukta'utstip jadigojk ku ja kyøxt ja yjaj;

⁴ pønts wijtyi ojts ja abiky tkondi ja nøø midi ja yjaj tyuktatøodyip, jøts abiky ja' midi ja jaj jap yjaa'kmøøt'ajtpy.

⁵ Jøts kumi ka'ap ja jemyaa'y chojkja'tni, xjats ja niduki'iyi maa'y'øøgyi pyaajtniyidøø, jøts ja ojts yjadyimy'ukma'oo'køjxnidi.

⁶ Xjats tsuu'm et tmadoodøø ja ayuujk kuk yjawiwya'añ møk: “ixax myiñ ja jemyaa'y; pidsømdi jøts xjøpkubaadidit!”

⁷ Jøts ja kiixye' una'jk pyidø'køjxtøø, jøts ja yjaj ja t'a'ejxidøø.

⁸ Jøts ja ñimagoxkpi midi ka'ap øy ti tmøjawidi, ja'ats ja yjanimagoxkpi tnimaadyøø midi wijtyi midi winmaadyip: “Møøky øøts yø mjajnøø waani, oo'knip øøts yø njaj.”

⁹ Jøts ja ñimagoxkpi y'adsoodøø: “Ka' øøts yø nyaky, ku øøts inet yø nyakt ka' øøts inet nja' tpaatt, jøts ni meets inet mja' yø tkaatmit. Jam ne'egi mninøjkxtit ma tyøøgyi jøts jam mnadyanijuyidit.”

¹⁰ Ixam ja wyinaty tø tyimñøjkxti jøts ja t'atsjuuwya'andi ja jajnøø, ku ja jemyaa'y yja'jty. Jade'ents ja tyøjkidi pøn a'ejxi nayjagyajpidip, jøts ja ojts tmøøtøkidi ja jemyaa'y ma ja jap y'amajtskiwya'añ, jøts ja tøjkaaw y'adujknaa.

11 Jøts ja yjanimagoxkpi kiixye' oojknim yja'ukja'tnidøø, jøts ja yja'ukwanidi: “iYik'awa'ats windsøn yø tøjk!”

12 Jøts ja ojts yide'en yik'adsowdi: “Ka'axi mee nnijawi pøni mbøn meets.”

13 Jøts idø'øn ja nwindsons'ajtim Jesús ja pyabøjkpitøjk yide'en tnimaay:

—Jøp'ijxy mnanky'etidit, kidi nugo mdyimyaanøjkxti, kumi ka' xnijawidi pøni juuni øts ja tiidyu'unin nmime'ent.

Ku ja Jesús tmadyakpaajty ja tumbiktøjk pøn ja wyindsøn ja myeeñ tyanipiky

14 'Nayide'en idø'øn Dios kyutujk midi yjaa'y ja tyanitanaapy, sam tu'uk jaa'y wyinaty choonwani, jøts ja ñøjkxwani abikñaajx abikyajp, winets ja ojts twaadsøy pøn jaty ja jam yiktumpy jøts ja ttanipijky ja myeeñ.

15 'Tu'uk tmøøy magoxk mil, jøts jadu'uk majtsk mil, jøts jadu'uk tukmil, jade'en ja ojts tmøøy sa pønjabøn ja wijy'ajtin tmøødi. Jøts ja chøø'ñ ñijky widejtpi abiky'et.

16 Ja tumbi pøn ja meeñ yikmøøy magoxk mil, ojts ja tta'ajuy tta'agajpxy jøts ja tyik'u'nkjajty ja nayidinø'øn.

17 Nayide'en jadu'uk ja meeñ ojts tyiktunkpatmi pøn yikmøøy majtsk mil, jøts jaa ja nayide'en tyik'u'nkjajty majtsk mil.

18 Pønts ja meeñ yikmøøy tukmil, myidso'on ja jøts ja ayu'uch etjotp tu'uk ja jut tyik'ø'yiyii'ñ, japts ja meeñ ja tnitajy.

19 'Xjats kyimjekñim ja tumbitøjk wyindsøn wyimbijty, xjats ja tyikwingukidi ja meeñ.

20 Jawyeen yja'jty pøn ja meen wyinaty tø yikmø'øy magoxk mil, jøts ja tjaakmøøy jamagoxk mil ja wyindsøn midi ja wyinaty tø tyik'u'ngi, yide'en ja tnimaay: “Magoxk milxi, windsøn, ojts xyaky ja meen, icyats jamagoxk mil midi tø nyik'u'ngi.”

21 Xjats ja windsøn ja ojts y'adsøyi: “Øy'ajtp, øy idø'øn mduñ jøts øy idø'øn mjaa'y'aty; nayide'en sam øy tø x'ejx'ity yø meen øy yø kyamabaadi, ndanipøkp inet ja myayjawibi. Jøts ya men, nax, jøts jawaani may xpøkt ja n'øy'ajtin.”

22 Jøts jadu'uk yja'tmi pøn ja meen yikmøøy majtsk mil, jøts ja wyaañ: “Windsøn, icya ja meen majtsk mil midi øts ojts xmø'øy, jøts icya ja majtsk mil midi tø nyik'u'ngi.”

23 Jøts ja wyindsøn ja y'adsoji: “Øy'ajtp, øy idø'øn mduñ jøts øy idø'øn mjaa'y'aty; nayide'ents sa tø x'ejx'ity yø meen øy yø kyamabaadi, njaakmo'opts nayide'en jawaani may. Men, tøki ndøjkjøjty, paat ja m'øy'ajtin.”

24 Jøts ku yja'jty ja tumbi pøn ja meen wyinaty tø yikmø'øy tukmil, yide'en ja tnimaay ja wyindsøn: “Windsøn, nnija'wipxi øts ku mets ka' ti jadi'iñi xnajtsjawwi, ja'baat me xpayø'øy øy mets ja xjagaja'aji, myikpidø'økwambyaat mets ja pikta'aky øy me mjagani'ipy.

25 Paty ø ndsø'øgi, paty øts ojts n'atsyu'uch ja meen jap naxjøtpy. Ixyats ja', pø mja'ajtpxi yø'.”

26 Jøts ja wyindsøn ja ojts yide'en y'adsøyiyi: “Tsaachnuuxjaa'y mets ka'ødyumbi, pøni mnija'wip tam ku øts jade'en njaa'y'aty, ku øts nbøkmuky midi ø ngapiktakpy, ku øts ja xijy

nyikp̄id̄ø'økt paat midi ø ka' nni'ipy,

²⁷ jøts ɛti kuts øts ja nmeẽñ tø xka'anuu'kxyajki, jøts ja meengyojpk ja jeexyip tø nbaaty møøt ja meeñu'nk ku tø nja'aty?"

²⁸ Winets ja windsøn tnimaay ja jaa'y pøn jaty jam wyinaty jam'ajttip: "Pøjkxidi yø meeñ midi tukmil, jøts ja xmo'odit pøn ja yja' majk mil.

²⁹ Pøn ja yja' jam, jaaktyimyikmo'opts ja', jøts ja may'ampy tjagyapt; pønts niti tkamøøt'ajtp, jøts ku jap yii'nim tjaakjamøødi, ja'baats ja yjaaktyimyikpøjkxit.

³⁰ Yø yjade'emb̄i tumb̄i midi niti kawamp, ixep wibejpid̄sømdi agugootstujpy, japts ya'axt yjø'øt tmiwingidsetst tmi'agidsetst ja ayo'on."

Ku ja naxwii'ñit jaa'y yikt̄dyu'undit

³¹ 'Ku ø nme'ent windsøn'ajtpi, ni'awidity niduki'iyi ja ankilistøjk nmøøtme'ent, jøts ø n'ixa'akt jam kunuu'kxy kyutujktaajk jøp'am.

³² Jøts ja naxwii'ñit jaa'y niduki'iyi ñamyukidit øts nwingujkp, jøts øts ja nwejtswa'kxtit jade'en sam ja jiyujk'ejxpi ja byorreek t'awojpakyin møøt ja chiibi.

³³ Aga'ñ'ampy øts ja borreek nbikta'akt jøts anajy'ampy ja chiibi ndejint.

³⁴ Jøts winets ø nnøjmit ja n'aga'ñ'ambyitti: "Ya mendi pøn tø tpaajtidi ja Dios Teety kyunuu'kxin; kupøjkidi ja Dios kyutujk midi yjaa'y ja tyanitanaapy, jaayip yø myiktanibiktaajkniyidi ku Dios ja naxwii'ñit tyik'øyiyii'ñ.

³⁵ Tø nyu'øøky nxø'øøky, meetsts ojts xyikay; tø øts adøødsi n'ity, jøts meets ojts xyik'uuky; jøts

ku øts ojts nja'aty ndsøøñ øy magajp, meets ojts xmø'øy nja'ataajk.

36 Ku øts nwet ojts xka'ejtxi, meets ja ojts xmø'øy; jøts ku øts ojts nbiky, meets ojts x'atskajpxjot'amøki; ku øts ojts nyiktsumy, jap meets ojts xkugajpxi.”

37 Jøts pønts wyinaty tø yikupøkti jøts øts ja xnøjmidit: “Windsøn'ajtim, ¿windiixik me n'ijxy jøts ku me myu'øøky, jøts øø nyaky kaaky? ¿Uk windits me myik'ijxy mdøødsi, jøts øø nyaky ja nøø?”

38 ¿Uk windits øø n'ijxy jøts ku me mja'aty md-søøñ ma jaty kajp, jøts øø nyaky ja ja'taajk, uk windits øts ja wet naamy nyaky? ¿Juuni øøts ja tø n'uk'ixy jøts ku ja mga'ejtxiyi?”

39 ¿Uk windits me m'ukyik'ijxy jøts ku me mbiky, uk windi øø n'uk'ijxy ku me myiktsumy, jøts øø n'atsku'ejxi jap puxøjkjøtpy?”

40 Jøts yide'en ø n'adso'ot: “Janch øts idø'on nwa'añ, øy yiini wyaani midi tø xuujnidi, midi øts tø xmøøjyidi ja nmigu'uk pøn ka'ejtxidip ja pudøjkin, øts idø'on ja jade'en ñamyayi tø xundi.”

41 'Winets øts ja nnøjmidit ja n'anajy'ambyitti: “Jiwa'akti, kidi øts ya xwin'ejxti meets kawindiidyumbidi; nøjkxti jap ma ja jøøn jap nijuuni kya'øøky, midi ja miku' yiktajøp'ejxtip møøt ja miku'ankestøjkti.

42 Tøxi ø nyu'øøky, jøts meets ojts ka' xmø'øy ja ngaaky; ojts ø ndøødsi, jøts meets ojts ka' xyik'uuky;

43 ojts ø nja'aty ndsøøñ ma jaty kajp, jøts mee ka' xyikja'taajky. Ku øts nwet ojts kya'ity, jøts meets ja

nwet ojts ka' xmø'øy; ka' meets ojts xku'ejxi ku øts ojts nbikyí, ku øts ojts nyiktsumy.”

44 Jøts øts ja xnøjmidit: “Windsøn'ajtim, ¿windixik me n'ijxy jøts ku mets wyinaty yuu xøøw myik'ookwa'aníyi, uk tøødsi wyinaty myik'ookwa'aníyi, uk ku me mja'aty mdsøñ øy magajp, uk ku mwet mnaamy kya'ityxi, uk mbikyí m'añi, uk myiktsumy myiktiy, jøts øøts idø'on niti pudøjkin nguidyimdyuñ?”

45 Jøts øts ja yide'en n'adso'odit: “Janch øts idø'on nwa'añ, øy yiini wyaani jøts ku ka' tø xuujnidi niti pudøjkin pøn ja ayo'on tyanaxpy, ni øts køjxp ja tø xkatuujnidi.”

46 Winets ja jatyi ñøjxtit ayoobi xemikøjxp, jøts pøn wyinaty yikupøkti jøts ja ñøjxmidit tsinaabyi xemikøjxp ma ja tpaajtidit ja Dios kyunuu'kxin jøts ja tsinaa'yin øy yikxon.

26

Ku ja Jesús yikajpxy'aty sudso ja yikmatst

1 Ku ja nwindsøn'ajtim Jesús jade'en y'ukwan'abajtiyñ, jøts ja tnimaay ja pyabøjkitøjk:

2 —Mnija'widipxi jøts ku ja paski xøøw ja majtsk xøøwni; jade'ents ø nyikøyakt jøts øts jaa'y xyikrus-pattit.

3 Jøts ñiñayjaty ñamyujkidøø ja teetywindsøndøjkti, ja kajpxwejpitøjkti, jøts ja israelit møjaa'dyøjkti, jam ja tøjkwemp ñamyujkidøø ma ja Caifás jam kyutujktaajk midi ja teetywindsøndøjk wyindsøn'ajttip.

4 Jam ja ojts tkajpxy'atti jøts ja ttanibiktaajkiðøø sudso ja yiknidaayit ja nwindson'ajtim Jesús jøts ja tyimyatstit, jøts ja tyimyik'ooktit.

5 Jøts yide'en idø'øñ ja wyandøø:

—Ka' y'øyit ku xøjøøjtj jade'en ndu'unindit, jøts jaa'y kidi xem yam nañibidi'igyidi.

Ku ja Jesús yiktagutajmji'iky ja pa'akxuu'kpi

6 Jøts ja nwindson'ajtim Jesús jam ja wyinaty Betania, jam Simón tyøjkwindum pøn ja møj pu'uts pa'am pøjkp;

7 jøts tø'øxyøjk ja jam ñimejni pøn t'ukoon tukmøj abøjk'i'ñu'nk ja aceite midi pa'akxuu'kp, ujtskoni ja tmimiiñ jøts ja'abi midi idø'øñ janch tsowi. Xjats ku ja nwindson'ajtim Jesús jam wyinaty tø twingu'ixaagi ja mesi, winets ja tø'øxyøjk tpiktaajky ja aceite midi pa'akxuu'kp jam nwindson'ajtim Jesús kyubajkøjxp.

8 Jøts ku ja pyabøjkpitøjk jade'en ojts t'ejxti, jøts ja yjantyimy'ambøjktøø jøts ñømbinaaxwa'ktøø:

—¿Jøts tigøjxp ku yø jade'en nugo wyindigøy?

9 Tøxik yø jeexyip yiktøøky jøts maamyeeñ jeexyip yikpøjkp, jøts ayoobi jaa'y ja jeexyip yiktabudøkidi.

10 Tyimyadoow ja nwindson'ajtim Jesús ja', jøts ja tnimaay ja pyabøjkpitøjk:

—¿Tigøjxp ku yø tø'øxyøjk jade'en jotkøjxpim xnøjmidi? Pø yø'øxi dø'øñ øy'ajtp ku øts yø jade'en tø xuiñ.

11 Jaakmibaat yø ayoobi jaa'dyi, ka'axi yø ma ñøjkxti, ejtpyim yø xmøøt'ejtkunaxtit; øtsts ka', ka' mee xumi ya nwindsinagyunaxt.

12 Yø' midi'ibi yø tø'øxyøjk tø ttuñ, ku øts nne'kx aceite yø tø xpiktaajkiyi midi pa'akxuu'kp, ja'agøjxp yø jade'en tø ttuñ kuts ja n'o'jkin wyingoni.

13 Janch øts idø'øñ nwa'añ, ømyadso'att pøni ma yikajpxwa'kxy ya'at øgyajpxy ya'at ømyadya'aky midi tniğajpxp sa nitso'ok'ajtin yikpaaty, jøts yiktukmidøy ja naxwii'ñit jaa'y, yikajpxpim yikmadya'akpim yø' midi yø tø'øxyøjk yam tø ttuñ.

Ku ja Judas ñay'awajniyi jøts ja tkøyakt ja Jesús

14 Xjats nidu'ugin ja ñimakmajtskpi pabøjkpitøjkti, pøn txøøw'ajtp Judas Iscariote, ja' ojts tniñikxy ja teetywindsøndøjkti, jøts ja ojts tminagyajpxyi,

15 yide'en ja tniṁaay:

—¿Wine'en ø xmiju'udyit jøts øts ja nwindson'ajtim Jesús ngøyakt?

Xjats ja ojts tmijuydi ee'pxmajk, jade'en ja meeñ ja ojts tmo'odi tum puxplati.

16 Jøts jaayip ja Judas ja twinmaa'ñ'ajtni juuni ja tjadyimy'ukøyakt ja nwindson'ajtim Jesús.

Ku nwindson'ajtim yjaak'uk'a'ux'ajtni møøt ja pyabøjkpitøjk

17 Xjats ku ja xøøw midukxøøw tyuujnøø, ku ka' pyaat'aty jøts ja tsapkaaky yika'aty levaduri møøt, ja'abi xøøwts idø'øñ ku ja nwindson'ajtim Jesús ja pyabøjkpitøjk ñimejniyi wingon jøts ja ojts tyiibyikyiyi, yide'en ja wyandøø:

—¿Ma xtsøky nyiknajxint ja paski a'ux jøts øøts ja n'a'ejxit?

18 Jøts ja tniṁaay:

—Nøjkxti jam kajpjotp ma chøøni ja jaa'y, tø xnijawidi pøni pøn, ja'ats mnøjmidip: “Yide'en ja windsøn wya'añ: Wingomp øts ja n'o'jkin, jøts mets mdøjkjøtpy øts ja paski a'ux nyiknaxwa'añ møøt øts ja nbabøjkpitøjk.”

¹⁹ Jøts ja ojts jade'en tpadundi sa ja nwindsons'ajtim Jesús ja wyinaty tø y'ane'emyidi, ojts ja tyik'øyidi ja paski kaaky jøts ja yik'a'ux'att.

²⁰ Xjats ku kyoodsiyii'ñ, winets ja nwindsons'ajtim Jesús tmøøt'ixaaiky nimakmajtsk ja pyabøjkpitøjk ma ja mesi jam wyinaty;

²¹ jøts ixam wyinaty tyimgyaydi ku tnimaay ja pyabøjkpitøjk:

—Janch øts idø'øn nwa'añ jøts ku mee nidu'ugin amaa'tsk'ampy xkøyakwa'añ.

²² Jøts ja yjotmadyøjkidøø, jøts xem yam wyandøjkidøø:

—¿Øts me windsøn'ajtim ndejint xejp?

²³ Jøts nwindsons'ajtim Jesús ja ojts yide'en y'adsøyidi:

—Pøn ø møøt tø ngay tø nji'kxy, ja'ats øts idø'øn xkøyakwamp.

²⁴ Janch jajtp øts inet ixyam jade'en sam ja Dios kyajpxy wya'añ. ¡Yjanch ayøøy ja jaa'yu'nk pøn x'ukøyaj'oo'kp! Ne'egi tyimdyøøbik jeexyip ku jeexyip kyidyimgye'exy.

²⁵ Winets ja Judas ojts kyajpxy, pøn idø'øn wyinaty køyakwajnip, jøts ja wya'añ:

—Windsøn, ¿ti wan ja ndejin y'øtsi?

Jøts nwindsons'ajtim Jesús ja t'adsøøy:

—Paty mets.

²⁶ Ixam wyinaty kyaydi, jøts ja nwindson'ajtim Jesús tnixajiyii'ñ tu'uk ja tsapkaaky, jøts ja ttukmøja'wiyii'ñ ttukunuu'kxyja'wiyii'ñ ja Dios Teety, jøts ja ojts t'adujkpaky, winets ja tmøøy ja pyabøjkpitøjk, yide'en ja wyaañ:

—Kaydi ya'at; yø' øts idø'on ñamyayi nne'kx'ajtpy.

²⁷ Winets ja tnixajigyojmi tu'uk ja uujk'ii'ñ, jøts ja ojts ttukmøjaw i ttukunuu'kxyjawi ja Dios Teety, jøts ja ojts tmøøy ja pyabøjkpitøjk, jøts ja t'ukwa'kxtit, yide'en ja tnimaay:

—Uukti ya'at niduki'iyi,

²⁸ øts idø'on yø' ñamyayi nni'jpy midi yam jadigojk tñankñamyi'øbyøjkip ja jaa'y møøt Dios, midi ø nyikwidsump nyikwidajxpy ja'agøjxp jøts pojkpitumbi jaa'y yikpojkipimaa'kxtit, jøts ja Dios Teety ja wyanda'aky jade'en tyik'adukt.

²⁹ Janch øts idø'on nwa'añ jøts ku øts ya'at uvi nøø ka' tsojk n'uk'uknit, jaanim jadigojk n'uujkindit jotkujk ku Dios Teety ja kyutujk tyiknaxkida'akt midi yjaa'y ja tyanitanaapy.

Ku Jesús ja ojts kø'øm tñigajpxy jøts ku Pedro ja kyu'øøniyt

³⁰ Xjats ku ja t'øøgøjxtøø ja iy midi ja Dios yja'ajpty, winets ja ñøjkxtøø jam kojpkøjxp midi yiktejp Olivos.

³¹ Jamts ja nwindson'ajtim Jesús ja ojts ñii'mxyidi:

—Kuwan i meets inet xmajtstutkøxt ya'atpi koots; pø yide'enxi jap nøkyijxpy wya'añ: “Nyik'ookp øts ja borreegi ejxpi, wan ja byorreek jadi'iñi tyø'øwya'kxy.”

³² Kuts øts ja o'jkin n'ukmimajada'akt ku øts jadigojk njujkpyøkt jøts ø nbidsø'ømt jap oo'kpi jutjøtpy, winets ø nnøjkxt jawyeen jam Galilea, namga'anim meets jam wyinaty mnijkxy.

³³ Xjats ja Pedro ja ojts y'adsøyi:

—Øy me niduki'iyi jaa'y mjaja'dyigøøgyixyi, øts niwindem ø ngaja'dyigøy.

³⁴ Winets nwindson'ajtim Jesús ja yide'en tnimaay:

—Janch øts idø'øn nwa'añ, jøts ku yam koots inet ku ka'ap tsapni'aaw y'ayajxi'ikñim, tigøøk ojk mets wyinaty tø xku'iñ jøts ku me xka'ijxy'aty.

³⁵ Jøts ja Pedro tjaaktyimñimaay ja nwindson'ajtim:

—Nijuuni øts jade'en nga'adi'ich, njady-imyja'øøky me møøt.

Jøts ja yjadu'ukpimidi, nayide'en ja wyamidi.

Ku ja Jesús t'ajot'ajty ja Dios Teety jam Getsemani

³⁶ Jøts idø'øn ja nwindson'ajtim Jesús tmøøtja'jty ja pyabøjkpitøjk ma ja et jam txøøwi Getsemani, jamts ja tnimaay:

—Ya awejxti, wan øts ja Dios Teety t'ats'ajot'aty.

³⁷ Jøts ja tmøødiyii'ñ ja Pedro møøt namajtsk ja Zebedeo y'unajk, jøts ja jotmay yjanchtatøjkiniyi.

³⁸ Xjats ja tnimaay ja pyabøjkpi midi ja y'ukwaaw nidigøøk:

—Janch køjxp øts njoojt jadi'iñi, o'jkin'ampy ø tø njotmaadyøki. Awejxtits ya, kidim mma'oo'knidi, møøtwijy'ejtik øts.

³⁹ Winets ja nwindson'ajtim Jesús jawaani yjaaknajtsyø'øyiñ, jøts ja ojts jadi'iñi

ñagyuxendya'agiyi, jøts ja ojts t'ajot'aty ja Dios Teety, yide'en ja wyaañ:

—Dios Teety, øyik jade'en xjanchkayikjatt, jøts øts kidi jadine'en ayo'on ndyimbyaaty; øy idø'on kidyimyjade'eni sam ø ndyimjatsøkyin, jade'en øts idø'on ngupøkt pøni sa me xamidsøky.

⁴⁰ Xjats ja wyimbijty nay jam ma ja pyabøjkpi jam wyinaty nidigøøk tø t'ukyiktañ, kuts ja tpaajty tødamik ja mya'oo'knidi; winets ja ojts tnøjmi ja Pedro:

—¿Niwine'enin mee tø mguidyimyajada'aky jøts meets jeexyip xmøøtwijy'ity?

⁴¹ Wejti kajti, ajot'ajtti ja Dios Teety, nay'ejx'etidi jøts kidi mmimajada'agidi ja ayo'on midi wingomp. Janch øts idø'on nwa'añ ku ja winmaa'ñ yjanchja'ødyunwa'añ, ja ne'kxts jaayi ja ka'øybi tumbi amutsk'ejxiyip.

⁴² Xjats ojts ñøjkxkojmi nay jam jadigojk, winets ojts yide'en t'ajot'aty ja Dios Teety:

—Dios Teety, pøni ka'ap jade'en xyikjaty jøts øts ja ayo'on xkadukpaatt, wants idø'on jade'en tjaty pøni sa me kø'øm xamidsøky.

⁴³ Xjats jam yjaakwimbijty jøts ja pyabøjkpitøjk jadigojk tpatkojmaa, janchmaadip ja jam, wimbeets ja tsuu ja yik'ejtniyidi.

⁴⁴ Jøts ja nay jam tnikejky, jøts midigøøk ojk ñijkxy Dios Teety ajot'ajtpi, nayide'en wyangojmaa.

⁴⁵ Winetnims ojts ñijkxy ma ja pyabøjkpitøjk jam wyinaty, jøts ja tnimaay:

—Tøts inet, maanidi poo'kxnidi, wan jade'en tjaty. Tø dø'on tyimbyaaty jøts ku ø nyikøyakt jøts ø nyiktagidøkit ja pojkpitumbi jaa'dyi.

46 Pidø'okti, wan tjaa'myindi; ixa wyingøñ pøn ø xkøyakwamp.

Ku ja Jesús yikmajch

47 Nay ixamnim ja nwindson'ajtim Jesús wyinaty jade'en wya'añ ku yja'jty ja Judas, pøn ja y'ukpabøjkpi'ajtpy jøts ja møøt tyika'pxy nimakmajtsk ja pyabøjkpitøjk, ja'ats idø'on jam tmøøtmeen ja mayjaa'y tum tsujx møøt jøts tum kipkyapidi. Ja teetywindsøndøjk, ja israelit møjaa'dyøjk, ja' dø'on ja kajxidip.

48 Jøts ja Judas, pøn ja nwindson'ajtim tkøyajkp, yide'en ja wyinaty ja tiy'ajtin tø tyaky, yide'en ja wyinaty tø wya'añ:

—Pøni pøn øts inet ndsu'kxpy, ja' idø'on ja wyinaty; jøts ja' idø'on mmatstip.

49 Xjats ja myiiñ jøts ja nwindson'ajtim Jesús yiknimiñ, yide'en ja tnimaay:

—iØts windsøn mempp!

Jøts ja ojts ttsu'kxy.

50 Jøts ja nwindson'ajtim Jesús ja ojts yide'en y'adsøyyi:

—¿Ti migu'uk mnimimpy? ¿Ti mdsøjkpy?

Winets ja jaa'y ja wingon ñimejniyøø jøts yiknixajiyii'ñ ja nwindson'ajtim Jesús, ojts yikmajtsni.

51 Winets tu'uk ja nwindson'ajtim Jesús myigu'uk tju'jty tu'uk ja tsujx, jøts ja ojts ttaxikpo'otu'uty tu'uk ja teetywindsøn tyumbi.

52 Winets ja nwindson'ajtim Jesús ja tnimaay:

—Øødyuñ yø mdsujx nay jap xtyimbyikta'akt ma yø tø xjuuty. Pøni pøn ttatseptump ja tsujx, nay ja'ats ja tya'ookp.

53 ¿Ka' xnijawí jøts ku øts jotmøñ n'amido'ot ja Dios Teety, jøts øts ja xanigaxt icyamyi naxy nimakmajtsk piky ja ankilistøjk midi tseptundip?

54 Kuts ja jade'en yjatt, ¿ti jats jade'en y'adukt ja Dios kyajpxy? Pø yide'enxi ja wya'añ jøts ku tyimyjade'en yjatt sa dø'øn yam yjatwa'añin.

55 Xjats ja nwindson'ajtim Jesús tnimaay ja mayjaa'y:

—Ja tsujx, ja kipy, ja tsaā meets yam x'uktanimenip, tø øts yjawí nmaa'tsni! Ejtp meets jam y'ijty jabom jabom nmøøt'ixakunaxy, jøts mee nyik'ixpiky jam tsaptøjkjotp, ¿tikuts øts jamyi xkamajstøø?

56 Ja'agøjxp ya'at jade'en yjaty jøts ka'pxy pyidsø'ømt sa jaty ja Dios kyugajpxy wyandøø, ku ja tnigajpxidi ja Dios kyajpxy.

Winets ja nwindson'ajtim Jesús pyabøjkpitøjk ojts kyaakøxti jøts ja nadyu'uk y'ukyikmajstutnaa.

Ku ja Jesús yikwaanijkxy jam kutujktaajkjotp

57 Jøts ja jaa'dyi pøn ja majtsiyi, jam ja tyiknøjkxti Caifás wyindum, ja teetywindsøndøjk myøjwindsøndi ma wyinaty tø ñamyukyidi ja kajpxwejpitøjkti møøt ja møjaa'dyøjkti.

58 Jøts ja Pedro ja ojts pyaniikxyi, jagam ja pyayø'øyi jøts ja ojts tpaja'aty jap møj windsøn tyøk'agui'py, jøts ja jap tyøjkii'ñ jøts ja tmøøt'ixaajky ja ejx'ejtpitøjkti, jøts ja t'ejxwa'añ sa dø'øn ja yjade'embí yjadyimy'ukugøxit.

59 Jøts ja teetywindsøndøjkti, jøts ja møjaa'dyøjkti, jøts niduki'iyi ja kutujk adsinaabyidi, ja' ja yjadyimy'ixaadyip ti ja yjadyimy'uktani'øønidip

ja nwindson'ajtim Jesús, øy ja yjagajade'eni jøts ja ttaguwaníwya'andi ja o'jkin.

⁶⁰ Ja'ats kyapattip sudso tyiidyøkit, may ja jaa'y yjamendøø, jøts ja tjadyimñi'øø'ndaagidi ja nwindson'ajtim. Xjats yja'tinim namajtsk ja ni'øø'ndaajkibidi midi ñadyijyi tsaach'a'ejxnaxtip,

⁶¹ jøts ja yide'en wyandøø:

—Yø jaa'y yide'en waan: “Ixe øts yø Dios chaptøjk nyikiday, jøts øts yø kyidigøøk xøøw nyik'øyigyojmit.”

⁶² Winets ja teetywindsøndøjk myøjwindsøn wya'kukiyii'ñ, jøts ja nwindson'ajtim Jesús yik'amidøøy:

—¿Niwine'enin yø xka'adsowimbetwa'añ? ¿Ti dø'on yø' ixa jade'en myiktani'øøni?

⁶³ Jøts ja Jesús ka'ap ja ojts t'adsøy. Xjats ja wyindsøn ojts ñii'mxyi:

—Tuk'ejx Dios, jøts xnigajpxt tiy janch. Tuk-madook øøts pøni mets idø'on mjanchCristo pøn ja Dios Teety y'u'nk'ajtpy.

⁶⁴ Jøts ja nwindson'ajtim Jesús ja tnimaay:

—Øts ja', sam ixa tø mwā'añin. Jøts nayi nduk-madoodip icyam jøts ku ø x'ejxtit ku n'ixa'akt jam Dios Teety kyutujktaajk jøp'am.

⁶⁵ Winets ja teetywindsøndøjk myøjwindsøn ttakø'jtsiyii'ñ ja wyet, jøts ja wyaañ:

—Tø ya'at jaa'y tmigajpxigøy ja Dios; ¿ti ejxpi ti nija'wibi jaaktsojkiyip? Tøxi xmadojidi ja y'ayuujk jøts ku kya'øgyajpxy;

⁶⁶ ¿sa mee m'ukwa'añ?

Xjats ja wyandøø:

—Taja'jtip pøky yø', wan t'øøky.

67 Winets ja ojts twingutsujidi, jøts twojptøø jøts ttsee'ktøø, pømbi ja kojxiyip wemp'am,

68 jøts ja yiknøjmi:

—Pø metsxi mCristo, iuknajtsjawits pøn tø mgøxyi!

Ku ja Pedro tku'ñ jøts ku ja ka' t'ijxy'aty ja Jesús

69 Ixap idø'on ja Pedro chøøni tøjkwimpy, jøts ja tu'uk tø'oxyøjk ñimejni midi jam tump, jøts ja ojts ñi'mxyiyi:

—¿Kidi metsip y'ijty mmøøtwidijtpy yø Jesús midi Galileit etjotp tsoo'mp?

70 Ka'ats ja Pedro ja tkupiky ma ja mayjaa'y jam wyinaty, yide'en ja wyaañ:

—Ka' nnijawi pø ti mets jade'en mgajpxpy.

71 Ixap ja Pedro wyinaty pyidsømwani ma ja tøjkaaw, ku ja ojts jadu'uk ja tø'oxyøjk y'ijxyi, jøts ja ojts ttukmadøy pøn jam wyinaty:

—Yø jaa'yxi tmøøtwidejtp yø Jesús pøn Nazaret kugajpíp.

72 Jøts ja Pedro jadigojk tkagupøjkøjmi, yide'en ja tyimwyaañ:

—Ka' øts yø jaa'y n'ijxyi.

73 Xjats ku jawaani y'ijty, jøts ja Pedro ja jaa'y ñimejnøø pøn jaty jam wyinaty, jøts ja ojts ñi'mxyiyi:

—Janch nayide'endam mets, nayi Jesús tam me mjanchmigu'uk'ajtpy, kø'ømts yø m'aaw m'ayuujk myiknigaxi'igy.

74 Jøts ja Pedro janch wenk ja kø'øm ñawyaañi ñadyiyi, ka'ap ja tyimgyupiky, tyuk'eix ja Dios ja', tiy janch ja tyimwyaañ ku ja tka'ijxyi:

—Nguidyimy'ijxy'ajtpy øts yø jaa'y.

Winets ojts nay jatyi y'aya'axy tu'uk tsapni'aaw.
 75 Xjats ja Pedro ja tja'myejchnim ku ja nwindson'ajtim Jesús ja wyinaty tø ñi'mxyiyi: “Yam ja tsapni'aaw kya'aya'axñim, tø mets wyinaty tigøøk ojk mwani jøts ku me xka'ijxy'aty.” Jøts ja Pedro jam pyidsiimy, jøts ja nugo y'uk'amyaaxni y'uktsaachyaaxni.

27

Ku ja Jesús yiktagidøjkiñ ja Pilato

1 Xjats ku yjopy'ajty, jøts ja teetywindsøndøjk møøt ja israelit møjaa'dyøjkti ojts ja tkajpxy'atti, jøts ja tu'ugyi tniwinmaa'yidøø jøts ja tyik'ookit ja nwindson'ajtim Jesús.

2 Xjats ja kowññ tyiknøjkxti jøts ja yiktagødøkiñ ja Poncio Pilato, pøn jam wyinaty windsøn'ajtp.

Ku ja Judas y'ø'jky

3 Jøts ku ja Judas ojts t'ixy, pøn tkøyajkp ja nwindson'ajtim, jøts ku ja nwindson'ajtim Jesús tø yiktaguwañniñ ja o'jkin, ja'ats ja ojts jadigojk tsaachkuwinmayi jøts ja tyikwimbijty ja meen ee'pxmajk tum plati, jade'en ja tkømøøy jadigojk ja teetywindsøndøjk jøts ja israelit møjaa'dyøjkti,

4 yide'en ja tnimaay:

—Tø njantyimdyundigøy, møk ø tø njantyimdyundigøy ku øts yø tø ngøyaky jøts yø y'ookt, jøts niti tundigø'øyin yø tkamøøt'aty.

Jøts ja ojts yide'en yik'adsøy:

—Jøts, ¿ti øøts ja ndungi? ¡Mgø'ømwinmaa'ñxi mets yø'!

5 Wīnets ja Judas tñajtswøjyīi'ñ ja meēñ jap tsaptøjkøtpy, jøts ja chøø'ñ jøts ja ñijkxy nayuktsu-ujmibi.

6 Jøts ja teetywīndsøndøjk tkonjø'ktøø ja meēñ jøts ja wyāndøø:

—Ka'ap yø kyutujkyi jøts yø meēñ jap ngugo'ona'andit jap limunsi abøjk'ii'ñjøtpy, kumi jaa'y chow yø'.

7 Jøts ja nay jatyi tkajpxy'ajttøø, tyik-tunkpaaṭwa'andi ja meēñ jøts ja ttaju'udyit naajx jøts y'øyt jadū'uk kami santi mā ñaxøkidit ja jaa'y pøn tso'ondip abikyajp. Campo del Alfarero, ja' ja naajx xyøøw.

8 Ja'agøjxpts ixyambaat ja naajx yiktijy Ni'jpkyam.

9 Jade'ents ja Jeremías ja y'ayuujk tyiiy ku ja Dios ja wyinaty yide'en jekyip yikwa'añiyi: “Jøts ja tñixajidøø ja meēñ ee'pxmajk tum plati (ja' ñimeēñ midi ja Israelit jaa'y ja wyinaty tø pyiktaajkxiyi),

10 jøts ja ttajuudyøø ja naajx, jade'ents øts ja Dios Teety xnimaay.”

Ku ja Jesús twinguwa'jkīyī'ñ ja Pilato

11 Jøts idø'øn ja nwindson'ajtim Jesús ja jaa'y yiknøjkxiyi jam øyikutujkpi wyingujkp, jøts ja yide'en tyiibyøjkxiyi:

—¿Mets idø'øn israelit jaa'y mjanchniwīndsøn'ajtpy?

Jøts ja nwindson'ajtim Jesús yide'en tñimaay:

—Janch jade'en idø'øn ja', sam ixa tø mwa'añin.

12 Jøts ku ja teetywindsøndøjk kyajpxjø'ktøø møøt ja møjaa'dyøjkti, jantyimy'øø'ndip idø'øn ja', jøts ja nwindson'ajtim Jesús ja tkidyimy'adsøy.

13 Winets ja Pilato ja ñimaajyøø:

—¿Ka'ap yø xmadøy sa jaty ixa myikni'øøni?

14 Jøts ja nwindson'ajtim Jesús ka'ap y'adsøy; ja'ats ja yikutujkpi ñigyumaap yja'wiyi'ñ jøts ka'ap ja y'uktaabyatni.

Ku ja Jesús ñidujkiy'ñ jøts ja y'ookt

15 Jade'ents idø'øn ja yikutujkpi txumikostrumbri'aty ku xøøw tyuñi, jøts ja tu'uk tyik'awa'atspidsimy ja tsumyjaa'y, ja mayjaa'y ja kø'øm twi'ejxtip, pøni pøn ja chojktip ja'ats ja yik'awa'atspidsømdip.

16 Jamts idø'øn tu'uk ja tsumyjaa'y wyinaty, Barrabás ja xyøøw. Tyimyjanijawi ja' ku ja møj tundigøøbyi;

17 jøts ku ja jaa'y ñamyujkøjxidøø, winets ja Pilato yiktiy:

—¿Pømbi mdsojktip jøts ø nyik'awa'atspidsø'ømt: yø Barrabás, uk yø Jesús, midi yiktejp Cristo?

18 Tøts ja wyinaty tnijawi ja yikutujkpi jøts ku ja ja'agøjxp tkøyakti ku ja nawyinaxi tjawidi.

19 Ixam ja Pilato wyinaty chøøni kyutu-jktaajkjotp, ku ja ñidø'øxy ñimaajyøø: “Ti yø øyjaa'y tø xanibøjkiñi; majtstu'ut, janch wenk ø ngumaay tsu'uuy yø'øgøjxp.”

20 Jøts ja teetywindsøndøjkti møøt ja møjaa'dyøjkti ojs ja ttukmi'bøkti ja mayjaa'y jøts ja t'amido'odit jøts wan t'awa'atspidsimy ja Barrabás, jøts y'ookt ja nwindson'ajtim Jesús.

21 Xjats ja yikutujkpi ja jadigojk ñimaajyidøø, jøts ja ojts tyiktiy:

—¿Pømbi mee ndsøjkpy jøts ø nyik'awa'atspidsø'ømt?

Jøts ja mayjaa'y ñømdøø:

—Wan yø Barrabás t'awa'atspidsimy.

22 Jøts ja Pilato tjaaktyiktiy:

—¿Jøts sa øts yø ndu'unt yø Jesús midi yiktejp Cristo?

Jøts ja ojts niduki'iyi y'adsowdi:

—¡Yikruspat!

23 Winets ja Pilato ja ñimaajyidøø:

—¿Ti tundigø'øyin yø tø ttuñ?

Jøts ja jadigojk jawaani møk wyandøø:

—¡Yikruspat!

24 Xjats ku ja Pilato ojts t'ixy jøts ku nisudso'ampy kya'øyi, ne'egi jinaxy ja jaa'y tseeni mo'tsni y'adøtsnidi, winets ja nøø ja ojts t'atsnanky'iyi, jøts ja kyøbuju jam mayjaa'y wyingujkp, yide'en ja wyaañ:

—Kidi øtsip wamp jøts yø y'ookt, ka' øts yø nbøky'ixy. Meets yø mnija'wip pøni sa yø xunwa'andi.

25 Xjats ja jaa'y niduki'iyi y'adsoodøø:

—¡Niduki'iyi øøts yø xpaat'aty ja y'o'jkin, nayide'en ja møj ja mutsk, u'nk una'jk, pøn yø kapaadip!

26 Xjats ja Pilato tyik'awa'atspidsimy ja Barrabás; jøts ja ojts tni'ane'emy jøts ja nwindson'ajtım Jesús yikwopt, jøts ja ojts tkøyaky jøts wan tyikruspatti.

27 Jøts nay ja' ja syoldadi tyiknøjkxtøø ja nwindson'ajtım Jesús jam kutujktaajk agø'øm,

jøts ja jam ojts twaamujkøxti niduki'iyi ja soldadi, jøts ja ojts tnabejkidi ja nwindson'ajtim Jesús.

28 Jøts ja wyet ja ojts tjajniki, jøts ja tsajpts wet ja ttanijandøø,

29 jøts koroni ja ojts ttagujandi tum kujp awiity ja', jøts ja kipy ja ttagøkajpidøø y'aga'ngyøjø'øm. Winets ja twinguxanaadyøø jøts ja ojts tjanchaxe'ekti, yide'en ja tnøjmidi:

— ¡Dios kunuu'kxip ya'at israelit jaa'y wyindsøn!

30 Jøts ja tnitsujidi, jøts ja jamyi tnixajidi ja kipy jøts ja ttaguwojppø'økti.

31 Xjats ku ja jade'en t'uktaguyajtøø, t'uknixektøø t'uktaxektøø, winets ja ttanijanduttøø ja tsajpts wet jøts tpiaktaajkidi jadigojk ja kyø'øm wet. Jøts ja tyiknøjkxti jøts ja kyiruspatt.

Ku ja Jesús kyiruspejty

32 Tyimy'ixam wyinaty tø choondi ku ojts tpaatti tu'uk jaa'y pøn kugajp'ajtp Cirene, Simón'ajtp ja'; ja'ats ja ojts ttaguwanidi jøts ja ttsøøjmit ja nwindson'ajtim Jesús kyirus.

33 Jøts idø'on ja jade'en yja'ttøø mā ja et txøøwi Gólgota, midi yide'en ayuujk pidsøømp: Oo'kpi Kyubajk Pajk.

34 Jamts ja tmøødyi ja vino adaamuky møøt ja ujts ta'am nøø; kuts ja tjā'gyajpy xjats ja nika'ap t'uujky.

35 Kuts ja wyinaty tø tyikruspajtnidi, winets ja soldadi tniguyajtidøø ja nwindson'ajtim Jesús wyet, jøts ja ojts twejtswa'kxti. Jade'ents ja Dios kyugajpxy tyimdyiy ja y'ayuujk ku ja wyaañ: “Tø

øts nwet ja xwejtswa'kxidi, tø ja tniguyatti jøts ja t'ejxti pøn uktaja'atip.”

³⁶ Winets ja jamyi y'ixaktøø jøts ja t'ejx'etwa'andi.

³⁷ Jøts ja jam y'agubajkp ojts tkøxjajyidi ja letri midi wamp jøts ti tyuku'o'jkidip. Yide'en ja wya'añ: “Ya'at idø'øñ txøøw'ajtp Jesús, israelit jaa'y wyindsøndi.”

³⁸ Namajtsk møj maa'tspi ja ojts tmøøtkruspety, tu'uk y'aga'ngyøjø'øm jøts tu'uk y'anajkyøjø'øm.

³⁹ Jøts ku jam pøn ñaxy tum wenk ja myigajpxyi, tum kubajkwibejttip ja',

⁴⁰ jøts ja wya'andi:

—Metsxi xijy tsaptøjk myikidaapy jøts jadigojk xyik'øyi kyidigøøkkxøøwyi, wants mga'uk'øøky. Pøni mjanchDiosu'nk tam mets, winak jam kruskøjxp.

⁴¹ Nayide'en ja tyaxejkmii ja teetywindsøndøjkti ja kajpxwejpitøjkti, ja fariseotøjkti, jøts ja møjaa'dyøjkti, yide'en ja agø'ømyi ñawya'añidi:

⁴² —Tø wyenkpi tyiktsø'øky, ka'ats tjaty jøts kø'øm ñankcho'ogit. Pøni janchts ku ja Israelit jaa'y tjanchwindsøndi, wan jam t'ukwinaky kruskøjxp, jaanims idø'øñ njanchja'want.

⁴³ Pø Diosxi y'ajoojtip; wants inet idø'øñ t'ukpidøkiyi jøts kyayik'oogit, pøni janch ku ja yjanchøkyi; tøxi yø kø'øm wya'añ jøts ku yø Dios U'ngi.

⁴⁴ Ja maa'tspibaat ja nayide'en yjanchka'uk'ømyigajpxmiyi midi ja jam wyinaty møøt tø kyiruspety.

Ku ja Jesús y'ø'jky

45 Winets ja et kyoodsiyi'ñ kujkxyøøw, jøts møj winakxyøøwnim yjajtaajky jadigojk.

46 Jøts nay jatyi ja nwindson'ajtim Jesús møk wya'añ:

—Elí, Elí, ¿lama sabactani? —midi yide'en tyijpy: Dios Teety, Dios Teety, ¿tigøjxp ku øts jade'en tø xnanktyuñi?

47 Ojts ja winaagin tmadowdi pøn jaty jam wyinaty, jøts ja ñømdøø:

—Ja Elías yø jaa'y wyaadsøøpy, ja Dios kyuga-jpxy.

48 Winets ja jatyi nidu'uk putyi t'atskøøñ tu'uk ja tanøxe'jts, jøts ja ojts ttabadijy ja vino ta'am, winets ja kipy jøp'am tkøxkøøñ, jøts ja ojts tta'agonji'iky jøts ja txeetst.

49 Yide'ents abiky wyamidøø:

—Majstutu; wan t'uk'ijxyim pøni janch nimejnip inet ja Elías jøts ja o'jkin kyadukpaadit.

50 Jøts ja nwindson'ajtim Jesús jadigojk ojts møk ja y'ayuujk pyidsimy, jøtsnim ja y'o'jky.

51 Winets ja møj tsaptøjk awejtstuk nay jatyi tyakø'øtsiyi'ñ, kubajkp ja kyø'øts'awiyi'ñ jøts ja ok'am kyø'øtskidaajky. Jøts ja ujj ñajxy jøts ja tsaa kyu'kx'awigyijxy,

52 ojts ja oo'kpi nipots may y'awa'ach; ju-jkpyøjktibaat ja oo'kpidi pøn wyinaty ja Dios tø tjanchjawidi ku ja yjujky'ajttøø.

53 Jøts ja pyidsømdi jap yjutjøtpy ku ja nwindson'ajtim Jesús wyinaty tø yjujkyiky jadigojk, jøts ja kyajptøjkidøø jam Jerusalén midi ja Dios kyunuu'kxkyajp'ajtpy, ma mayjaa'y ja ojts y'ijxyidi.

54 Xjats ku dø'øn ja capitán pøn jaty ja jam wyinaty møøt t'ejx'ity ja nwindson'ajtim Jesús, ku ja ojts t'ejxti jøts ku ja uyx ñaxy jøts tuki'iyi sa jaty ojts yjaty, jøts ja yjadyimchø'jkidøø, yide'en ja wyandøø:

—Janch ja' tam yø jaa'y tø y'ity, ja Dios U'nk.

55 Jøts ja maadyø'øxyøjk jam wyinaty a'ejxujktip jagam, tum ja' pøn jam wyinaty Galilea tø tpad-soondi ja nwindson'ajtim Jesús, jøts pøn jaty ja wyinaty tø pyudøkiyi.

56 Ja María Magdalena dø'øn jam, jøts jadu'uk ja María pøn ja Jacobo tyaagip møøt ja José, jøts ja Zebedeo ñidø'øxy.

Kuja Jesús ja ñine'kx yikpiktaajky jap oo'kpi tsaa jutjotpy

57 Xjats ku ja et yjoo'xni jøts kyoodsiwyani, winets myiñ tu'uk kumeeñ jaa'y pøn txøøw'ajtp José, jam ja kyugajpi Arimatea, jøts nayi tø dø'øn ja wyinaty tpabøjki ja nwindson'ajtim Jesús yja'.

58 Ja'ats ojts t'ats'ixy ja Pilato jøts ja t'amidøøy ja nwindson'ajtim Jesús ñine'kx. Jøts ja Pilato ja ojts tyikutuky jøts wan tyikømø'øy.

59 Winets ja José ja t'axajøø, jøts ja wə'ats wet ja tta'abijty,

60 jøts ja t'atspiktaajky jam oo'kpi jutjotp midi ja wyinaty tø tyimykjemy'øyinim. Køøm jap y'uktøkiwya'añ mā ja tsaa jut jam. Xjats ku ja møj tsaa ja tu'uk t'ukta'agiñāa mā ja yiknidøki, jøts ja ojts ñøjkxni.

61 Nay ixam idø'øn ja wyinatymidi ja María Magdalena møøt jadu'uk ja María, jam ja wyinaty chøønidi jam oo'kpi jut agø'øm.

Ja soldaditøjk pøn jam y'ejx'ejttip ja oo'kpi jut

⁶² Xjats ku kyimjabom'ajty ku wyinaty tuki'iyi tø yik'a'ejxigyøxni, tum abaadi y'ejtñi ti jaty tsojkip ku poo'kxin xøøw, winets ja teetywindsøndøjk møøt ja fariseotøjk ojts t'ats'ejxti ja Pilato,

⁶³ jøts ja t'atsnimaadyi:

—Windsøn, ja' øøts yam tø nja'myech ku yide'en wyaañ ja windaay'ajtpi jaay, ku ja wyinaty jaak ja yjujk'aty, ku ja tijy kyidigøøk xøøw yjujkpyøkt jadigojk, jade'en pyidsø'ømt jadigojk jap oo'kpi jutjøtpy.

⁶⁴ Paty jade'en tigøøk xøøw xjady-imñanky'ejx'etit ja oo'kpi jut, jøts ja pyabøjkpitøjk kidi myendi koots jøts ja kidi tmaatsti ja oo'kpi ñine'kx ku ja tnøjmidit ja jaay: “Tø ja tmimajada'aky ja o'jkin, tø ja yjujkpyiky jadigojk.” Kuts jade'en tyaa'y'attit, yø'øts ne'egi janchka'ukmaañip, ne'egi ka'ap ja jawyeembi taay.

⁶⁵ Winets ja Pilato ja ñimaajyidøø:

—Ixyadi yø mdsoldadi ka'pxy niwine'enin yø y'ejx'etti. Nøjxxti meets jøts yikxon xyik'adujkøxtit mabaat meets jam kø'øm x'ixy.

⁶⁶ Winets ja nøjkxtøø jøts ja ojts yikxon tyik'adujkøxti ja oo'kpi jut, ojts ja t'axotsti ja tsaa midi tya'agiidyip jøts ja t'adsaadyøø, ojts ja seeyi tpikta'akti jøts ja jam tyiktandøø ja soldaditøjk pøn jam ejx'ejttip.

28

Ku ja Jesús yjujkpyijky jadigojk

¹ Xjats ku wyinaty t̄o ñaxy ja poo'kx̄in x̄ōow, j̄ots wyinaty kyujajta'aky kyud̄ō'kxa'aky myidukx̄ōow ja yjadu'ukp̄i samaan, winets ja María Magdalena m̄ōot jadu'uk ja María t̄n̄in̄ōjkxti ja oo'kpi jut j̄ots ja t'ats'ejxw̄a'andi.

² J̄ots jotm̄ōñ myiñ ja uyx janch m̄ok, ja nwindson'aj̄timdamik ja y'ankilis jam wyinaty kidakp tsajpwemp, j̄ots ku ja ojts yja'aty ma ja oo'kpi jut jam, j̄ots ja tjiḡiy ja tsaa midi ja t̄o yikta'agi'iy, j̄ots ja tta'ixakpejty.

³ Jade'en ja yjajy tyi'kxy sam widsukin, j̄ots ja wyet jade'en pyoobi sam tsap'̄ōo'pkyin.

⁴ Xjats ku ja soldadi jade'en t'ejxt̄ō, j̄ots ts̄o'̄ogi ja yjanchyikm̄ibejpn̄iyidi, j̄ots jade'en tyand̄ō sam ja jaa'ȳ ōogyindi.

⁵ Winets ja ankilis t̄n̄imaay ja t̄o'̄oxȳōjkti:

—Kidi mds̄o'̄ogidi. Nnija'wip̄ ōts j̄ots ku ja nwindson'aj̄tim Jesús x'ixa'adi p̄on krusk̄ōjxp̄ o'jk.

⁶ Ka'ap ja ya ukp̄oni, t̄o ja yjujkpyiky, t̄o ja tm̄imajada'aky ja o'jkin, t̄o ja jade'en yjaty sam ja ojts k̄o'̄om t̄n̄igajpxyin. Men x'ejxti ma ojts yikpikta'aky.

⁷ Tsojk n̄ōjkxti, j̄ots x'atstukmado'odit ja pyab̄ōjkit̄ōjk j̄ots ku ja t̄o yjujkpyiky jadigojk, j̄ots ku ja jawyeen ñ̄ōjkxt jam Galilea j̄otsnim mee mn̄ōjkxt; jamts ja x'ejxtit. Ȳo'̄oyi d̄o'̄on ja ndukmadoow̄andip.

⁸ Xjats ja t̄o'̄oxȳōjk jam putyi cho'ond̄ō ma ja oo'kpi jut jam, jade'en ja ch̄o'̄ogidi j̄ots jade'en ja yjanchxonda'akti; j̄ots ja ojts tsojk tyikn̄ōjkxti ja kajpxy ja ayuujk ma ja nwindson'aj̄tim Jesús pyab̄ōjkit̄ōjk jam.

⁹ Exam ja wyinaty jade'en ñaxti ku ja nwindson'ajtim Jesús wya'kaxi'jky jøts ja ojts kyajpxpøø'kxyidi. Winets ja wingon twingunøjkxidøø jøts ja twinguxanaay'øyiidi, nagyumajtsidi ja' tyekyøjxp,

¹⁰ jøts ja yide'en ñimaajyidi:

—Kidi mdsø'øgiidi. Nøjkx øts ja nmigu'uktøjk x'atstukmadojidi pøn jaty ø nbabøjkpi'ajtip jøts ñøjkxtit jam Galilea, jam øts ja xpaattit x'ejxtit.

Ku ja soldadi t'atstukmadowdi ja teetywindsøndøjk sa ja jut y'awajch

¹¹ Examnim ja tø'øxyøjk wyinaty yø'ødyi, jøts ja soldadi winaagin ñøjkxtøø jam kajpjotp pøn ejx'ejttip, jøts ja t'atstukmadoodøø ja teetywindsøndøjk ti jaty wyinaty tø tyuñi.

¹² Winets ja teetywindsøndøjk ojts tninøjkxti ja møjaa'dyøjk jøts ja tkajpxy'ajtti kyijpxy kyajpxy; ojts yikxon ja maamyeeñ tmo'odi ja soldaditøjk,

¹³ jøts ja tnimaadyøø:

—Jade'en mee mwā'ant jøts ku koots, ixap mee wyinaty mma'ay, ku ja Jesús pyabøjkpitøjk ojts yja'atti jøts ja ojts t'atsmaatsti ja oo'kpi ñine'kx.

¹⁴ Jøts øy ja windsøn ja wyinaty tjanijawi, øøts ja møøt nnagyajpxit jøts ja ka' sa wya'ant, jøts mee ka' ti pøky mdaja'adit.

¹⁵ Xjats ja soldaditøjk t'axajidøø ja meeñ, jøts ja ojts jade'en tpadundi sa jaty ja wyinaty tø yik'ana'amdi. Jøts jade'en ixymbaat tnimadya'akti ja israelit jaa'dyi.

Ku ja Jesús ttaguwa'anÿy#ñ ja tunk ja pyabøjkpitøjk

16 Jøts jade'en ñøjkxtøø ja ñimaktu'ukpi jaa'dyi jam Galilea, ja nwindson'ajtim pyabøjkpitøjk. Ja'ttøø ja jam kojpkøjxp midi ja wyinaty tø tyukmadøyi.

17 Jøts ku ja t'ejxpattøø ja nwindson'ajtim Jesús, jøts ojts ja ñagyuxendya'agyidi, øy ja jam winaagindi kø'øm pøn ja tkamibøjktip.

18 Winets ja nwindson'ajtim Jesús wingon wyingunøjkxiyidi jøts ja ñimaajyidi yide'en:

—Tø øts møk'ajtin nyikmøøy jøts øts ja nyiktu'unt wan tsajpjøtpyi jøts wan tnaxwiiñi.

19 Ninøjkxtits ja jaa'y øy manaajx øy magajp jøts ø xukpabøjkpi'attit; myiknøbattipts ja' Dios Teety køjxp, Dios y'U'nk køjxp, jøts Dios y'Espiritu Santo køjxp,

20 jøts yik'ixpøkti jøts tpadu'undit tuki'iyi ti jaty mee tø ndani'ane'emy. Jøts nimadowdi jøts ku meets ejtp nmøøt'ity øy juuni xøøw, kunim ø nme'ent jadigojk. Jade'en idø'on ja y'ejxi.

**Ja ɔgyajpxy ja ɔmyadya'aky midi xukpaajtimp
ja nitso'ok'ajtin
New Testament in Mixe, Tlahuitoltepec
(MX:mxp:Mixe, Tlahuitoltepec)**

copyright © 1987 Wycliffe Bible Translators, Inc.

Language: Mixe, Tlahuitoltepec

Translation by: Wycliffe Bible Translators, Inc.

Mixe, Tlahuitoltepec [mxp], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Tlahuitoltepec

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

cli

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

422dcf73-46a5-5403-b423-8406ed76ac1d